

O Le Liahona



**Faamalolosia o
Aiga ma Auaiga,
it. 4, 16, 20, 22**

**Ua Talanoa mai le
Autalavou Matutua e
uiga i le Ola Mama, i. 42**

**O Mau e Fa na Fesoasoani
ia i Matou, i. 54**

**Sii Ese Atu Mai le
Peraimeri, i. 58**



*Keriso i Amerika,
saunia e Jeffrey Hein*

*Ina ua asia e Keriso toetu
ia tagata sa Nifae i Amerika,
“sa ia ave a latou fanau laiti,
taitoatasi, ma faamanuia
i latou, ma tatalo atu i le
Tama mo i latou.*

*“Ma ina ua uma ona ia faia
o lenei mea sa toe tutulu o ia;
“Ma sa ia fetalai mai i le
motu o tagata, ma fofoga mai
ia te i latou: Faauta i o outou
tamaiti” (3 Nifae 17:21–23).*



Liahona, Oketopa 2012

O SAVALI

4 Savali a le Au Peresitene Sili: O Le Ki e Tasi i se Aiga Fiafia

Saunia e Peresitene Dieter F. Uchtdorf

8 Savali a Faiaoga Asiasi: Faamamaluina o a Tatou Feagaiga

TALA FAAALIA

22 Fesoasoani i le Autalavou ia Maua ni Aafiaga Faaleagaga

Saunia e Melissa Merrill

O auala e lima na uunaia ai ni aafiaga ma oo ai ina liua.

28 O Le Tusi a Alema: Lesona mo Le Asō

Saunia e Elder Paul B. Pieper

E tolu ni lesona mai le au sa Nifae e mafai ona fesoasoani ia i tatou e taulimaina ai luitau o o tatou aso.

34 Pe Faapefea ona Ola i le Teritori a le Fili
Saunia e Peresitene Boyd K. Packer
Sili ifo ia te oe lava pe faapefea ona avea le Agaga Paia ma se taiala ma uunaiga malupuiipua.

MATAGALUEGA

9 Mo Le Malosi o le Autalavou: Ofu ma Foliga Vaaia

10 Tusigāmanatu Konafesi Oketopa: Faaavanoa a Tatou Kalena mo le Konafesi
Saunia e Cheryl Burr

11 Auaunaga i le Ekalesia: O Tali a le Aoga Sa
Saunia e Emma Addams

12 O Le Mea Tatou Te Talitonu I Ai: O Le Ola Fuafua Lelei e Saunia ai i Tatou mo le Lumanai

14 O Mea Laiti ma Faatauvaa

16 O Tatou Aiga, O Tatou Auaiga: Aoaoina Atu o le Ola Mama ma le Amiomama
Saunia e Matthew O. Richardson

20 Tala Faamamai o le Talalelei: Aoaoina Atu o le Amiotonu i le Aiga
Saunia e Elder Delbert L. Stapley

38 O Leo o le Au Paia o Aso e Gata Ai


74 Tala Fou o le Ekalesia

79 Manatu mo Afiafi Faaleaiga

80 Seia Tatou Toe Feiloai: E Auauai Mai Pea Mea Lelei
Saunia e Caitlin A. Rush

I LE FAAVAA
Ata na saunia e Cody Bell.

AUTALAVOU MATUTUA



42

- 42 O Le Ola Mama i se Lalolagi Lē Mama**
Sa talanoaina e ni talavou matutua se toavalu le auala e tumau ai i le mama i se lalolagi e le faatauaina le amiomama.



AUTALAVOU

- 46 Fesili ma Tali**
O le a le uiga o le faamamalu i le perisitua a le Atua?

- 48 Ia Atamai ma la Avea ma se Uo**
 Saunia e Elder Robert D. Hales
Efaafaigoifie e uo lelei le ola ai i poloaiga.

- 51 Ofu mo se Siva**
 Saunia e Crystal Martin
Sa faaososoina au e ofu se ofu e le ufiufia ai ou tauau, peitai sa ou manatuaina lo'u faamanuiaga faapeteriaka.

- 52 Mo Le Malosi o le Autalavou: Ofu ma Foliga Vaaia—“Tuu atu i le Agaga Paia e Taitai”**
 Saunia e Mary N. Cook

- 54 Faamalosia e le Upu**
Sa faamatala e ni talavou se toafa se taimi sa oo mai ai se mau i mafaufau ma fesoasoani ia i latou.

- 57 Pepa Lautele o I Ai se Savali: E Sa'o Ma Vaapiapi Le Ala**



TAMAITI

- 58 Sii Ese Atu Mai le Peraimeri**
O nisi nei o gaoioiga fai e mafai ona e tulimatai atu i ai i Altii Talavou po o Tamaitai Talavou.

- 60 Le Pele Amiga**
 Saunia e Maribel
O se tusi i se uo o loo popole i le tuua o le Peraimeri.

- 61 Faafeiloai Atu i se Vaitau Fou o le Olaga**
 Saunia e Marissa Widdison
Ua sauniuni ia Noa, Dylan, Patrick, ma Peni ia maua le perisitua.

- 62 Musika: Afio Mai, le Alii Iesu**

- 63 Molimau Faapitoa:**
 Aisea e Taua ai Lo'u Mulimuli ma le Faamaoni ia Iesu Keriso, e Tusa lava po o fea o O'u I Ai?
 Saunia e Elder Dallin H. Oaks

- 64 Aumaia o le Peraimeri i le Fale: O Faamanuiaga o le Perisitua E Avanoa mo Tagata Uma**

- 66 Faaluaina ia Faamanuiaga**
 Saunia e Richard M. Romney
Feiloai ia Sophie ma Elodie, o se masaga e tai 10 tausaga mai Matakasa.

- 68 Pe Le Mafai Ona Papatiso Foi ma Au?**
 Saunia e Hilary Watkins Lemon
Ua fiafia lava Paulo e ono tausaga e avea ma se tagata o le Ekalesia.

- 70 Mo Tamaiti Laiti**

- 81 Faatusa o Tagata o loo i Mau o le Tusi a Mamona**

Susuga a le Au Peresitene Sili: Thomas S. Monson, Henry B. Eyring, Dieter F. Uchtdorf

O Le Korama a Apostolo e Toasefululuua:

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Faatonu: Craig A. Cardon

Fautua: Shayne M. Bowen, Bradley D. Foster, Christoffel Golden Jr., Anthony D. Perkins

Pule Faatonusili: David T. Warner

Faatonusili o le Lagolago mo Aiga ma Tagata o le Eklesia: Vincent A. Vaughn

Faatonusili o Mekasini a le Eklesia: Allan R. Loyborg

Pule o Mea Tau Pisinisi: Garff Cannon

Pule Faatonutonu: R. Val Johnson

Pule Faatonutonu Lagolago: LaRene Porter Gaunt

Lagolago o Lomiga: Melissa Zenteno

Au Tusitusi ma Faatonutonu: Susan Barrett, Ryan Carr, David Dickson, David A. Edwards, Matthew D. Flitton, Mindy Raye Friedman, Hikari Loftus, Lia McClanahan, Michael R. Morris, Richard M. Romney, Paul VanDenBerghe, Julia Woodbury

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus, C. Kimball Bott, Thomas Child, Kerry Lynn C. Herrin, Colleen Hinckley, Eric P. Johnsen, Scott M. Mooy, Brad Teare

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Connie Bowthorpe Bridge, Howard G. Brown, Julie Burdett, Bryan W. Gygi, Kathleen Howard, Denise Kirby, Ginny J. Nilson, Ty Pilcher, Gayle Tate Rafferty

Tailolomi: Jeff L. Martin

Faatonusili Lolumoga: Craig K. Sedgwick

Faatonusili o le Tufatufaga: Evan Larsen

Mo le okaina o mekasini, alu i le store.lds.org po o le Faletusi Tutotonu i Pesega. Telefoni 64127. Totogi o le Mekasini: \$0.55 (Samoa) i le kopu. Totogi mo le Tausaga Atua \$6.60 (Samoa).

Auina atu tusitusiga ma faafesili i luga o le initoneti i le liahona.lds.org: pe meli mai i le *Liahona*, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O Le Liahona (o lona uiga i le Tusi a Mamona o le "tapasa" po o se "faatonuala") e lomia i le faa-Alepania, Aminia (Sasae), Pisilama, Palekeria, Kemupotia, Sepano, Saina, Kalaotia, Siekisolvakia, Tenimaka, Take, Igilisi, Esitonita, Fiti, Finelani, Farani, Siamani, Eleni, Hanikeri, Initu, Iselani, Initonisia, Italia, Iapani, Kiripati, Korea, Latvia, Litunia, Malakasa, Maselai, Monokolia, Nouei, Polani, Potukale, Romania, Rusia, Samoa, Saina (ua faafagofieina), Silovenia, Sipaniolo, Suetenua, Tagaloka, Tahiti, Tai, Toga, Lukureini, ma Urutu, ma Viatename. (E eseese lava gagana.)

© 2012 Puletaofia e le Intellectual Reserve, Inc. Ua taofia aia tatau una. Lomia i le lunate Setete o Amerika.

E mafai ona kopi tala ma ato o le *Liahona* mo le toe faaaogaina i lotu po o le aiga ae ia le faia ai ni pisinisi. E le tatau ona kopi ni tala po o ni ata po afai o faasa mai i le laina o loo ta'ua le i le ona lea faatufugaga. Auina atu fesili e uiga i le puletaofia i le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

For Readers in the United States and Canada:

October 2012 Vol. 36 No. 10. O LE LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, Utah 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send address changes to Salt Lake Distribution Center, Church Magazines, PO Box 26368, Salt Lake City, UT 84126-0368.

Faaopoopoga o loo maua i le Initoneti

Liahona.lds.org

MO TAGATA MATUTUA

A maea ona faitau le Savali a le Au Peresitene Sili e faatatau i le faamagaloga (itulau e 4), atonu e te fia faitauina foi le lauga mulimuli a Peresitene James E. Faust i le konafesi aoao, "O Le Mana Faamalolo o le Faamagaloga" (Aperila 2007), i le conference.lds.org.

MO LE AUTALAVOU


O le itulau e 52, o loo faamatala ai e Mary N. Cook le auala e taialaina ai e o tatou lagona faaaloalo i le malumalu le auala e fai ai o tatou ofu. O le youth.lds.org, e mafai ona e saili atili ai e uiga i "Ofu ma Foliga Vaaia" ma soo se isi lava tulaga faatonuina mai le *Mo Le Malosi o le Autalavou*.

MO TAMAITI

E mafai ona e faitau i le masaga o Elodie ma Sophie mai Matakasa i le "Faaluaina ia Faamanuia" (itulau e 66) ma mata-mata i nisi o a laua ata malie i le liahona.lds.org.

I LAU GAGANA

O loo maua le *Liahona* ma isi tusi a le Eklesia i le tele o gagana i le languages.lds.org.



AUTU I LENEI LOMIGA

E ta'u mai e numera le itulau muamua o le tusiga.

Agalelei, 28

Aiga, 4, 16, 20, 22, 38, 66

Alii Talavou, 58, 61

Aoao atu, 16, 20

Auauna atu, 20, 39

Faalagolago o le tagata ia te ia lava, 12

Faamagaloga, 4

Faataitaiga, 40

Faatuatua, 39, 80

Faigata, 28

Feagaiga, 8

Galue, 12

Iesu Keriso, 62, 63

Konafesi aoao, 10

Legavia, 16, 42

Liua, 39

Malumalu, 8, 52

Ofu, 9, 51, 52

Papatisoga, 68

Perisitua, 46, 64

Perofeta, 28

Poto, 48

Sapati, 40

Sauniuniga, 12

Suesue i tusitusiga paia, 11, 54

Taitaiga, 20

Talafaasolopito o le Eklesia, 14

Tamaitai Talavou, 58, 60

Tatalo, 38

Tulaga faamatua, 16, 20, 22

Tusi a Mamona, 28, 81

Uo, 48

Usiusitai, 40, 57





OLE KI E TASI A•ISE Aiga Fiafia

**Saunia e
Peresitene
Dieter F. Uchtdorf**

Fesoasoani Lua i le
Au Peresitene Sili

Sa amataina e le tusitala Rusia maoae o Leo Tolstoy lana tusi *Anna Karenina* i upu nei: “O aiga fiafia e tutusa uma lava; o aiga faanoanoa e eseese uma ia mafuaaga.”¹ E ui ou te le o mautinoa pe moni le faamatalaga a Tolstoy e tutusa uma ia aiga fiafia, ae ua ou iloaina le mea e tasi e tutusa uma ai le toatele: o le auala latou te faamagalo ma faagalo ai ia ni faaletonu o isi ma vaavaai atu mo le lelei.

Ma le isi mea, o i latou ia e o mai mai aiga ia e le fiafia, e matele lava i le sailili masei, i ai ni lagona ita, ma e le mafai ona faagaloina ni mea sese ua tuanai.

“Ioe, ae . . .” o tala amata ia a i latou o e le fiafia. “Ioe, ae e te le o iloaina lona faatiga tele ia te au,” o le tala lea a se tasi. “Ioe, ae e te le iloaina lona matautia,” o le tala mai lea a le isi.

Atonu e sao uma lava; atonu foi e le sao.

E tele ni ituaiga solitulafono. E tele ni ituaiga tiga. Peitai o le mea ua ou matauina, o le tele o taimi tatou te fetuunai ai mea tatou te feita ai ma faamalie o tatou mafaufau e ala i le faamatalaina ia i tatou lava o ni tala e uiga i faamoemoega o isi ma tauleaga a latou galuega faapea e le loto faamagalo ma manatu faapito ae, i lena lava taimi e tasi, e siitia o tatou lava faamoemoega e foliga mai e mama ma lē pisipisia.

O Le Taifau a le Perenise

E i ai se tala anamua mai Uelese mai le seneturi lona 13 e faatatau i se perenise o le na toe foi mai i le aiga

ma maua ai o loo tafe toto foliga o lana taifau. Sa faataalise atu i totonu le tamaloa, ma i lona popole, sa ia iloa ai o loo misi lona atalii pepe ma o loo fao i lalo lona moega pepe. Sa sei i fafo e le perenise lana pelu i lona ita ma tape ai lana taifau. E lei leva, ae ia faalogoina le tagi mai o lona atalii—o loo ola le pepe! Ae o autafa o le pepe o loo taatia ai se luko ua pe. O le mea moni lava, sa puipui e le taifau le pepe a le perenise mai se luko feai.

E ui ina matautia lenei tala, ae o loo faapupula mai ai se manatu. E tatala ai le avanoa atonu o faamatalaga ia tatou te tauina ia i tatou lava i mafuaaga e ese ai foi uiga o isi ma e le faapea o le a ogatasi lava ma mea moni—o nisi foi taimi tatou te le fia iloaina lava le mea moni. E sili ai lo tatou lagona tauamitonuina pe a tatou feita e ala i le taofiofi pea o lo tatou le fiafia ma le tetee. O nisi taimi e silia ma ni masina po o ni tausaga foi o i ai nei lagona le fiafia. O nisi foi taimi e tumau ai lava i le olaga atoa.

O Se Aiga ua Vaeluaina

Sa le mafai e se tasi tama ona faamagaloina lona atalii mai le aluese mai le auala sa aoaoina ai o ia. Sa i ai ni uo a le tama e le fiafia i ai le tamā, ma e tele ni mea sa ia faia e ese mai mea sa mafaufau le tamā e tatau ona ia faia. O lea sa tupu ai se feeseesega i le va o le tamā ma le atalii, ma o le taimi lava na mafai ai e le atalii, sa ia aluese ai loa mai lona aiga ma e lei toe foi mai lava. E seasea lava ona la toe talanoa.

AOAO ATU MAI LENEI SAVALI

"Ao e saunia ia lesona taitasi, ia e fesili ifo ia te oe lava pe faapefea ona avea se mataupu faavae e pei o se mea na oo i olaga o tagata o le aiga" (*O Le Aoao Atu, E Leai Se Isi Vala-auga e Sili Ai* [1999], 180). Mafaufau e valaaulia tagata o le aiga e faasoa mai ni lagona lelei sa latou maua pe na matauina foi e uiga i le loto faamagalo. Talatalanoa e uiga i nei aafiaga, ma faamamafa atu ia faamanuiaiga o le loto faamagalo. Faaiu i le tuuina atu o se molimau i le taua o le fefaaamagaloai o le tasi ma le isi.

Pe na manatu le tamā ua tauamitonuina o ia? Atonu.

Pe na manatu le atalii ua tauamitonuina o ia? Atonu.

Pau lava le mea sa ou iloa o lenei aiga sa vaeluaina ma ua faanoanoa ona e lei faamagaloina e le tama le atalii po o le atalii foi i le tama. Sa le mafai ona la faasopoloaina le manatua o mea sa le fiafia ai le tasi i le isi. Sa faatumuina o laua loto i le ita nai lo le alofa ma le faamagalo atu. Sa taofia e le tagata lava ia lona avanoa e faia ai se lelei i olaga o isi. O le feeseseaiga i lo la va sa matuai loloto lava ma lautele ma sa faapagotaina faaleagaga ai le tagata lava ia i lona lava motu o faalogoga.

Ol mea e sili ai, sa saunia e lo tatou Tama o i le Lagi Faavavau e alofa ma atamai ni auala e foia ai lenei va faasausili. O le Togiola le iu ma le maoae o se faatinoga aupito sili lea o le faamagaloga ma le toe faaleleiga. O lona taunuuga e le oo i ai lo'u malamalam, peitai ou te molimau atu ma lo'u loto atoa ma lo'u agaga atoa e uiga i le moni ma le malosi sili. Sa ofoina atu e le Faaola o Ia lava e totogi ai a tatou agasala. E ala mai ia te Ia ua tatou maua ai le faamagaloa.

E Leai se Aiga e Atoatoa

E leai se tasi o i tatou e leai se agasala. Tatou te faia uma lava ni mea sese, e aofia ai oe ma a'u. Sa faamanualiaina uma lava i tatou. Sa tatou faamanualiaina uma foi isi.

Ua mafai ona faaeaina i tatou ma maua le ola faavavau ona o le taulaga a lo tatou Faaola. Afai tatou te talia Ona ala ma aveese lo tatou faamaualuga e ala i le faamaluluina o o tatou loto, o le a tatou aumaia le malamalam ma le faamagaloga i totonu o tatou aiga faapea foi o tatou lava olaga. O le a fesoasoani mai le Atua ina ia faateleina lo tatou loto faamagalo, ma ia maua le loto malie e savali i maila e lua, ina ia e muai faatoese atu e tusa lava pe le o oe sa sese, ma ia aluese mai ni feeseseaiga tuai ma aua nei toe manatuina.

Faafetai i le Atua, o le sa auina mai Lona Alo e Toatasina na Fanaua, ma le Alo, o le sa tuuina mai Lona ola mo i tatou.

Tatou te lagona i aso uma le alofa o le Atua mo i tatou. Pe le tatau ea ona tatou tuuina atu sina vaega itiiti o i tatou lava mo o tatou uso a tagata e pei ona aoaoina mai i le pese "Ona ua Maua Tele"?² Ua tatalaina e le Alii le faitotoa ina ia faamagaloina i tatou. Pe le o le mea sao ea o le tuu ese o o tatou lava manatu ma lagona faamaualuluga ae ia amata ona tatala atu le faitotoa o le faamagaloga mo i latou ia o loo tatou tauivi—aemaise lava i tagata uma o o tatou lava aiga?

Ol iuga, e le tupu le fiafia mai le tulaga atoatoa ae mai le faaaogaina o mataupu faave paia, e tusa lava pe o ni laa laiti. Sa folasia mai e le Au Peresitene Sili ma le Korama a Apostetolo e Toasefulula faapea: "E maua le fiafia i le olaga faaleaiga pe a faavae i aoaoga a le Alii o Iesu Keriso." O faaipoipoga ma aiga manuia, e faavae ma tumau i mataupu faavae o le faatuatua, tatalo, salamo, *faamagaloga*, faaaloalo, alofa, agalelei, galuega, ma gaoioiga faafafia tuuafatasi.³

Ol le faamagaloga ua faatulagaina tonu lava i le ogatotonu o nei upumoni faigofie, ma o loo maua i le fuafuaga o le fiafia a lo tatou Tama Faalelagi. Ona o mataupu faavae e fesootai ma le faamagaloga, e fesootai ai foi ma tagata. O se ki, e tatalaina ia faitotoa o loo loka, o se amataga o se ala faamaoni, ma o se tasi o o tatou faamoemoega sili mo se aiga fiafia.

Tau ina ia fesoasoani mai le Atua ia i tatou ina ia maua atili le loto faamagalo i totonu o o tatou aiga, faamagalo atili atu i isi, ma faamagalo atili i tatou lava. Ou te tatalo ina ia tatou lagona o le loto faamagalo o se tasi lea o auala matagofie e tutusa ai le tele o aiga fiafia. ■

FAAMATALAGA

1. Leo Tolstoy, *Anna Karenina*, trans. Constance Garnett (2008), 2.
2. "Ona ua Maua Tele," *Viiga*, nu. 124.
3. "O Le Aiga: O Se Folafolaga i le Lalolagi," *Liahona*, Nov. 2010, 129; faaopoopo le faamamafa.

Tatalo ma le Filemu

Saunia e Lauren W.

Sa ma tauupu ma lou tina i se tasi po ma sa ou matua faanoanoa lava. O lea sa ou filifili ai loa o le a ou tatalo. E ui lava sa ou le fiafia ma ou te lei fia manao e avea au ma se tagata "faale-agaga," ae sa ou iloa o le tatalo o le a fesoasoani ia te au ina ia ou lagonaina le fiafia ma le le toe fia misa. Ina ua aluese lou tina mai le potu, sa amata lau tatalo. "Le Tama Faalelagi Pele, ua ou alu atu i Lau Afio i lenei po ona . . ." Leai. Sa pupula ou mata ma tatala ou lima; e le manaia na upu. Sa ou toe taumafai. "Tama Faalelagi, ou te manaomia Oe . . ." Sa le manaia foi na upu. Sa ou lagona le uunaia o au e Satani e aua ou te tatalo e talosagaina ai le fesoasoani a le Tama Faalelagi.

Sa faafuasei lava ona ou maua se musumusuga ou te fai atu ai faafetai! Ma o lea sa ou faia, ma sa amata ona tafe mai manatu mai lou mafaufau i le tele o mea e mafai ona ou faafetaia ai le Tama o i le Lagi. Ina ua uma ona ou faafetai atu ia te la, sa ou talanoa loa i faafitauli o loo i ai.

Sa ou faalogoina mulimuli ane se lagona filemu matagofie i totonu o au, o se lagona mafanafana faaleagaga ua ou iloa ai e alofa lo tatou Tama Faalelagi faapea foi ma ou matua ia te au ma o au o se afafine o le Atua. Sa mafai ona ou faatoesei i lou tina ma sa taliaina e ia lau faatoesega.

O Le Faamagaloga e Aumai ai le Fiafia

Sa aoao mai Peresitene Uchtdorf e tatau ona tatou faamagalo i tagata o tatou aiga. Vaai pe na faapefea ona aafia le aiga o losefa ma Ana i a la'ua filifiliga.



Sa taaalo faatasi ia losefa ma lona tuafafine laitiiti o Ana. Sa sei ese e Ana le meataalo a losefa mai ia te ia. O le a se mea e tatau ona fai e losefa?

Sa ita losefa ia Ana.

Na tagi Ana. Sa a'oa'i losefa e lona tina i lo la tauaimisa ma lona tuafafine. Na faanoanoa losefa i lona faia o se filifiliga le lelei.

Sa faamagalo e losefa ia Ana ma maua se isi meataalo e taalo ai.

Sa la taaalo faatasi ma le fiafia. Sa fiafia lo la tina ona ua alofa losefa i lona tuafafine ma tausi le filemu i totonu o le aiga. Na lagona e losefa le fiafia ona ua ia filifili e faamagalo.



Mulimuli ane, sa manaomia losefa ma Ana la te fesoasoani i lo la tina e saunia le meaai o le afiafi. E le'i fesoasoani losefa. O le a se mea e tatau ona fai e Ana?

Sa tomumu Ana i lona tina.

E lei malie Ana i lona faia na o ia o feau. E oo atu i le taimi e aai ai i le afiafi ua faanoanoa tagata uma ona o le fe'aina'i.

Sa faamagalo e Ana ia losefa ma fesoasoani i le meaai o le afiafi.

Sa faafetai lo la tina ia Ana mo lana fesoasoani. E fiafia le aiga e faatasi i le taimi o le meaai i le afiafi. Sa lelei lagona o Ana i lona filifili e faamagalo atu.

E faapefea ona aafia le fiafia o lou aiga ona o au filifiliga e faamagalo atu?




Suesue ma le agaga tatalo i mea nei, ma pe a talafeagai ai, ia talanoaina faatasi ma uso e te asia. Faaoga fesili e fesoasoani ai ia te oe e faamalosia ai ou uso ma avea ai le Aualofa ma se vaega ola o lou lava olaga.

Faamamaluina o a Tatou Feagaiga

Ofaiaoga asiisi o le faaalia lea o le avea ai o i tatou ma soo ma o se auala e faamamalu ai a tatou feagaiga ao tatou auauna atu ma faamalosii atu i isi. O se feagaiga o se folafolaga paia ma tumau lea e faia i le va o le Alii ma Ana fanau. “Pe a tatou iloa o i tatou o fanau o le feagaiga, ua tatou iloa ai pe o ai i tatou ma mea ua faamoemoeina e le Atua mai ia i tatou,” na saunoa mai ai Elder Russell M. Nelson o le Korama a Apostolo e Toasefululua. “Ua tusia Lana tulafono i o tatou loto. O ia o lo tatou Atua ma o i tatou o Lona nuu.”¹

O le avea ai o i tatou ma ni faiaoga asiisi o le a mafai ai ona tatou faamalosii i latou o loo tatou asia i a latou taumafaiga ina ia tausia a latou feagaiga paia. O le faia o lena mea, o le a mafai ai ona tatou fesoasoani ia i latou ina ia saunia mo faamanuiaga o le ola e faavavau. “O tuafine uma i lenei Ekalesia, o e ua osi feagaiga ma le Alii, ua ia te i latou se faatagaga paia e fesoasoani ai i le laveaiina o agaga, e taitai tamaitai o le lalolagi, e faamalosia aiga o Siona, ma fausia le malo o le Atua,”² sa saunoa mai ai Elder M. Russell Ballard o le Korama a Apostolo e Toasefululua.

Ao tatou osia ma tausia feagaiga paia, o le a avea i tatou ma meafaigaluega i aoao o le Atua. O le a mafai ona tatou faailoa atu o tatou talitonuga ma faamalosia le faatuatua o isi i le Tama Faalelagi ma Iesu Keriso.



Mai Tusitusiga Paia

1 Nifae 14:14; Mosaea 5:5–7; 18:8–13; Mataupu Faavae ma Feagaiga 42:78; 84:106

FAAMATALAGA

- Russell M. Nelson, “Feagaiga,” *Liahona*, Nov. 2011, 88.
- M. Russell Ballard, “Tamaitai o le Amiontonu,” *Liahona*, Tes. 2002, 39.
- O Afafine i Lo’u Malo: O Le Talafaasolopito ma le Galuega a le Aualofa* (2011), 144.

Mai lo Tatou Talafaasolopito

O le malumalu o “se nofoaga o le faafetai mo le au paia uma,” sa faaalia e le Alii i le Perofeta o Iosefa Samita i le 1833. O se “nofoaga o le aoaoga mo i latou uma o e ua valaaulia i le galuega o le au-aunaga i o latou valaauga ma tofi eseese uma; ina ia mafai ona faaatoatoaina i latou i le malamalamaaga o la latou au-aunaga, i le teori, i le mataupu autu, ma i le mataupu faavae, i mea uma e faatatau i le malo o le Atua i le lalolagi” (MF&F 97:13–14).

O le usoga a le Aualofa i Navu, Ilinoi, i le amataga o le vaitau o le 1840 sa fesoasoani i isi ina ia saunia mo sauniga o le malumalu. O sauniga o le perisitua maualuga lea na mauaina e le Au Paia o Aso e Gata Ai i le Malumalu o Navu, “ua faaalia ai le mana o le faale-ataua” (MF&F 84:20). “A o tausia e le Au Paia a latou feagaiga, sa faamalosia ma lagolagoina i latou e lenei mana i taimi o o latou tofotofoga i aso ma tausaga o i luma.”³

I le Ekalesia i le taimi nei, o loo auauna atu ia tamaitai ma alii faamaoni i le lalolagi atoa i totonu o malumalu ma o loo faaauau pea ona maua le malosi i faamanuiaga lea ua na o feagaiga o le malumalu e mafai ona maua ai.

OFU MA FOLIGA VAAIA



le lalolagi i lenei vaitaimi, o le toatele lava e le o malamalamā pe faaaloalo foi i tulaga paia o o tatou tino. Ua tu matilatila ai le Au Paia o Aso e Gata Ai i se auala o loo faaalia ai tatou te iloa le taua o o tatou tino (tagai i le [tamaitusi, 2011] *Mo Le Malosi o le Autalavou*, 6–8). O le itulau e 52 o lenei lomiga, o loo talanoa mai ai, Mary N. Cook, fesoasoani muamua i le au peresitene aoao o Tamaitai Talavou, e uiga i lenei tulaga faatonuina:

“Afai ae fausia se malumalu, e matuai vaavaai lelei lava ma faamautinoa o loo malupiupua ma matagofie le teuteuina, i totonu ma fafo. O le ki i le fuafuaina o malumalu o le iloina lea o le malumalu o le *faatusa* o le Alii-o Lona maota lea. Tatou te *faaaloalo* i malumalu o ni nofoaga paia lea ua na o i latou e agavaa e mafai ona ulu atu i ai. Tatou te maua le agaga *migao* i totonu o malumalu aua o sauniga ma feagaiga paia ia sa tatou faatinoina o le a mafai ai ona tatou toe foi atu i lo tatou Tama Faalelagi.

“Ua sili atu le taua o lou tino nai lo le malumalu e sili ona matagofie i luga o le fogaelele. O oe o se atalii po o se afafine faapelepele o le Atua! Ua faatatau atili nei mataupu faavae—faatusa, faaaloalo, ma le migao—i le taua ma le puipuiga e te tuuina atu i lou tino.”

O le a mafai ona fesoasoani ia te oe nei fautuaga i le aoaoina o lau fanau i mataupu faavae sao e uiga i ofu ma foliga vaaia. Ia manatua foi o au faataitaiga i le ofuina o ofu talafeagai o le a aoao ai lau fanau i le taua o le ofuina o ofu e tatau ai.

Fautuaga mo le Aoaoina Atu o le Autalavou

- Faitau faatasi ma lau fanau talavou le vaega o ofu ma foliga vaaia i le *Mo Le Malosi o le Autalavou*. O le faia o lena mea o le a e maua ai le avanoa e talanoa ai i aoaoga faavae, faamanuiaga, ma lapataiga o lenei tulaga faatonuina ma tali ai soo se fesili a lau tama tama po o lau tama teine.
- Mafaufau e fai se afiafi faaleaiga i le taua o ofu ma foliga vaaia. E mafai ona e fesili i lou aiga, Afai o loo outou faatasi ma le Alii i le lotu, o le a le ituaiga ofu e te fia ofu ai? E faapefea ona e fia faaali atu oe lava ia te Ia? O le a sou lagona pe afai o fai ou ofu talafeagai? E mafai foi ona outou talanoa i ofu e talafeagai mo isi tulaga, e pei o le aoga, galuega, po o nisi foi gaoioiga faaagafesootai.

Fautuaga mo le Aoaoina o Tamaiti

- O o tatou ofu e tau atua mea e taua ia i tatou. Ina ia faapupula atu lenei mataupu faavae, mafaufau e fai se afiafi faaleaiga e oofu ai tagata uma e pei o se faifeatalai pe fai ni ofu lelei o le Aso Sa.
- E tusa lava pe laitiiti, e mafai lava e tamaiti ona fai ni ofu talafeagai. Iloilo faatasi ma lau fanau le taiala lea o loo i le itulau e 7 o le *Mo Le Malosi o le Autalavou* ma ia saunia ni ofu e ogatusa ma na taiala. ■

MAU E FAATATAU I OFU MA FOLIGA VAAIA

Kenese 1:27;
1 Korinito 6:19;
Alema 1:27

Tusigāmanatu Konafesi Oketopa

“O le mea ua fai atu ai A’u o le Alii ua Ou fai atu ai; . . . pe i lo’u lava leo po o i le leo o a’u auaua, ua tutusa lava” (MF&F 1:38).

Faaavanoa a Tatou Kalena mo le Konafesi

Saunia e Cheryl Burr

Talu ai o lo matou vaitaimi e lei i ai ni gaoioiga faaopoopo e fenumiai ai, o lea sa mafai ai ona matou lagonaina atili le Agaga pe a matou faalogologo i le konafesi aoao.

Itausaga ua mavae, ao laiti le ma fanau e toaono, sa matou filifili ai matou te fia mananao ia avea le konafesi aoao ma se mea e sili ona taua ia i matou. Sa matou talanoa e uiga i le taua o le matamata i le konafesi ma ni mafaufau manino ma ni tino maloloina. O le konafesi o se taimi taua lea e maua mai ai ni aoaoga mai o tatou perofeta o i ai nei. O lea sa matou faatuina ai se sini ia aua nei fuafuaina se mea mo ni nai aso ao lei faia le konafesi po o le faaiuga foi o le vaiaso lea e faia ai le konafesi. Sa matou polokaina na aso i la matou kalena, ma sa taitasi ma matou tautino ia aua nei faia nisi gaoioiga i na aso.

Afai e te filifili e faaaoga lea auala e tasi, o le a avea ma se mea fou i lou aiga faapea ma ou tulaga, peitai o “gaoioiga faaopoopo” lea e patino lava i o tatou aiga e pei o le auai i gaoioiga a le aoga, asiisi mai o tamaiti o le tuaoi, faifai mea faatasi ma uo i se nofoaga e ese mai le fale, pati pe fai ‘aiga ma uo po o tagata o le aiga, faia o ni galuega faatino po o le galulue i le fanua i le va po o le taimi foi o sauniga o le konafesi, tuu o galuega faatino o le aoga e fai i le taimi mulimuli, ma le taliaina o ni tiute faaopoopo o le galuega.

Pe a oo i le vaiaso ao lumanaui le konafesi aoao, e faigata i nisi taimi ona fai atu leai i nei gaoioiga, peitai o le tele lava o le taimi e faia ai ma le fiafia e tagata o le aiga ni filifiliga sao ina ia ausia la tatou sini. Sa matou iloa e mananao a tatou fanau iti ina ia avea ma se vaega o le konafesi aoao. Ou te manatu ona sa matou talanoa pea lava pea e uiga i le taua o le konafesi i le aluga o le vaiaso ao lumanaui le konafesi.

Ou te fiafia e tau atu o le faafaigofieina o le faatulagaina o o matou aso ao lei faia pe ua

faagasolo foi le konafesi aoao na suaia atoa ai lava ia lagona o lo matou aiga. Na saunia o matou loto ma mafaufau mo le konafesi. E lei lofituina o matou taimi i nisi gaoioiga faaopoopo, ma sa mafai ona matou lagonaina le Agaga ao matou saofafai ma faalogologo atu i upu o fautuaga mai o tatou taitai.


Sa faaauau pea le matou sini o le konafesi ina ua mavae le konafesi aua ua faatumulia ai lo matou fale i le filemu. E ui o le toatele o le ma fanau e le o toe nonofa i le aiga, ae ma te uunaia pea i latou ina ia faaavanoa a latou kalena i nai aso ao lumanaui pe ua faagasolo foi le konafesi, e pei ona matou faia i le fale. Matou te taumafai foi ina ia seti se taimi matou te matamata faatasi ai o se aiga atoa se sau-niga o le konafesi. Ou te faamoemoe faapea afai e faaipoipo le ma fanau ma maua ni a latou lava fanau, o le a latou faaauau pea ona tuuina i se tulaga taua maualuga o le malupuipuia o o latou aafiaga o le konafesi e ala i le faaavanoaina o a latou kalena. ■



IA AVEA KONAFESI O SE [VAEGA E TATAU ONA] FAAMUAMUA

“la filifili nei e avea konafesi aoao ma se mea e faamuamua i lou olaga. la filifili e faalogo ma le totoa ma mulimuli i aoaoga e tuuina mai.”

Elder Paul V. Johnson o le Fitugafulu, “O Faamanuiaga o le Konafesi Aoao,” *Liahona*, Nov. 2005, 52.



O TALI A LE AOGA SA

Saunia e Emma Addams

Ei ai sou faanaunauga o le saili o ni tali sili mo ou luitau—o le talosagaina o le fesoasoani a le Alii mo au ina ia maua le mea lea e tasi e mafai ona faaleleia mea uma. Ua ou iloa o lea ituaiga taumafaiga o le a fafaigata atili ai mea.

A o ou faiaoga i le vasega o le Mataupu Faavae o le Talalelei i lau uarota, sa ou naunau lava e tuu atu ni fesili loloto e manaomia ai le mafaufau loloto ma ni tali tetele, fou, ma malamalama. I nisi upu, sa ou manao e aloese mai le taulotoina o “tali [masani tuai] a le Aoga Sa” lea e tele lava ina tali mai ai tagata o le uarota i vайасо taitasi.

A o ou suesue i le Feagaiga Fou i le taimi o au sauniuniga, sa taia au i le auala o loo faaaoga ai le upu *tumau*, lea na faaaoga soo mai. Mo se faataitaiga, fai mai le Ioane 15:10, “Afai tou te tausia a’u poloaiga, ona-*tumau* lea o outou i lo’u alofa; pei ona ou tausia poloaiga a lo’u Tama, ma ou *tumau* i lona alofa” (faaopoopo le faamamafa).

I Lana Tataло maoae Faa-Puluvaga, sa tatalo ai le Faaola mo Ona soo ina ia “tasi i latou uma; faapei o oe le Tama o i totonu ia te au o au foi o i totonu ia te oe, ina ia tasi i latou i totonu ia te i taua” ma “o au o i totonu ia te i latou, o oe foi o i totonu ia te au, ina ia faaatoatoaina i latou ia tasi” (Ioane 17:21, 23).

O le tele o mea sa ou sailia o le pe faapefea ona ou tasi ma le Alii, pe faapefea ona ou *tumau* i Lona alofa, ma pe faapefea, o se taunuuga, ona ou atiina ae se onosai faaopoopo—le onosai lea sa ou matuai manaomia lava e suia ai ou lagona ma mea na faavaivaia au ma o le a toe faamalosia ma faamamaina au.

Sa iloagofie, a o ou saili ina ia malamalama i le upu *tumau* ma tali i luitau faigata lea e feagai ma au i aso uma, na iu lava ina toe taitai atu au i tua i tali tonu o le Aoga Sa lea sa ou taumafai e aloese mai ai. Sa ou maua ni tali i ou luitau e ala i le faitauina o tusitusiga paia, tatalo i aso uma, auauna atu i lou aiga ma isi, ma auai i le malumalu faapea ma au sauniga o le Aso Sa. Sa ou iloa o na mea faigofie o le a faia se eseesega i le va o le tumau ai ma le tumau ai lelei faapea ma le onosai.

O tali o le Aoga Sa o ni tali e sili ona lelei. ■




ATINAEINA O LO TATOU FAATUATUA

“O le auauna atu, sue-sue, tatalo, ma le tapuai atu o faavae ia e fa o le faaatoatoaina o mea ‘e lei atoa i lo [tatou] faatua-tua.’ (1 Tesa. 3:10.) A tatou tuu le tausia o lo tatou faatua i soo se tasi o ia auala faapitoa e fa, o le a lamatia i tatou. . . .

“I se lalolagi o faigata, e mafai e le Alii ona tuia o tatou mafaufau i lona faaaoga ‘o le pelu a le Agaga, o le afioga lea a le Atua.” (Efe. 6:17; tagai foi i le laroma 1:12.) E ui i lea, e tatau ona ‘o faatasi le faatua’ (Epe. 4:2) ma le faalogo, faatasi ma galuega Kerisiano e pei ona tatou faalogo soo i ai.”

Elder Neal A. Maxwell (1926–2004) o le Korama a Apostolo e Toasfululua, “Ne’i Faavaivai o Outou Loto ma Outou Le Lavatia,” *Liahona*, Jul. 1991, 96, 97.



FAAAOGAINA O PUNAOA UA FAAMAONIA A LE EKALESSIA

“E faaaoga e faiaoga ma taitai ia tusi-tusiga paia, o aoaoga a perofeta o aso e gata ai, ma punaoa ua faamaonia o mataupu aoaoina e aoao atu ai ma molimau atu i aoaoga faavoe o le talalelei. O punaoa ua faamaonia mo mataupu aoaoina mo vasega taitasi po o korama o loo lisi atu i *Faatonuga mo Mataupu Aoaoina o loo i ai nei*. Pe a manaomia ai, e faaopoopo atu e faiaoga i mataupu aoaoina ia mekasini a le Ekalesia, aemaise o lomiga o konafesi aoao o le *Ensign* ma le *Liahona*.”

Tusitalima 2: Taitaiina o le Ekalesia (2010), 5.5.4.

O Le Ola Fuafua Lelei

E SAUNIA AI I TATOU MO LE LUMANAI

E talitonu le Au Paia o Aso e Gata Ai i le saunia ma le ola faalagolago o le tagata ia te ia lava. Matou te talitonu ina ia saunia faaleaoaoga mo galuega, ia saunia mea tau tupe mo se aso timu, ma ia saunia faaletino mo faalavelave faalenatura po o nisi luitau. O le mea e sili ona taua, matou te talitonu i le saunia faaleagaga mo le Toe Afio Mai Faalua o Iesu Keriso ma mo le toe nonofo ai faatasi ma lo tatou Tama o i le Lagi. O lenei taumafaiga ina ia saunia ua taua o le ola fuafua lelei.

O le ola fuafua lelei o loo atagia ai lo tatou tulaga moni faalenatura e faavavau: tatou te “faia mo i [tatou lava] ae le faamalosia” (2 Nifae 2:26). E finagalo le Alii ina ia faamoemoeina i tatou ma tu lē faalagolago (tagai i le MF&F 78:14). E finagalo o Ia ina ia tatou ola fuafua lelei ona o le itu-aiga tagata ua avea ai i tatou: faamoe-moeina, agaalofa, faatagata matua, agalelei. O le tele o lo tatou ola faalagolago ia i tatou lava, o le lelei atili ai foi lea o lo tatou fesoasoani i o tatou aiga ma isi. E faapefea ona tatou fafagaina e o fiaaai pe afai o tatou fiaaai foi? E faapefea ona tatou faasoa atu le malamalama pe afai e le o lava foi so tatou malamalama? E faapefea ona tatou fausia le faatuatua o isi pe afai

e le o lava foi lo tatou faatuatua?
O mataupu faavae o le ola fuafua lelei e aofia ai mea nei:

- Sauniuniga. “Ina outou saunia ia, ina outou saunia ia mo mea o le a oo mai, ona ua latalata mai le Alii” (MF&F 1:12).
- Galue. “Aua e te paie” (MF&F 42:42).
- “Saili i le aoaoina, e ala lava lea i le suesue ma le faatuatua foi” (MFF 88:118).


A faia e tagata o le Ekalesia uma e mafai ona latou faia e tausi ai i latou lava ae le gafataulimaina ai mea taua latou te manaomia, e tatau ona latou liliu muamua atu i o latou aiga mo se fesoasoani. Afai e le lava, e mafai ona fesoasoani le Ekalesia. E mafai e epikopo ma peresitene o paranesi ona faaaoga ni punaoa mai “le faleteuoloa o le Alii” e fesoasoani ai i tagata o le ekalesia (tagai i le MF&F 82:18–19). O le faamoemoega o soo se fesoasoani mai le Ekalesia o le fesoasoani lea i tagata o le ekalesia ina ia latou fesoasoani ia i latou lava ma uunaia le galulue i o latou olaga. ■

Mo nisi faamatлага, tagai i le Kenese 41; MF&F 38:30.



“O i tatou uma lava ua nafa ma le saunia o mea mo i tatou lava ma o tatou aiga, i mea faaletino ma le faaleagaga. O le tuuina atu ma le faautauta o mea e manaomia, e ao ai ona tatou ola i mataupu faavae o le ola faautauta po o le faasoasoatau: o le ola fiafia i mea ua tatou maua, o le faamalieina i mea ua tatou maua, aloese mai le soona fai o aitalafu, ma ia faaputuputu ma le filiga ma saunia mo faalavelave faafuasei i aso leaga.”

Elder Robert D. Hales o le Koroma a Aposetolo e Toasefululu, “Ia Avea ma E Tuuina Atu ma le Faautauta Mea e Manaomia Faaleitino ma le Faaleagaga,” *Liahona*, Me 2009, 8.



E mafai ona tatou galu-lue ina ia ola faalagolago le tagata ia te ia lava i eria nei:

Malosi faaleagaga:

Faalagolago i le Alii; usitai i poloaiga; tatalo ma suesue i tusitusiga paia i aso uma; auauna atu i isi.



Soifua maloloina

faaletino: Usitai i le Upu o le Poto; faamalositino; ia lava le moe; faia ni faataitaiga lelei o le mama ma le tumama.



Aoga: la iloa tusitusi ma faiatau tusi; ia maua ni tomai faalegaluega; suesue "i tusi sili ona lelei" (MF&F 88:118).



Faigaluega: Faigaluega e saunia mo lou lava aiga faapea ma manaoga o lou aiga.

Mea e teu i le fale: Teu ni vaiinu mama ma ia teu auauai se sapalai o meaai e te taumafaina i se tulaga masani ai ma ni sapalai meaai e umi ona teu, e pei o sana ma pi.

Mea Tautupe: Totogi le sefuluai ma taulaga; aloese mai le faia o ni aitalafu e le talafeagai; ia teu auauai se tupo faaleoleo.

TALIINA O FESILI

E manatu nisi pe tolo'a'i e le Au Paia o Aso e Gata Ai ia meaai. O le mea moni, tatou te teuina ni meaai ma vai e saunia ai mo vaitaimi o le le lava o ni meaai ma ni vai mama pe utiuti ai foi tupo mo mea e manaomia. I taimi o faalavelave faafusei, o le a lagona atili ai e i latou na teuina ni meaai le saogalemu ma o le a mafai atili ai ona latou fesoasoani i o latou aiga ma tuaoi i taimi o faalavelave.

O Mea Laiti & Faatauvaa

*"O mea laiti ma faatauvaa e faataunu
ai mea tetele" (Alema 37:6).*

MANATUAINA O SOIFUAGA MAOAE

Newel K. Whitney (1795–1850)

Lalo, itu tauaga-vale i totonu: O se ata vane o Newel K. Whitney. Lalo, itu taumatau i totonu: O le fogafale i luga o le faleoloa o Newel K. Whitney i Katalani, Ohaio, lea na saia ai sauniga o le Aoga a Perofeta ma le Ekalesia. Pito i lalo: O le faleoloa a Whitney.

Sa fanau Newel Kimball Whitney i Veremona, ISA, i le aso 5 o Sepuari, 1795. O ia o se alii faipisini talenia ma sa amataina ai se faigaou ma se paaga faapisinisi ma Sidney Gilbert. I le amataga o le la pisinisi, sa tele lava ina la feoai. I se tasi o na malaga faapisinisi, sa feiloai ai Newel ia Elisapeta Ana Samita i Katalani, Ohaio. E tolu tausaga o fai le faamasaniga a Newel ma Ana ma faaipoipo ai i le 1823.

Sa saili faatasi Newel ma Ana mo le upumoni ma, mo se taimi, na auai ai i le mau a le au Campbellite, lea sa latou folafolaina faalauaitele o i latou na toefuataiina mai

le faa-Kerisiano anamua. I se tasi po na tatalo ai Newel ma Ana "ia iloa mai le Alii pe faapefia ona [la] maua le meaalofa o le Agaga Paia." Na faamatalaina e Ana le faaliga sa la mauaina o le tali i le la tatalo: "Sa oo mai le Agaga i o maua luga ma sa uftia le fale i se ao. . . . Ona ma faalogoina lea o se leo mai le ao, ua faapea mai: 'Ta sauniuni e talia le afioga a le Alii, aua o le a oo mai.'"¹

E lei leva ona maua lenei tali i le tatalo, ia Oketopa 1830, ae o mai ni faifeautalai o le Au Paia o Aso e Gata Ai i Katalani. O Novema, na papatisoina ai Newel ma Ana. Sa na o ni nai masina mulimuli ane, ae tuitui atu Iosefa ma Ema Samita

i le faitotoa o le au Whitney. Ina ua faafeiloai atu e Iosefa ia Newel i lona igoa, sa le mafai ona fai atu Newel na ia iloaina le igoa o le Perofeta, o lea na tali atu ai Iosefa, "O a'u o Iosefa le Perofeta; o lau tatalo ua ou oo mai ai iienei, o le a se mea ua e manao ai ia te au?"² Ona nonofo faatasi ai lea o le au Whitney ma le au Samita mo nai vasio ma tuuina atu se fale mo i laua ia Setema 1832.


E le gata i le tuuina atu i le au Samita o se fale e nonofo ai, ae na tuuina atu foi e Newel e faaaogaina atoa e le Ekalesia le avanoa o le fogafale i luga o lona faleoloa. I le faleoloa o Whitney, sa fai ai e taitai o le Ekalesia ia fonotaga ma le Aoga a Perofeta.

Ia Tesema 1831, na valaauna ai Newel e avea ma epikopo lona lua o le Ekalesia ma na avea mulimuli ane o se pule i le faafoega o mea tautupe a le Ekalesia, e fesoasoani i le Ekalesia i le pulea o ana tupe ma aluese ai mai aitalafu. I le tautoulu o le 1838, na siitia atu ai le au Whitney i Sisifo Mamao, Misuri, lea na toe valaauna ai Newel o se epikopo, ma i le 10 tausaga mulimuli ane, na latou sopoia ai ma lona aiga ia laufanua valevalenoa e agai atu i le Aai o Sate Leki, lea sa ia auauna ai o se Epikopo Pulefa-malumalu o le Ekalesia.

Na maliu Newel i le aso 24 o Setema, 1850, i le Aai o Sate Leki ona o se tulaga afaina o māmā.

FAAMATALAGA

- Elizabeth Ann Whitney, ta'ua i le Edward Tullidge, *The Women of Mormondom* (1877), 41–42.
- Joseph Smith, ta'ua i le Elizabeth Ann Whitney, "A Leaf from an Autobiography," *Woman's Exponent*, 15 Aok., 1878, 51.



Dan Jones (1810–62)

Ua silia ma le tasi le miliona faifeautalai ua valaauna talu mai le faatulagaga o le Ekalesia, peitai o Dan Jones na sili atu nai lo le toatasi i se miliona. O le faifeautalai mai Uelese, na saunoa ai Peresitene Gordon B. Hinckley (1910–2008) e faapea, “I le itu e uiga i le aofai o tagata liliu mai, e tatau lava ona aofia ai Dan Jones i faifeautalai e toaono pe a e sili ona faamanuiaina a latou taumafaiga i le talafaasolopito o le Ekalesia.”¹


A o le'i avea o ia ma se faifeautalai, sa malaga ese mai Dan mai Uelese ma agai atu i le Iunaite Setete ma faigaluega ai i le Vaitafe o le Misisipi o se kapeteni i se vaa kalasini na faaigoa o le *Maid of Iowa*, lea na aumaia le toatele o le Au Paia o Aso e Gata Ai i Navu, Ilinoi. Na auai o ia i le Ekalesia i le 1843 ma sa avea ma se uo mamae a le Perofeta o Iosefa Samita.

O le misiona a Dan na faataunuina ai le valoaga mulimuli na tusia e Iosefa Samita. O le po ao lumana le fasiotiga o le Perofeta o Iosefa Samita, sa ia faalogo ai i le papa o fana i fafo atu o le faamalama o le Falepuipui o Karesfasi, o lea na ia filifili ai e moe i luga o le fola. Sa i ona autafa ia Dan Jones. Sa fesili le Perofeta ia Dan pe fefe o ia e oti. Na ia tali atu, “E te manatu, ua oo mai lena taimi? I le i ai i se faomoemoega faapena, e leai so'u manatu e toatele nisi e fefefe i le oti.” Ona vavalou atu

lea o Iosefa, “O le a e toe vaai ia Uelese, ma faataunu le misiona ua tofia i ai oe ae e te lei oti.”²

Na faataunuina le folafolaga a le Perofeta i le 1845, ina ua tofia Dan ma lona faletua o, Jane, e auaua atu i Uelese. Sa faaaoga e Dan lana taleni o le failauga e aoao atu ai le talalelei ma le talitonuga maumaututu. Sa lelei lana tautala i le gagana Uelese ma le Peretania, ma sa tusia e ni molimau e faapea, sa susua lana tautala o lea na mafai ai ona ia faagauai atu lana au faalogologo i ia gagana e lua mo le tele o itula.

Ao i ai Dan i Uelese, sa ia lolomina ni mekasini, tamaitusi, ma tusi a le Au Paia o Aso e Gata Ai i le gagana Uelese. I lalo o le taitaiga a Dan Jones, sa faatuina ai e faifeautalai ni paranesi se 29 ma papatisoina le toeitiiti 1,000 o tagata i tausaga taitasi o lana misiona muamua. Sa



valaauna o ia i se misiona lona lua i Uelese i le 1852, ma e ui i le faatupulaia o le sauaina o le Eklesia, ae pe tusa ma le 2,000 tagata na papatisoina i totonu o le fa tausaga.

I lona toe foi mai i Iuta, na fesoasoani ai Dan i le aumaia i Iuta o le toatele o tagata Uelese na liliu mai i le eklesia. Ina ua maliu o ia i le 51 o ona tausaga, ua ia fesoasoani e aumaia pe tusa ma le 5,000 o tagata i le itu i sisifo o le Iunaite Setete.

FAAMATALAGA

1. Gordon B. Hinckley, “O Le Mea e Sili ona Aoga,” *Liahona*, Mat. 1994, 8; *Ensign*, Sete. 1993, 7.
2. Iosefa Samita, i le *History of the Church*, 6:601.



Mai le agavale: Ata o le faifeautalai Uelese o Dan Jones. O se vaa kalasini, e pei o le vaa na kapetenitina e Dan Jones, o loo agai atu e tutu i Navu, Ilinoi. Na fesoasoani Dan Jones i tagata na faimalaga mai Uelese.

Aoaoina Atu o le ola mama ma le amiomama



Saunia e
Matthew O.
Richardson

Fesoasoani Lua i le
Au Peresitene Aoao
o le Aoga Sa

*E mafai ona
faaaoga e
matua ia
metotia nei e
ono e aoao ai
a latou fanau
e faatatau i
uiga feusuai.*

Ua faamanuiaina lava au ou te feiloai atu i le autalavou ma talavou matutua mai soo se vaega o le lalolagi. Sa i ai se taimi sa ou lauga atu ai i se vaega faapitoa naunautai o le autalavou e uiga i le amiomama, legavia, ma le ola mama. Ina ua uma ona tau atu ia i latou lou fafia tele i manatu sa latou faaalia, tautinoga, foliga, ma amio, sa ou fesili atu, “Na faapefea ona outou malamalamama, ma lagona le to'a ia outou tali, ma maua le toofilemu i se autu maaleale faapenei?” Sa fai mai se tasi o tamaitai talavou e aunoa ma se faatali, “Na aoao mai e ou matua.” Sa lue mai ulu o isi e ioenia. Sa tau mai e lena aafiaga faigofie ae loloto le uunaiga o i ai a matua i olaga o a latou fanau—amaise lava i la latou matafaioi o le aoaoina atu o le amiomama, legavia, feusuiga, ma mafutaga talafeagai.

O le mea e faanoanoa ai, atonu o le toatele o matua e le o lelei le aoaoina o a latou fanau e uiga i faafitauli tau feusuiga. Mo se faataitaiga, i se suesuega o le silia ma le 200 ia autalavou nofofua o toaaga a le Au Paia o Aso e Gata Ai, sa ou iloa ai e na o le 15 pasene sa aoaoina atu patino e o latou matua i ai ni faamatalaga e faatatau i faafitauli tau feusuiga. Na fai mai nei talavou sa aoaoina patino lava i latou e uiga i lenei mataupu taua e uo po o nisi foi tupulaga, le Initonet, ala o faasalalauga, faafiafiaga, tusi, aiga lautele, po o o latou taitai faale-Ekalesia.

Ioe, e le o se mataupu faigofie e aoao atu. Peitai ou te talitonu o matua lava o ni faiaoga sili lea e faamatalaina atu nei mataupu faavae paia. O le a fesoasoani metotia nei ia te oe i le atinaeina o ni mataupu faavae ma faataitaiga faigofie, aoga, ma le tumau e uunaia ai le aoaoina mai ma le aoaoina atu lelei—amaise lava i le aoaoina atu o lau fanau i le auala e ola ai i ni olaga mama ma le legavia.

E tatau ona vave amata le aoaoina atu ma le aoaoina mai. Ua malamalama ia matua o loo aoaoina faalelei a latou fanau e uiga i mataupu tau feusuiga faapea o le toatele o tamaiti ua leva ona feagai ma nei mataupu talu mai lo latou laiti ma e lei faamoemoeina pe fiafia i ai o latou matua faapea ma i latou. O le toatele o tamaiti e amata ona iloa ia faamatalaga i feusuiga i luga o le Initoneti mai le 11 tausaga ma o nisi e laiti ifo. O nofoaga o faafiafiaga, taaloga, faasalalauga, ma e oo lava i ala o faasalalauga faamasani ua matuai faatumulia i ata o feusuiga ma mea le talafeagai.

O nisi o matua e fesili sao mai, “O afea e tatau ai ona ou talanoa atu e uiga i mataupu e fesootai ma feusuiga?” E fuafua lava i tau-saga ma le matua o le tamaiti ma le tulaga e patino i ai. O le a oo mai le taitaiga faaleagaga pe a tatalo ma matauina ma le faaeteete e matua ia amioga a a latou fanau, faalogo i a latou fanau, ma ia faaavanoa se taimi e mafau-fau ai ma fuafua po o afea ae po o a foi mea e aoao atu. Mo se faataitaiga, ou te manatua sa fesili mai lau tama ia te au e uiga i le tino ae faatoa atoa lona lima tausaga. E ui sa i ai sina lagona tau faaletonu, ae sa manino mai lava o se taimi sao lea e talanoa ai. Ae peitai, ao ou mafau-fau i le auala e tali atu ai, sa foliga manino mai e le o se taimi sao lea ou te talanoa ai i lau tama e uiga i mataupu uma e faatatau i feusuiga.

O le aoaoina atu ma le aoaoina mai e tatau ona tupu soo. O le aoaoina o se mea faasolo ae le o se mea e tupu i le taimi e tasi.



A oo i le taimi e aoao atu ai i le fanau ia fesoo-taiga faalefeusaiga po o nisi mea e faatatau i ai, e masani lava ona faapea tagata o se "talanoaga". Po o le a lava le tulaga, ae o le uiga o lenei faaupuga e tatau i matua ona aoao atu lenei mataupu i se talanoaga taitoatasi. O se auala sili lea ona anoa e aoao ai se tamaititi. Sa aoao mai le Faaola tatou te aoao "lea fuaitau i luga o lea fuaitau, ma lea mataupu i luga o lea mataupu" (2 Nifae 28:30). O le a sili atu ona manuia a tatou aoaoga pe a tatou toe asia faatasi ma a tatou fanau le mataupu ao latou tuputupu ae ma matutua. O matua ua malamalama i lenei mataupu faavae ua saunia i latou lava faalemafaufau, faalelagona, ma faaleagaga e aoao atu ia latou fanau ia mataupu e faatatau i feusuaiga i le taimi o laiti pe ua talavou foi a latou fanau.

O le aoaoina mai ma le aoaoina atu ma le lelei e taulai atu lea i le fesootaiga i le va o le faiaoga ma le tagata o loo aoaoina.
Pe a oo i le aoaoina o le fanau e uiga i mataupu tau feusuaiga, o le toatele lava o matua

e toeitiiti lava o taimi uma e popole ai e uiga i *mea* e tatau ona latou talanoa ai. E ui e taua lenei mea, ae e sili atu le loloto o le faia o ni aoaoga anoa nai lo le talanoa e uiga i le mataupu. O le mea moni, o le *auala* o loo uia e matua e aoao atu ai a latou fanau atonu e sili atu le taua nai lo mea semanu latou te ta'u moni atu lava. E lagolagoina e suesuega ia le faaiuga faapea, o matua o loo sili atu a latou uunaiga i a latou fanau pe afai e faatatau lea i mataupu tau feusuaiga o i latou ia o loo faasamasamanoa a latou talanoaga, faaalia le alofa ma le popole, ma o loo gauai atu ma le naunautai i olaga o a latou fanau.¹

O ni manatu faaalia mai la'u sailiiliga faasamasamaona o le autalavou a le Au Paia o Aso e Gata Ai lea o loo taulai atu pea faapea maimau pe ana talanoa saoloto atili mai o latou matua e uiga i mataupu tau i feusuaiga. Sa faaalia mai e nei talavou matutua faapea e le gata i lo latou mananao ina ia faaaofia o latou matua i le polokalama, ae sa latou moo-moo foi ina ia mafai ona "latou talanoa *faatasi*

O matua o loo tele le uunaiga i a latou fanau pe a talanoa i mataupu tau feusuaiga o i latou ia o loo talanoa sao atu, faaali atu le alofa ma le popole, ma o loo auai ma le naunautai i olaga o a latou fanau.

[ma o latou matua] nai lo le latou talanoa mai *ia i latou*.” Latou te moomoo mo ni talanoaga “faamaoni,” “masani,” “toafilemu,” ae le “faapopole tagata.” E tatau ona faaosofia ai matua e lenei mea ina ia galulue malosi i le avea ma e e faigofie ona talanoa atu i ai, ia avanoa, faamaoni, ma e le popole i se mataupu, tulaga, pe oo foi lava i le taimi. Afai ae i ai se tau e totogi ina ia mafai ai e matua ona aoao atu ma le lelei a latou fanau e uiga i mea e sili ona taua, e tatau la i matua ona galulue i ni auala o le a mafai ai ona fesoasoani ia latou fanau ina ia lagona le toafilemu ma le saogalemu pe a talanoa i mataupu uma—aemaise lava ia mataupu e sili ona patino.

O le a sili ona aoga le aoaoina atu ma le aoaoina mai pe afai e talafeagai ma moni le mataupu. E fuafua lava i la tatou auala, ae o le aoao atu e uiga i le fesootaiga tau feusuaiga e mafai ona lagona ai le matamuli, le matantu, leai se faamoemoe, pe ua matele i le lauga atu. O se ki i le manuia o le iloa lea faapea o le tele o fesili ma popolega o i ai a le fanau, o ni tali lea i mea o tutupu ma mea o vaai i ai i le olaga moni. A o tatou nofounta, faalogo, mataituina a tatou fanau, o le a tatou iloa ai mea tatou te manaomia e aoao atu.

Mo se faataitaiga, o ata.tifaga, sitaili, manatu o nei ona po, polokalama a le televise, faasalalauga, po o upu o pese ua tuuina atu ai le tele o avanoa e talanoa ai e uiga i tulaga faatonuina lelei. O le a oo mai nisi avanoa a o tatou mataituina ia fesootaiga ma fegalegaleaiga a a tatou fanau ma isi, o le auala o fai ai a latou ofu faapea ma tagata o a latou tupulaga, o le gagana o loo latou faaaaogaina, o le auala o loo latou faalagolago atu ai i le isi itupa, faapea foi ma le fesuisuiai o le faauigaina o tulaga faatonuina o le legavia ma le ola mama i totolu o le nuu. E anoanoai ia avanoa moni o le olaga e talatalanoa ai *ma le* fanau e uiga i le ola mama ma le amiomama.

Atonu o le vaega e sili lava ona taua e faatatau i le tuuina atu o se aoaoga mai mea moni o le olaga pe a avea matua ma faataitaiga o le legavia, tauagafau, ma le amio-mama i o latou lava olaga. O le a vave ona faalogo ma mulimuli le fanau i fautuaga a o latou matua pe afai e faatatau ia ituaiga fautuaga i faataitaiga lelei a o latou matua.

O le faafeagai e moni foi. Faapei ona saunoa mai Elder

*A o tatou
nofounta,
faalogo,
mataituina a
tatou fanau,
o le a tatou
iloa ai mea
tatou te
manaomia
ona aoao atu.*

Robert D. Hales o le Korama a Apostolo e Toasefululu: “I le tele o itu, e leotetele atu a tatou amioga nai lo a tatou upu. Na aoao mai Peresitene Polika Iaga (1801–77): ‘E tatau ona tatou faia [mo a tatou fanau] se faataitaiga tatou te mananao latou te faataitai ai. Pe o tatou iloaina lenei mea? E masani ona tatou vaai i matua o poloaiina le usiusitai, amio lelei, upu alofa, foliga tausaafia, se leo malie ma se foliga fiafia mai se tamaitiiti po o tamaiti, ae o i latou lava ia e tumu i le ita ma le ote! E matuai le fetau lava ma lē sao lenei meal’ O le a matauina e a tatou fanau nei faiga faafefetau ia i tatou ma atonu o le a latou tauamiontonuina ai lo latou faia o ia foi ituaiga uiga.”²

E sili atu ona aoaoina ia tagata suesue pe a latou malamalamia i mea o loo aoao atu e faiaoga. E toatele naua le autalavou ma talavou matutua ua faaalalia le le fiafia i le faaaaogaina e o latou matua e oo lava i taitai o le Ekalesia o “upu faailo” ma savali e le o manino lea ua tupu mai ai le tele o fesili nai lo tali ma le popole nai lo le toafilemu. E matua moni lava lenei mea pe a oo i mataupu tau feusuaiga.

A o avea au o se epikopo i se uarota a le autalavou matutua nofofua, e masani lava ona fesiligia au po o le a le uiga o le “militino”. Sa aoaoina tagata faamaoni o la’u uarota e le tatau ona latou militino, peitai e lei aoaoina lava i latou po o le a tonu lava le uiga o le militino. Sa faigata ia i latou le tausia o se faatonuga latou te lei malamalamia i ai.

Sa faamalamalamia atu e Peresitene Marion G. Romney (1897–1988), Fesoasoani Muamua i le Au Peresitene Sili e faapea, e le lava le aoao atu i se auala ina ia malamalamia ai isi, peitai e tatau ona tatou aoao atu foi i se ituaiga auala ina ia leai se tasi e le malamalamia.³ Nai lo le talanoa atu i upu faailo po o ni vaogagana faavaivao, ae o le a sili ona faamanuiaina i tatou pe afai tatou te faaaaogaina ia faa-upuga sao ma talafeagai. O lenei mea e uunaia ai le malamalamia ma atiina ae ai le faaaloalo.

Mafaufau i le auala na aoao atu ai ma le faamanuiaina e Elder Richard G. Scott o le Korama a Apostolo e Toasefululu ia mataupu faavae ma tulaga faatonuina o le ola mama. Na saunoa o ia: “Soo se uiga feusuai lava i fafo atu o noataga o le faaipoipoga—o le uiga o la’u tala, soo se taumafaiga lava e fesootai atu i itutino sa o le tino,



tusa pe o fai ni lavalava pe leai foi—o se agasala ma e faasaina e le Atua. O se agasala foi lou taumafai e faaosofia nei lagona i lou lava tino.”⁴

Ina ia aoao atu ma le anoa, e tatau ona tatou mautinoa o loo malamalama i latou o tatou aoao atua i le savali. O fesili faigofie e pei “O le tali lea o lau fesili?” po o le “Na lelei lou faamatatalaina atu?” po o le “E i ai nisi au fesili?” e aoga tele.

E liua le au suesue pe a fesootai e faiaoga ia savali ma mataupu faavae ma tulaga faatonuina o le faavavau. Nai lo le taulai atu i na o mea e patino i “mea moni o le olaga,” o le a tulai ae ni aoaoga taua o le talalelei pe a tatou faafesootaia na mea moni ma “mea moni o le ola e faavavau.” Mo se faataitaiga, pe a talanoa e uiga i o tatou tino, e mafai ona tatou talanoa e uiga i le auala na foafoa ai e se Tama Faalelagi alofa o tatou tino ma le auala e tatau ona tatou taulimaina ai ma le faaaloalo Ana foafoaga e tusa ai ma Ona faamoemoega.

Ao gotouga ifo le lalolagi i le ola le mama,

o loo i ai lava le faamoemoe mo le tupulaga o le humanai. E taulai atu lenei faamoemoe i le tuuto atu o taumafaiga sili a matua i le aoaoina o le tupulaga faiae ina ia amiomama ma ola mama. O matua o loo aoao atu a latou fanau ina ia amiomama ma ola mama o loo taumafai e faatele lo latou malamalama ma faalelei o latou tomai faafaciaoga. O le faia o lenei mea, ua latou iloa ai “o le a faalauteleina e le Alii [i latou] e aoao atu ai i le ala ua Ia poloaiina.” O le mea moni lava, “o le galuega [lenei] o le alofa—o se avanoa e fesoasoani ai i isi e faatino lo latou saolotoga amiontonu, ia o mai ia Keriso, ma mauaina faamanuia ga o le ola faavavau.”⁵ ■

FAAMATALAGA

1. Tagai Bonita F. Stanton ma James Burns, “Sustaining and Broadening Intervention Effect: Social Norms, Core Values, and Parents,” i le *Reducing Adolescent Risk: Toward an Integrated Approach*, ed. Daniel Romer (2003), 193–200.
2. Robert D. Hales, “O Lo Tatou Tiute Faamatua i le Atua ma i le Tupulaga Faiae,” *Liahona*, Aok. 2010, 74.
3. Tagai iā Jacob de Jager, “Let There Be No Misunderstanding,” *Ensign*, Nov. 1978, 67.
4. Richard G. Scott, “O Fesili Tuga, ma Tali Moni,” *Liahona*, Sete. 1997, 31.
5. *O Le Aoao Atu, E Leai Se Isi Valaauga E Sili Ai* (1999), 4.

Atonu o le vaega e sili lava ona taua e faatatau i le tuuina atu o se aoaoga mai mea moni o le olaga pe a avea matua ma faataitaiga o le legavia, tauagafau, ma le amiomama i o latou lava olaga.

Aoaoina Atu OLE AMIOTONU ILE AIGA

O se tiutetauave ma se faamanuiaga mo matua le aoao ma saunia a latou fanau ina ia ola amiontonu.



**Saunia e
Elder Delbert L.
Stapley (1896–1978)**

O Le Korama a Apostolo e Toasefululua

Sa fanau Delbert L. Stapley i le aso 11 Tesema, 1896, i Arizona, ISA. Sa vaetofia o ia e avea ma se tasi o le Korama a Apostolo e Toasefululua i le aso 5 Oketopa, 1950, ma galue ai i lena korama seia oo ina maliu i le aso 19 Aokuso, 1978. Sa tuuina atu lenei saunoaga i le faigalotu a le Iunivesite a Polika Iaga i le aso 1 Fepuari, 1977. E manua le saunoaga atoa lenei i le gagana Peretania i le speeches.byu.edu.

Ua i ai i matua le avanoa e aoao ai ma mamamuina ai ia uiga o a latou fanau laiti ao lei maua e Satani le mana e faaosooso ai i latou ma a o lei oo i le valu o o latou tausaga, e tali atu ai i latou lava i luma o le Atua. . . . Ua tuu atu e le Alii i matua nei tausaga taua, o uluai tausaga o le olaga o se tamaitiiti, lea e le mafai ai e le fanau ona tali atu mo ia lava i mea latou te tautatala ai ma faia. O se tiutetauave ma se faamanuiaga mo matua le aoao ma saunia a latou fanau ina ia ola amiontonu.

O le auala sili ona lelei e aoao atu ai le amiontonu ma le tapuaiga i totonu o se aiga o le faia lea o se faataitaiga. E faamoemoe, o le a tausia e matua o latou lava olaga i le

lelei ma mama ina ia mafai ai ona avea o latou olaga ma se faataitaiga aoga e aoao ai ma saunia ai a latou lava fanau. [Sa aoao mai Peresitene Tavita O. MaKei (1873–1970) e faapea:] “Afaf o le a e aoaoina atu le faatuatua i le Atua, ia faaali atu lou lava faatuatua ia te Ia; afai o le a aoaoina atu le tatalo, ia tatalo oe lava; . . . afai e te faatoofilemuina i latou, e tatau la ona e aloese mai le lē lava papale; afai e te tuua lau tama ina ia ola i se olaga o le amiomama, loto pulea, tauleleia, ia faia la se faataitaiga lelei o nei mea uma mo ia.”¹ O lou faia o lena mea o le a atili lofituina ai lau fanau i nei aoaoga; ma o lo latou mauaina o lea ituaiga taitaiga mai matua, o le a faamalolosia ai i latou e tetee atu i faaososoga a Satani, lea ua avea ma ana sini le faataumaoia o o latou olaga pe a latou ausia le tausaga latou te tali atu ai mo i latou lava. Ua i ai i matua le tiute ina ia avea ma tagata latou te mananao e avea ai a latou fanau e faatatau lea i le faaaloalo, faamaoni, loto pulea, ma le lototoa e faia le mea sao i taimi uma. E sili atu ona malosi le faataitaiga nai lo le mataupu.

Ua tatau ona ogatasi ia olaga o le aiga i aso uma ma mataupu faavae ma tulaga faatonuina o la tatou Ekalesia. E tatau ona tutusa a tatou fegalegaleaiga faapisinisi ma la tatou tapuaiga. E vave lava ona matau e tamaiti le tulaga lē faamaoni. Fai mai John Milton o le faagutugutulua ua na o le pau lea o le agasala e le iloa vagana ai le Atua. Ae peitai, e iloagofie e le fanau ia ni mea sese, ma e latou te le fiafia i le le faamaoni ma uiga faafoliga pepelo. Tatou te iloa e sili atu ona aafia le fanau i auala o tatou ola ai nai lo le auala o loo tatou talai atua. E tatau lava ona faamaoni matua ia latou fanau, faamaoni i folafolaga sa latou faia ia i latou ma tautala i le sao i taimi uma. O le matua faamoemoeina e



mauaina le faatuatuaga a lona alo. Afa i e lagona e se tamaitiiti e te aloaia lona faatuatuaga [ia te oel] ma e te toe tauia atu lena lagona, na te le solia lena mea, pe tauleagaina lou igoa. . . .

E le tatau i matua ona tauaimisa i luma o a latou fanau. O nisi o taimi e tutupu feesese-e-aiga ona o se taumafaiga e faasao pe faatonu se tamaitiiti. E faitio le tasi matua; ae tetee le isi. Ma o se taumafaiga ina ia faalotogatasia le aiga, i le vaaiga a le tamaitiiti, ua leai se aoga. E tatau ona lotogatasi ia matua i le iloaina po o fea le auala latou te mananao e ui ai se tamaitiiti; a le o lea, e mafai ona uia e le tamaitiiti ni auala sese ona o le le mautonu. Fai mai Richard L. Evans: "O le fevaevaeai i le va o matua e sese ma le mautonu ma e faavaivaia ai le faavae o le aiga. E tatau ia i latou o e taulai atu i ai se tamaitiiti mo se taitaiga ona lotogatasi i le taitaiga latou te tuuina atu."² Tatou te iloa e maaleale lagona o tamaiti i uiga ma lagona o le aiga; latou te maua le lagona popole ma le feesesesei lea e le mafai lava ona latou malamalama i ai pe faauigaina. . . .

E i ai le aia a le tamaitiiti e lagonaina ai faapea o loo i ai se nofoaga o le malutaga i lona aiga, o se nofoaga o le saogalemu mai mafatiaga ma amioleaga o le lalolagi i fafo. E manaomia e le aiga le lotogatasi ma le

faamaoni e aumaia ai lenei manaoga. E leai se isi nofoaga e pei o le aiga lea e maua ai le fiafia ma le faavavau moni i lenei olaga. E mafai ona avea le aiga e pei o se vaega o le lagi; e moni, ou te vaai faalemafaufau i le lagi o se faaauauga o le ituaiga olaga sili faaleaiga i lenei fogaeleele.³ . . .


O le talalelei e pei ona tatou aoaoina atu e moni. O loo soifua Keriso, o loo soifua le Atua, ma o loo saunia ni maota matagofie i luga mo Ana fanau uma faamaoni ma tuuto. Fuafua nei i le ituaiga fale ma aiga e te moo-moo i ai ma pe faapefea ona e taulimaina ia manaoga o lau fanau ina ia latou tumau ai i le ala amiontonu lea o le a taitaiina atu ai le aiga i le ola e faavavau i se aiga selesitila. Ia faamanuiaina outou uma e le Atua, ou uso e ma tuafafine. Ou te manatu ua mafai ona outou malamalama o le tele o mea ua talanoaina e faatatau ia te outou. Ma o le faatulagaina ma le faaalualu i luma o lou aiga i se tulaga paia ua matuai taua tele i tagata talavou o e ua o mai e faamanuia o outou olaga. ■

Ua laugatasia mataitusi tetele ma faailoga.

FAAMATALAGA

1. David O. McKay, *Secrets of a Happy Life*, comp. Llewelyn R. McKay (1967), 11.
2. *Richard Evans' Quote Book* (1975), 23.
3. Tagai David O. McKay, *Gospel Ideals* (1953), 551.

*E i ai le aia a
le tamaitiiti e
lagonaina ai
faapea o loo i ai
se nofoaga o le
malutaga i lona
aiga, o se nofoaga
o le saogalemu
mai mafatiaga
ma amioleaga o
le lalolagi i fafo.
E manaomia e le
aiga le lotogatasi
ma le faamaoni e
aumaia ai lenei
manaoga.*



FESOASOANI I LE AUTALAVOU IA MAUA NI AAIFIAGA FAALEAGAGA

E leai se tasi e mafai ona faamalosia le autalavou ina ia maua ni aafiaga faaleagaga, peitai ua iloa e nei matua ma taitai, e tele mau auala e tausia ai ni aafiaga lea e mafai ona taitaiina atu ai i le liua.

Ina ua amata ona sailili ia Vyacheslav ma Zoya Gulkو o Iukureini i le Ekalesia, e lei fafia le la tama teine e 13 tausaga o, Kira. Sa musu o ia e auai i lesona a faifeautalai, ma pe a ia iloa o loo o atu ia faifeautalai i lo latou fale, na te “tapunia lelei le faitotoa o lona potu,” na manatua ai e lona tina.

Na masalosalo ia Brother ma Sister Gulkо, o e na filifili e auai i le Ekalesia, afai e mafai ona la tuuina atu se avanoa ia Kira ia lagona ai le Agaga, atonu o le a ootia lona loto. Aua na amatalia foi le molimau a Sister Gulkо ina ua ia auai i le papatisoga o se isi tagata, sa ia fai atu ia Kira e sau i *lona* papatisoga—ina ia fesoasoani ia te ia e sui i ona ofu magao pe a uma. Sa te’i Sister Gulkо, aua sa ioe Kira.


“Na tupu!” Na manatua e Sister Gulkо. “Sa galue le Tama Faalelagi i se auala faavavega.” Na lagona *moni* lava e Kira le Agaga, ma i se

vaiaso ina ua uma le papatisoga a ona matua, sa malie o ia e feiloi i faifeautalai. Sa amata ona ia faitaua le Tusi a Mamona. O nai vaiaso mulimuli ane, sa iloa ai e Sister Gulkо se fasi pepa o tautau mai luga o le kesi a Kira; sa tusia ai ni upu mai le 2 Nifae 2:25. O le lua ma le afa masina talu ona mavae lo laua lava papatisoga, sa auai ai loa le au Gukos i le papatisoga a le la tama teine. O le taimi nei, ua 20 tausaga ua mavae, ua faaipoipo ia Kira. Ua uma ona faamauina i laua ma lona toalua o Dave i le malumalu, ma o loo la tausia le la fanau tama e toalua i le talalelei. Sa ia galue ma le faamaoni i ni tofiga ma o loo toaga i le Ekalesia.

O lena aafiaga, fai mai Zoya ua ia aoaoina se lesona taua e faatatau i matua ua leva ona avea ma tagata o le Ekalesia mai o latou olaga atoa ma e faapea foi mo ia ma lona toalua o ni tagata fou o le ekalesia: e le mafai e matua ma taitai ona faamalosia a latou fanau i le talalelei, peitai e *mafai* ona latou valaaulaina i latou i nofoaga ma amatalia ni aafiaga lea e mafai ai e le autalavou ona maua ni aafiaga faaleagaga mo i latou lava. E mafai e na aafiaga ona oo atu ai ina liua.

Peitai o fea tonu lava le auala sili e amatalia ai nei ituaiga aafiaga? Ua faasoa mai e matua ma taitai mai le salafa o le lalolagi mea na aoga mo i latou.

*Ia faafesootai ia faataitaiga o aso nei i le afioga
a le Atua ma i olaga o le autalavou.*



Avatu i le Autalavou ia ni Avanoa e Auauna Atu Ai

O le Uarota a Granja Viana o le Siteki a São Paulo Pasila Cotia e maualuga lava le tulaga o gaoioiga a alii talavou. Peitai na iloa e o latou taitai o nisi o i latou o loo feagai ma ni luitau patino ma o loo i ai ni faafitauli i le faataunuina o o latou tiute faaleperisitua.

Ina ua mavae ni fonotaga tuufaatasi a le au epikopo ma taitai o Alii Talavou, sa latou fuafua loa e taulai atili atu a latou gaoioiga i auaunaga ae faaitiitia ia mea faafafia po o mea e talie ai. Na aofia ai i i le asia o tagata o le korama ua le o toe toaaga mai, auai i talaiga faatasi ma faifeatalai faamisiona, ma le tufatufaina atu o le faamanatuga i tagata o le uarota o loo faataotolia i totonu o aiga. O nei gaoioiga na tuuina atu ai se avanoa i alii talavou e galalue ai i ni mataupu faavae sa latou aoaoina i le seminare ma Aso Sa (tagai i le 2 Nifae 2:26).

I le aluga o taimi, "sa faia e nei gaoioiga faaleagaga se eseesega tele," o le lipoti

mai lea a se tasi o taitai perisitua.

"Sa matou tetei i se Aso Sa anapogi faapitoa, na molimau uma ai lava a matou alii talavou," o lana tala lea. "Ma latou faia, o le toatele o i latou na toe manatuaina ma loi-mata le agaga lelei sa latou lagonaina i lena taimi. Sa faasoa mai e se tasi alii talavou se lagona ina ua avatu le faamanatuga i se tagata matua o le uarota o lē ua tolu tausaga o faataotolia i le moega. O lona toalua, o se tamaitai faamaoni, sa taliaina o matou alii talavou i le fiafia ma le faamoemoe. Ina ua uma le sauniga, sa ia faasoaina atu ia i latou le lagona fiafia sa ia maua i lona olaga ona o le talalelei e ui i faafitauli ma luitau tetele sa feagai ma ia. Sa latou faalogoina le Agaga ma iloa ai le eseesega e faia e le talalelei i olaga o tagata. Sa matuai malosi lava lenei aafiaga o le a latou manatuaina pea mo nisi tausaga a sau—pe atonu o o latou olaga atoa."

Sa ia iloa e na te lei vaiai muamua lava i sea ituaiga tali mai mai soo se "taalogia lakapi po o po malie o le Mutualie." Nai lo lena, sa ia fai mai, sa aoaoina o ia e lenei aafiaga i le taua o le uunaia o ituaiga aafiaga ia e mafai ai e le autalavou ona lagonaina le Agaga.

"E taua ia gaoioiga faamasani," sa ia faa-auau mai ai. "Peitai o aafiaga faaleagaga e taua tele e fesoasoani ai i le autalavou e atiina ae ai a latou lava molimau."

O Aso Sa taitasi i le Uarota a Rennes, Siteki a Angers France, e saunia ai e Sister Delphine Letort, o le peresitene o Tamaitai Talavou, se kata mo tamaitai talavou taitasi o loo auai ma fai atu ia te ia e filifili se uo e le o auai i le lotu e tusi i ai. Sa tusia e tamaitai talavou e uiga i le lesona o lena vaiaso—mea sa latou aoaoina po o mea sa musuiaina i latou—faapea foi ma se tamai tusi faamasani ma patino. Ona auina atu lea e Sister Letort po o se tasi o ona fesoasoani o kata i le meli ia i latou e lei auai mai i le lotu.

Sa faigofie le gaoioiga ae sa aoga, o lana tala lea, e le gata sa avea ma se auala mo i latou e lei auai mai ina ia latou iloa ai sa

*Faaaoga ia upu a perofeta soifua faapea
foi ma perofeta anamua e aoao atu ai.*

manatuaina i latou ae o se auala foi mo i latou sa tusia ia tusi ina ia mafaufau atili le tasi i le isi.

“O mea laiti ma faatauvaa e faataunu ai mea tetele,” o lana tala lea (tagai i le Alema 37:6). “Ua tatou vaai i ai o faaalia mai. Sa faamalosiauina ia tamaitai talavou, ma o lenei aafiaga sa saofaga atu i le faateleina o a latou molimau.”

Faafesootai le Autalavou ma le Afioga a le Atua

Sa aoao atu Alema faapea sa i ai i le talai atu o le afioga a le Atua se uiga malosi (tagai i le Alema 31:5). Sa iloa e David Elmer, o se taitai o Alii Talavou mai Texas, ISA, lenei mea ma sa manao e tuu atu i alii talavou sa ia taitaiina i se malaga faa-Sikauti e tumu i gaoioiga se aafiaga aoga e mafai ona fesoasoani e saunia i latou mo le lumanaí.

Sa mafaufau ma le agaga tatalo ia Brother Elmer po o a mea e mafai ona ia faasoa atu ma lagonaina e faatatau i se lauga a Elder Neil L. Andersen o le Korama a Apostolo e Toasefululua. I le malaga, sa aoao atu Brother Elmer mai lena savali, e aofia ai le tala na faamatala e Elder Andersen ia Sidney Going, o se tama taalo iloga o le lakapi a Niu Sila lea sa tuu lana matata o le taalogia ae auauna atu i se misiona. “O a outou misiona o le a avea ma se avanoa paia e aumai ai isi ia Keriso ma fesoasoani ai e saunia mo le Afio Mai Faalua o le Faaola,” o le saunoaga lea a Elder Andersen.¹

Sa mamana lenei aafiaga, o le tala lea a Brother Elmer, aua sa ia aoao mai upu a se perofeta soifua. I le faaiuga o le faigalotu, sa tofu saini uma igoa o alii talavou ma taitai i polo lakapi e avea ma se folafolaga e auauna atu faafaifeatalai faamisiona ma sa avea foi ma se faamanatu mautu i mea na latou aoaoina ma lagonaina. O le toatele o tama ma taitai e lei momoe i lena po sa latou talatalanoa ma alii talavou e uiga i auala na aafia ai o latou olaga i a latou misiona.

“O lo tatou Atua e patino; Na te silafia Lana autalavou,” o le tala lea a Brother Elmer. “Na te silafia o tatou olaga ma luitau ma mea o loo tutupu i nei tamaiti. E te leiloaina lava pe o faapefea ona Ia galue i o latou olaga. O lea, o i tatou o taitai o loo saunia ma tuuina atu se siosiomaga mo i latou e lagona ai le Agaga. E mafai ona outou faia lena mea e ala atu i tusitusiga paia ma e ala atu i upu a perofeta, ae o le Alii, e le o i tatou, o loo galue i totonu o o latou loto.”



Ia Faifai Pea

Fai mai Brother Elver e manao o ia ia manatua e alii talavou se isi foi mea e uiga i le malaga: ia faifai pea a latou suesuega faaletalalelei.

“Sa ou lagona o lena vaega o lou tiutetauave o le tuuina atu lea ia i latou o ni aafiaga e lagona ai le Agaga, ma afai ou te manao ia tupu, e tatau ona faia lau vaega e fuafua i ai,” na ia fai mai ai. Elder David A. Sa aoao mai Bednar e uiga i le fatuina o ni mamanu faaleagaga i o tatou olaga, mamanu e pei o le suesue i tusitusiga paia ma le tatalo ma afiafi faaleaiga.² Ma ao matou o ese i lena vaiaso, sa faatumauina a matou mamanu faaleagaga. Sa faia a matou tatalo o se vaega. Sa matou tofia ni alii talavou e faia fai-galotu e 10 minute i le taeao, ae saunia e o latou taitai ma tamā ia faigalotu mo le afiafi.

“O le manatu sa i ai e ui lava sa matou o ese mai o matou aiga ma sa ese le matou gaoioiga mai isi gaoioiga masani, ae sa lei motusia lava a matou mamanu faale-agaga. Atonu o loo manatua pe e le o manatua foi e alii talavou ni lesona faapitoa, peitai ou te faamoemoe o le a latou manatuaina le mamanu sa matou faatumauina i le faia o faigalotu ma tatalo ma suesuega o tusitusiga paia.”

E iloa foi e Myra Bocobo Garcia mai Filipaina le taua

Saili ni taimi masani faafafaiaoga i gaoioiga o aso uma.



o le faifai pea, ma na te iloa o le aoao atu e amata i le aiga. O Sister Garcia ma lona toalua o, Edwin, e toatolu le la fanau tama ae toaono ia teine e amata mai le 8 e oo i le 22 tausaga, ma e faaaofia uma lava i latou taitasi i gaoioiga lelei eseese. E ui o le uiga o lena mea e tofu lava le tagata ma lona auala e ui ai, ae o loo galulue malosi lava le aiga ina ia aai faatasi pea i le aiga o le afiafi.

“O le kukaina ma saunia fafia ma aai faatasi o se tasi lea o auala sili ma te faapoto-potoina ai le ma fanau,” o le tala lea a Sister Garcia. Na te iloa o le taimi o meaai o se taimi lea e toe faafou ai, fesootai ai le tasi i le isi, ma faafetai atu ai i faamanuiaga a le Alii.

Soso Atu i Avanoa o I Ai ina ia Aoao Atu ma Faalogo

O Jocelyn Fielden mai Nova Scotia, Kanata, na fai mai o lesona sili ona taua sa ia aoaoina mai le tausiaina o se fanau e toaono, lea e faa-solo mai le 20 e oo i le 30 tausaga, na mafua mai ona sa le gata ina aoao sao atu ae sa

“fausiaina (foi) se siosiomaga lea e mafai ai e le fanau ona latou aoaoina i latou lava e uiga i upumoni.”

“Aua e te vave faia ni a latou filifiliga pe tali uma foi a latou fesili,” o lana tali mai lea. Nai lo lena, sa ia fautua mai le taiatalaina o le fanau “i tusitusiga paia po o fautuaga mai o tatou perofeta mo le taitaiga ma tali.” Sa ia faaopoopo mai, “Ma ia sauni e talanoa i mea sa latou mauaina.” O se faaopoopoga, pe a ia maua ni fesili mai lana fanau, e na te taliina i nisi taimi e ala i le fesili atu o sana lava fesili: “O le a se mea e te manatu e tatau ona e faia?”

“Ia maua le faatuatuaga o le a latou faia ni filifiliga sao,” o lana tali lea. “Afai tatou te fesoasoani ia tatou fanau ina ia aoao ia iloa le Agaga i o latou olaga i le aluga o le tele o aoaoga faapitoa lea tatou te faia ma i latou i aso uma, ma pe a latou iloa pe faapei le lagona o le Agaga, o le a avea lea ma se auala latou te saili ai mo nisi aafiaga faaleagaga, ma o le a faamalolosia ai a latou molimau e uiga i le tulaga moni o lo tatou Tama Faalelagi ma Lona Alo o, Iesu Keriso. O le a tulai mai ai se taunuuga galugalu: o le faatele ona latou lag-naina o le malamalamama ma le mafanafana o loo aumaia e le Agaga, o le faatele foi lea ona latou moomoo ma tauivi ina ia faia ni mea o le a atili faateleina ai le Agaga i o latou olaga.”

E vave lona faasino maia faapea o mataupu faavae sa aoga i le olaga faaleaiga mo ia o mea na o loo aoao soo atu e taitai o le Eka-lesia. Mo se faataitaiga, fai mai a ia e ui o nisi o aoaoga e mafai ona tupu i le taimi o talatalanoaga aloaia e pei o mea ia o loo tutupu i afiafi faaleaiga, suesuega o tusitusiga paia faaleaiga, ma le tatalo faaleaiga, o le a mafai e matua ona taiatalaina le Agaga ina ia vaavaai mo ni taimi faapitoa e aoao atu ai.³

“O le o e savalivali, aveina o se taavale i gaoioiga, togina o nai mama [taaalo pasike-tipolo], faia o ni ‘aiga faaleaiga, galulue faa-tasi, pepese, ma feauaunaai le tasi i le isi, o nisi nei o nai gaoioiga lea o loo aoaoina atu ai le talalelei i totonus o o tatou aiga,” sa ia fai

O Le Auala na Ou Tumau Malosi ai i le Talalelei

Saunia e Tua Rogers

Sa ou papatiso ina ua 12 o'u tau-saga, ma mo le tele o tausaga sa na o au lava le tagata o le Ekalesia i lou aiga. E lei faigofie i taimi uma lena mea, peitai sa faamanuiaina au i ni tai-tai lelei o e sa fesoasoani ia te au i lau malaga o le aoaoina o aoaoga faavae o le talalelei ma faaaoga na aoaoga faavae e faamalosia ma faaleleia ai lou olaga. Ona o lau faaiuga ina ia ou faamaoni i mea sa ou talitonu i ai, ua ou vaaia ai ni faamanuiaga maoae ua oo mai i lou olaga ma, i se taimi mulimuli ane, i olaga foi o tagata o lou aiga.

O nisi nei o mea na fesoasoani ia te au ina ia ou tumau malosi ai:

- Faalatalata atu i le Tama Faalelagi e ala i gaoioiga e pei o le tatalo ma suesuega i tusitusiga paia. O loo silafia e Ia tulaga o loo feagai ma i tatou. O le tumau latalata atu ia te Ia na fesoasoani lea ia te au ou te manatua ai po o ai au.
- Mulimuli i fautuaga a taitai o le Ekalesia. Ua ou vaaia i lou lava olaga le moni o fautuaga mai perofeta ma apostolo.
- Ia iloa o le ola ai i le talalelei o le a fausia ai se olaga sili atu i le taimi nei faapea ma le faavavau. Na fesoasoani lenei mea ia te au e faatumauina ai ou tulaga faatonuina ma le faatuatua. Na

faamalosiauina au e taitai ina ia ou alu i le malumalu, lea na fesoasoani ia te au i se vaaiga faalemafaufau o le ola e faavavau.

- Ia siosiomia oe e ni uo lelei o e tutusa o outou tulaga faatonuina. Sa faamanuiaina au i ni uo lelei o e sa faigofie ai ona faia ni filifiliga lelei ma tausisia ai lo'u faatuatua.
- Ia tumau lou latalata i lou aiga. Sa ou alofa i lo'u aiga ma manao e fausia ni sootaga malolosi ma i latou.
- Ola ai i le olaga. Mulimuli i tulaga faatonuina ma auai e faatino polokalama a le Ekalesia. O le a latou fesoasoani ia te oe e faalia le faatuatua ma faia ai ni filifiliga lelei. O filifiliga lelei e tele lava ina faafaigofie ai le olaga, ma e masani lava ona maua ai se olaga fiafia.

mai ai. "O le talatalanoa e uiga i mataupu o le talalelei e tele lava ina tupu i se auala masani pe a tatou taulai atu i isi gaoioiga."

Galulue Faatasi agai atu i se Sini Laugatasia

I se taimi puupuu lava ina ua uma ona faauu mai le Iunivesite o Polika Iaga-Hawaii, sa toe foi ai KaYan Danise Mok i lona aiga i Hong Kong ma maua ai se valaauga e avea ma peresitene o Tamaitai Talavou. Ao tatou toe faamasani i le i ai i le aiga, amatalia o se matata faigaluega, ma faaaauau ai pea ia isi aoaoga, sa ia tatalo ai ma le nau-nautai mo se uunaiga e fesoasoani ai i tamaitai talavou o loo latou galulue faatasi ina ia atiina ae ni molimau e saunia ai i latou mo le lumanai.

I se tasi Aso Sa ao ia aoao atu e uiga i se vaaiga faavavau, sa musuia ai Sister Mok e faitau le Tusi a Mamona ma se tamaitai talavou faapitoa, lea sa na o ia lava sa i ai i le lotu i lena aso.

"Sa vave ona matou tali atu ma ou fesoasoani e ala i le faatutuina o ni sini e faamaea ai le Tusi a Mamona faatasi o se au ma le tamaitai talavou," o le tala lea a Sister Mok. "Sa ia taliaina le lui e aunoa ma se faatali talu ai ona o le a matou tauva uma faatasi i le sini."

Talu mai lena taimi, sa faatuina e Sister Mok, ona

fesoasoani, ma lenei tamaitai se "polokalama faauo" i luga o le Facebook ma e auala atu i feau feaveai i telefoni e faamanatu ai i le tasi le faitauina ma le fefasoai ma isi o mea sa latou aoaoina.

Fai mai Sister Mok sa ia vaaia se faamaoniga o le suiga ofoofogia i le olaga o lenei tamaitai talavou e mafua mai ana suesuega i tusitusiga paia. Ma ao faitauina e Sister Mok ia tusitusiga paia i ana malaga o aso uma i le nofoaafi, sa ia mauaina ai foi ni faamanuiaga mo ia lava. "Sa ou lagonaina foi le Agaga ma maua tali o au tatalo ao faaaauau pea ona ou agai atu i luma i le olaga," sa ia fai mai ai.

"I lo'u aafiaga, sa popole ma lagona le le mautonu e nisi o le autalavou pe mata latou te mauaina se molimau ma maua se aafiaga faaleagaga e pei ona maua e isi," sa ia fai mai ai. "E ala i le galulue faatasi, ua matou faamautinoa atu ai i latou i a matou faatinoga e aoga lenei mea ma o loo matou i ai iina e lagolagoina i latou i laasaga uma." ■

FAAMATALAGA

1. Neil L. Andersen, "Sauniaina o le Lalolagi mo le Afio Mai Faalua," *Liahona*, Me 2011, 50.
2. Tagai David A. Bednar, "Ia Matua Maelega ma Mafaufau i le Aiga," *Liahona*, Nov. 2009, 17–20.
3. Tagai, mo se faataitaiga, Robert D. Hales, "O Lo Tatou Tiute i le Atua: O Le Misiona a Matua ma Taitai i le Tupulaga Faia'e," *Liahona*, Me 2010, 95–98; David A. Bednar, "Ia Matua Maelega ma Mafaufau i le Aiga," *Liahona*, Nov. 2009, 17–20.



Saunia e Elder
Paul B. Pieper
O Le Fitugafulu

O LE TUSI A ALEMA: LESONA MO **LE ASÓ**

Sa onosaia ma le faamaoni e tagata sa Nifae ia faigata o o latou aso ma na avea ma se molimau faapea o le a tuuina atu e le Alii ni faamanuiaga ma le puipuiga tatou te manaomia ina ia faafetaiaia ai ma le manuia ia luitau o o tatou aso.

Ole faaiuga o lana nofoaiga, sa tuuina atu ai e le Tupu o Mosaea se fuafuaga ina ia suitulaga le puleaga tau tupu i faamasino e filifilia e tagata. O lea faiga sa faavae i tulafono a le Atua ae faatautaia e faamasino na filifilia e tagata.

O le mataupu faavae o le faitalia o le faavae lea o le faiga lea sa tuuina atu—o tagata taitoatasi, nai lo se tupu, o le a taliaina le tiutetauave ma le tali atu ina ia galue e tusa ai ma le tulafono. Ona “e le masani ona manao le leo o le nuu i soo se mea e le talafeagai ma le mea sao” (Mosaea 29:26), o le a saunia e lenei faatulagaga le lelei o le puipuiga mo aia tatau a tagata ma le amiotonu tuufaatasi o le nuu.

O le tali atu i le fuafuaga a Mosaea, “na oso le naunau tele [o tagata] ia maua e tagata taitoatasi le avanoa tutusa i le laueelele atoa; ioe, ma sa faaali mai e tagata taitoatasi lona lava loto malie e tali mo ana lava agasala” (Mosaea 29:38).

O loo i ai i le tusi a Alema le talafaaso-loipo o tagata i le aluga o le vaitau e 40 tausaga ina ua mavae ona talia e tagata le faatulagaga na fautuaina atu. O mataupu mulimuli o faamaumauga a Alema, mataupu 43 i le 62, o loo toe ta’ua ai se periota o le mamafa o luitau ma tofotofoga. I le aluga o lenei vaitau puupuu e 19 tausaga, sa feagai ai tagata ma ni luitau faaupufai i totonu lava, taufaamatau mai fafo, ma sa toetoe ina tau taimi uma.

Na faalua ona taufaamatau le pulega faalemalu i totonu lava e ni alii o e na saili e faatu i latou lava e avea ma tupu ma aveesea mai ai ia aia tatau mai tagata e filifili ai o latou taitai ma tapuai saoloto ai. I lena lava taimi, sa puipuia ai e tagata i latou lava mai osofaga e tele mai fafo a tagata sa Lamana o e na naunau ia faataumaoia le malo o tagata sa Nifae ma aumai sa Nifae ia nofopologa.

O le faaletonu o le tamaoaiga o nei luitau e tele, e ui e le o ta’ua patino, ae sa avea ma



*E ala atiu i o latou
luitau uma, sa
mafai ai e tagata
sa Nifae amio-
tonu ona maua
le malosi mai
le iloaina o loo
latou galulue ma
ni faamoemoega
talafeagai ma
tatau ai. O lo latou
pogai moni lava o
“le puipuia lea o
i latou lava, ma o
latou aiga, ma o
latou laueleele, lo
latou atunu, ma
a latou aia, ma la
latou tapuaiga.”*

se luitau maoae mo tagata. O Mamona i le tuufaatasiga o faamaumauga paia, na uunaia ina ia saunia se faamatalaga auilili o lenei vaitau. O le mea moni, sa ia saunia se faamatalaga auiliili e faapena foi mo le vaega o totoe o le 1,000 tausaga o le talafaasolopito o sa Nifae, o le a aofia i le Tusi a Mamona le silia ma le 2,500 itulau!

Sa aoao mai e Peresitene Ezra Taft Benson (1899–1994) e faapea:

“O le Tusi a Mamona . . . ua tusia mo o tatou vaitaimi. Sa lei maua e sa Nifae lenei tusi; faapea foi sa Lamana anamua. Na faatatau lava mo i tatou. . . . Sa otootoina [e Mamona], i lalo o musumusuga a le Atua, le tele o talafaamaumau na tusia i le tele o seneturi, ma sa ia filifili mai tala, ma timaiga, ma mea na tutupu e aoga ia i tatou. . . .

“E tatau ona tatou fesili ifo soo ia i tatou lava, ‘O le a le pogai na musuia ai e le Alii ia Mamona (po o Moronae po o Alema) ia tuu lena mea i le tusi? O le a se lesona e mafai ona ou aoaoina mai lena mea e fesoasoani ia te au ou te ola ai i nei ona po?’”¹

O le taimi nei ua feagai le Au Paia o Aso e Gata Ai i le lalolagi atoa ma le tele o luitau talitutusa lea na feagai ai foi ma tagata sa Nifae i le vaitaimi lenei o la latou talafaasolopito, e aofia ai ni taumafaiga ina ia aveese mai i tagata le aia tatau e tapuai atu ai ma talanoa saoloto e uiga i mataupu e taua i nuu o loo tatou ola ai. Sa lagona e nisi o le Au Paia o Aso e Gata Ai ni taufaamatau mai fafo o ni osofaiga ma fetauiga a autau ua tuuto atu e faaumati a latou faigamalo ma saolotoga.

O le mea e sili ai, sa mafai e le au sa Nifae ona foia o latou luitau e ala i se taumafaiga maoae, ositaulaga, ma le fesoasoani mai le Alii. O ni nai lesona e uiga i le auala sa latou tali atu ai ma le faamanuiaina i o latou luitau e mafai ona aumaia ai ia i tatou se taiala ma le lototele e fetaiai ai ma o latou luitau o aso nei.

1. Faatumauina ia manaoga ma faamoemoega talafeagai.

E ala atu i a latou luitau uma, sa mafai ai e tagata sa Nifae amiontonu ona maua le malosi mai le iloaina o loo latou galulue ma ni faamoemoega talafeagai ma tatau. O lo latou faamoemoega autu lava o le “puipui i latou lava, ma o latou aiga, ma o latou lauelele, lo latou atunu, ma a latou aia tatau ma la latou tapuaiga” (Alema 43:47). O lo latou manaoga ina ia faasao lo latou fitalia—o le aia e galulue ai ma le amiontonu ma tali atu ai i a latou lava

amioga—nai lo le i ai o se tupu e faatonu atu mea latou te faia. O lo latou faamoemoega ina ia faasao le tulaga tutusa i lalo o le tulafono, aemaise lava lo latou saolotoga e tapuai ai i le Atua ma faatumauina la latou ekalesia (tagai i le Alema 43:9, 45).

O loo i ai ma o le a i ai pea i taimi uma i le lalolagi ia autau o loo saili e pulea ia manatu lautele ina ia maua ai le pule mo lo latou lava manuia. O loo i ai se faaosoosoga ina ia talia o latou faamoemoega ma liua ai ia fetauaiga i se tauiviga mo le pule. O le auala a le Alii e masani lava e na o manaoga ma faamoemoega mama e faatino ai, e pei ona faia e tagata sa Nifae. O le faia o lena mea sa faataga-in a i latou ina ia maua le mana mai le lagi e manumalo ai i o latou luitau “i le malosi o le Alii” (Alema 46:20; tagai foi i le Alema 60:16; 61:18).

E faapena foi, i lo tatou tali atu i luitau o loo feagai ma i tatou i nei aso, e tatau ai ona tatou siakia e le aunoa o tatou loto ina ia faamautinoa ai o loo mama o tatou manaoga ma faamoemoega ma o loo faavae lea i mataupu faavae o le talalelei a Iesu Keriso. Afai tatou te galulue (pe faaosooso isi e faia) ona o le manatu faapito, mo le tulaga manuia faaletagata lava ia, pe tuu ai foi i lalo nisi, o le a le maua e i tatou le fesoasoaniga faalelagi o loo manaomia e tetee atu ai i o tatou luitau ma faafitauli.

2. Ia agalelei ma limafoai atu i e le tagolima.

Ina ua faamata'uina e faataumaoia i latou na avea muamua ma o latou fili, o tagata Aneti-Nifae-Liae ia, sa tonu i tagata sa Nifae e tuuina atu ia i latou se lauelele e nonofo ai ma atiina ae ai o latou olaga fou ma puipuia i latou (tagai i le Alema 27:21–22; 43:11–12). Ona ua uma ona osia e tagata Aneti-Nifae-Liae se feagaiga o le a latou le toe tagofia a latou auupega o le taua, o lea sa latou tuu atu ai “se vaega tele o a latou mea e tausi ai” (Alema 43:13) ia autau a sa Nifae i nei taimi faigata. Ae peitai, e le o i ai se faamaumauga faapea na ese le auala na taulimaina ai e tagata sa Nifae nei tagata fāi mai nai lo le faaaloalo ma le alofa, e ui lava sa faigofie ona avea i latou ma se mea e taulai atu i ai i latou ia sa mananae e faatupu ni fevesiaiga.

O le ituaiga tausiga lea sa tuuina atu e tagata sa Nifae i tagata o le nuu o Amona, lea na ta'ua ai i latou, sa toe tauia mai ma iu ai ina saofaga atu i le tuufaatasiga o se tasi o autau sili ona musuia o vaegaau o loo faamaumauina i le talafaasolopito—le autau e 2,000 o tama talavou. Na iloagofie,



*O se naunautaiga
ina ia agalelei ma
limafoai atu i e le
tagolima sa avea
lea ma se tulaga
taua o le faasao-
ina o le nuu o sa
Nifae ma agavaa
ai tagata sa Nifae
mo faamanuiaga
o le lagi i taimi o
le tuga o o latou
faafitauli. O le
ituaiiga tausiga
lea sa tuuina atu
e tagata sa Nifae
i tagata o le niu
o Amona sa toe
tauia mai ma iu
ai ina saofaga
atu i le tuufaa-
tasiga o le autau
e 2,000 o tama
talavou.*

atonu o le auauanaga a nei alii talavou sa avea o se ki i le faasaoina o le nuu o sa Nifae mai le uluai faatafunaga.

I vaitaimi o fetauaiga i totonu, osofaiga mai fafo, ma luitau tau tamaoaiga, o loo i ai se taulaiga ina ia avea ma se tulaga le lelei e faasaga ia i latou o e “le pei o i tatou.” E faigofie lava le faitio ia i latou ma faia ni faaiuga. Atonu e fesiliglia e se tasi lo latou lotonuu ma le taua i totonu o le nuu ma lo latou aafiaga i le soifua manuia faale-tamaoaiga. E le o ogatusa nei tali le lelei ma le poloaiga a le Faaola ina ia alolofa atu i o tatou tuaoi e pei o i tatou lava, ma sa latou faatupuina ni fevaevaeaiga, femisaai, ma le faaesea. Pe ana faapea e lei taliaina e tagata sa Nifae ia le nuu o Amona, semanu o le a fausia ni feitagai nai lo le agaga faafetai i le tupulaga faiae. Nai lo le fausia o ni autau faamaoni e 2,000, o le a fevaevaeai ma toe liliu atu le tupulaga fou i tagata sa Lamana.

O se naunautaiga ina ia agalelei ma limafoai atu i e le tagolima sa avea lea ma se tulaga taua o le faasaoina o le nuu o sa Nifae ma agavaa ai tagata sa Nifae mo faamanuiaiga o le lagi i taimi o le tuga o o latou faafitauli. E manaomia e le nuu o le Atua ia ituaiga faamanuiaga i le asō.

3. Faalogo ma mulimuli i taitai musuia.

Na silafia e le alii ia luitau na feagai ma tagata sa Nifae, ma sa Ia auina atu ni taitai musuia ia fesoasoani ia i latou e fetaiai ma na luitau po o faafitauli. O le Taitaiau o Moronae sa avea ma se fitafita peitai sa musuia ina ia saunia ni ufifatatafa, talitaogalima, puloutau, ma ni ofu mafafia e puipuia ai ona tagata (tagai i le Alema 43:19). O se tau-nuuga, sa sili atu le malutia o le au sa Nifae i le taimi o le taua nai lo sa Lamana (tagai i le Alema 43:37–38). Mulimuli ane, sa faatonuina e Moronae ana autau ina ia eli i luga faupuega eleele e faatamilo i aai uma ma ia faatutu ai i luga o nei faupuega eleele ni laau tetele ma fausia ai ni pa laau maamaai (tagai i le Alema 50:1–3). Na fesoasoani nei sauniuniga musuia i le faasaoina mai o tagata sa Nifae mai le faaumatiaina.

A o sauniuni ia Moronae mo le taua, sa talai e Hela-mana ma ona uso le afioga a le Atua ma uunaia ia tagata ina ia amiontonu ina ia mafai ona taitaiina ma faasaoina i latou e le Agaga o le Alii. O le faalogo i taitaiga faaletino ma le faaleagaga a taitai musuia, na faasaoina ai le au sa Nifae. O fetauaiga i totonu lava ma le mumusu o tagata e faalogo i lapataiga na mafua ai ona oo mai ia faafitauli ma mafatiaga.

Ua faamanuiaina i tatou e ola ai i se vaitaimi ua tofia ai e le Alii ni perofeta soifua, tagatavaai, ma talifaaaliga ina ia lapataita ma taiatalaina i tatou ia saunia mo luitau o nei aso. I le 1998, sa tuuina mai ai e Peresitene Gordon B. Hinckley (1910–2008) se faatonuga ma se lapataiga musuia i tagata o le Ekalesia:

“Ua oo mai le taimi e faatulagaina lelei ai o tatou aiga.

“Ua toatele naua o tatou tagata e faaaoga uma a latou tipe maua e ola ai. O le mea moni, o nisi o loo ola i tipe nono. . . .

“O le tamaoaiga o se mea maaleale. . . . O loo i ai se faailoga o le tau matagia o loo i luma, ma e tatau ona tatou manatunatu i ai.”²

Sa ou talanoa talu ai nei i se tamaloa sa faalogologo i ni saunoaga a Peresitene Hinckley ma uunaiga a le Agaga. Sa la filifili ma lona toalua e tala i tua a la teugatupe, totogi faauma lo la fale, ma o ese mai le aitalafu.

O le asō ua ola tutoatasi lena tagata. Sa itiiti se aafiaga o lona aiga i le faaletonu o le tamaoaiga lea na sosoo ai. O le mea moni, o lona ola tutoatasi sa mafai ai e ia ma lona toalua ona auaua atu faamisiona.

Sa soifua mai Peresitene Thomas S. Monson mo lo tatou vaitaimi. O lona soifuaga ma aoaoga o le feau lea a le Atua na auina mai ina ia puipuia ma faamanuiaina ai i tatou i le asō. I se taimi ao popole le toatele e uiga i mea latou te le o maua, sa aoao ai i tatou e Peresitene Monson ina ia maua le lotofaafetai mo le tele o faamanuiaga ua tuuina mai ia i tatou e le Alii. Ma i se taimi ao taulai atu le toatele i o latou lava faafitauli, sa uunaia ai i tatou e Peresitene Monson ina ia aapa atu ma laveai mai, faagalo i tatou lava ina ia faamanuia atu i isi. O le faalogo ma usitai i aoaoga a Peresitene Monson o le a maua ai e o tatou aiga se malupuipuiga faaleagaga ma ni faamanuiaga tatou te manaomia mo lo tatou vaitaimi.

Ou te faafetai ua ou ola i se vaitaimi ua toefuatai mai ai le talalelei. Ou te faafetai ua saunia e le Alii le Tusi a Mamona mo lo tatou vaitaimi. Sa onosaia ma le faamaoni e sa Nifae ia luitau o o latou aso ma ua avea ma se molimau o le a saunia e le Alii ni faamanuiaga ma se puipuiga tatou te manaomia ina ia faafetaiaia ai ma le manuia ia luitau o lo tatou vaitaimi. ■

FAAMATALAGA

- Ezra Taft Benson, “O Le Tusi a Mamona—o le Maa ‘Au’au o lo Tatou Faatuatuaga,” *Liahona*, Jan. 1987, 6.
- Gordon B. Hinckley, “Mo Tama Talavou ma Tamā,” *Liahona*, Jan. 1999, 65.



*O le faalogo i
taitaiga faaletino
ma le faaleagaga
a taitai musuia
e pei o Moronae,
na faasaoina ai
le au sa Nifae.
O le taimi lava
na tulai ae ai
ni fevesiaiga
i totonu ma
mumušu tagata
e faalogo ma
usitaia ia lapa-
taiga musuia na
mafua ai ona oo
mai faafitauli
ma mafatiaga.*



PE FAAPEFEA ONA **OLA** I LE TERRITORI A LE FILI



**Saunia e Peresitene
Boyd K. Packer**

Peresitene o le Korama a
Aposetolo e Toasefululuā

Ua tatou faamanatuina le 100 tausaga o
le seminare i le Ekalesia. Ou te mafaufau
i popofou i le taimi sa matuai utiuti ai
punaoa mo lenei polokalama.

Mai na amataga faatauvaa, ua 375,008 nei
tamaiti i vasega seminare i atunuū e 143 ma le
silua ma le 38,000 faiaoga galulue fua ma faiaoga
totogi i le lalolagi atoa. E matuai tele tatou te
faalu i o tatou talavou. Matou te iloa lo outou
tauā ma o outou gafatia.

O Le a Fesoasoani le Poto ia te Oe e Faafetaiaia le Fili

Ou te tautala atu o se tasi ua vaai i le taimi
ua tuanai, ma ua manao e saunia outou mo le
lumanai.

O loo outou ola a'e i le teritori a le fili.
A oo ina outou matutua faaleagaga, o le a
outou malamalama i le ala e osofaia ai e le
fili le lalolagi o siomia ai outou. Ua i ai o
ia i fale, o faafiafiaga, o ala o faasalalauga,
gagana—o mea uma o siomia ai outou.

O le tele o taimi, e le mafai ona iloa lona i ai.

Ou te fia ta'u atu ia te outou, le mea e sili ona taua ma sili ona manaomia. Fai mai le mau, "O le poto o le mea sili lea, ia maua le poto," ma ou te fia faaopoopo atu i ai, "o mea uma [e te] maua, [agai pea i luma!]" (Faataoto 4:7). E le maimauina so'u taimi e faapena foi outou. O le mea lea, faalogo lelei!

O le taimi na ou filifili ai e avea o se faiaoga, sa matuai manino lava. I le taimi o le Taua Lona Lua a le Lalolagi, faatoa 20 ma ona tupu o'u tausaga ma o se pailate i le Fuavaa i le Ea. Sa ou tiute i le motu laitiiti o Ie Shima. O lenei motu, e laititi, e tutasi ma e pei lona tele o se faailoga tusi, e faasēsē teisi i matu o Okinawa.

I se tasi afiafi paganoa o le taumafanafana, sa ou nofonofo ai i luga o se papatū, e matamata i le goto ifo o le la. Sa ou mafaufau loloto i la'u mea e fai i lo'u olaga pe a uma le taua pe afai e faamanuiaina ma faaolatia mai ai. O le a le mea sa ou manao e fia avea ai a'u? O lena lava po sa tonu ai ia te au, ou te manao e avea o se faiaoga. Sa ou manatu o faiaoga, e aoao lava latou i taimi uma. O le aoao, o se faamoemoega autu lea o le olaga.

Sa ou faiaoga muamua i le seminare i le 1949 i le Brigham City. Sa ou a'oga i lena seminare a'o o'u aoga maualuga.

E tolu vasega na amata aoaoina i le seminare: Feagaiga Tuai, Feagaiga Fou, ma le Talafaasolopito o le Ekalesia. O se faamanuiaga mo au le faaopoopo i ai o se vasega i le vaveao, o le Tusi a Mamona. Sa ou toe foi mai mai le taua ma se molimau i le Tusi a Mamona, ma se malamalamā i le ala e galue ai le meaalofa a le Agaga Paia.

O Le Meaalofa o le Agaga Paia o Le a Puipua Oe i Teritori o le Fili

Ua aoaoina outou i o outou olaga e uiga i le meaalofa a le Agaga Paia, ae o le aoao atu lava ia e gata mai. Ae, e mafai ona outou ō na o outou siai tini, ina ia outou iloa ai e outou lava le ala e mafai ai ona avea le Agaga Paia ma se uunaiga taiala malupuipuia.

Mo alii talavou ma tamaitai talavou, e tutusa lava le faagasologa. O le iloaina o le ala e galue ai le Agaga Paia i lou olaga, o le sailiga i le olaga atoa. A e mauaina loa lena mea e oe lava, ona mafai lea ona e ola i le teritori a le fili ma ia le faaseseina lava pe faatama'i a oe. E leai se tagata o lenei Ekalesia—o lona uiga o outou uma taitoatasī—o le a faia se mea sese matuia e aunoa ma le uluai lapata'i a e uunaiga a le Agaga Paia.

O nisi taimi pe a e faia se mea sese, atonu e te faapea ane mulimuli, "Sa ou iloa e le tatau ona ou faia lena mea. E le'i lelei so'u lagona," pe faapea, "Sa ou iloa *sa tatau ona ou* faia lena mea. Ou te le'i toa e faatino!" O na uunaiga a le Agaga Paia e taumafai ai e taitai oe i le mea lelei pe lapata'i a foi oe e taumamao ese mai le faatama'iaina.

O loo i ai mea patino e le tatau ona e faia pe afai e fia tatalaina pea laina o fesootaiga. E le mafai ona e pepelo pe faaimamago pe gaoi, pe faia ni amioga le mama ae tumau pea ona lē motusia na alaleo. Aua e te alu i siosiomaga e teena ai fesootaiga faaleagaga.

E tatau ona e aoao e saili le mana ma le taitaiga o loo avanoa mo oe, ona e mulimuli lea i le ala tusa lava po o le a.

Muamua i lau lisi o "mea e fai", tuu ai le upu *tatalo*. O le tele lava o taimi o au tatalo o le a lē leoa. E mafai ona fai i le mafaufau sau tatalo.

E mafai ona i ai lava lau laina tuusao o fesootaiga ma lou Tama i le Lagi. Aua ne'i e faatagaina le fili e faatalitonu oe faapea, e leai se tasi o faalogologo mai i le isi itu. E faafogaina a outou tatalo i taimi uma. E le tuulafoaiina lava outou!

Tausi lelei lou tino. Ia tumama. "Tou te le o iloa ea o le malumalu outou o le Atua, o loo nofo foi le Agaga o le Atua i totonus ia te outou? (1 Korinito 3:16).

Faitau lelei ia folafolaga o loo maua i le vaega e 89 o le Mataupu Faavae ma Feagaiga. E le o folafola mai e le Upu o le Poto le soifua maloloina atoatoa, ae mafai ona faamalolosia ai elemene faaleagaga o i totonus ia te outou.

Taumamao mai le tataina o pe'a ma mea faapena e faaleaga ai lou tino. Na foafoaina lou tino i le faatusa o le Atua.

O Fautuaga Faaperofeta ua Aoao Mai ai Mea e Moni

Ou te fia talanoa nei i le mamanu o le talanoa tuusa'o e uiga i se isi mataupu.

Ua tatou iloa na faatulaga ia itupa i le lalolagi o le muai olaga.¹ "O le agaga ma le tino o le tagata lea" (MF&F 88:15). O lenei mataupu o le itupa o se popolega tele i le Usoga, e pei foi o isi mataupu uma o le ola mama.

Ua i ai nisi o outou atonu ua lagona, pe sa ta'u atu foi i ai na e fanau mai ma ni lagona faaletonu, ma e le ta'usala-inia oe pe a e faatinoina na faaososoga. Iaoaoga faavae lava ia, ua tatou iloa pe ana fai e moni lena mea, semanu ua aveesea lou faitalia, ma e le mafai ona tupu lena mea. E i ai peia lava lau filifiliga e mulimuli i uunaiga a le Agaga

Paia ma ola ai i se olaga mama a'ia'i ma le atoatoa, lea e tumu i le amioatua.

Na fofogaina mai e Peresitene Gordon B. Hinckley le mea lenei i le konafesi aoao: "Ua fesili mai tagata e uiga i lo tatou tulaga mo na tagata ua manatu ia i latou lava . . . o tane e mananao i tane ma tamaitai e mananao i tamaitai. O la'u tali, tatou te alolofa ia i latou o ni atalii ma afafine o le Atua. Atonu e i ai ni o latou faanaunauga patino e malolosi, ma atonu e faigata ona puleaina. O le tele o tagata e i ai [faaososoga] i se ituaiga e tasi, po o se isi foi mai lea taimi i lea taimi. Afai latou te le faatinina ia faanaunauga, ona mafai lea ona latou agai i luma e pei lava o isi tagata o le Ekalesia. Afai latou te solia le tulafono o le legavia ma tulaga faatonuina o le Ekalesia o le ola mama, ona tatau lea ona faia aoaiga faale-Ekalesia, e pei ona faia i isi.

"Tatou te mananao e fesoasoani . . . e faamalolosia i latou, e fesoasoani i o latou faafitauli ma fesoasoani ia i latou i o latou faigata. Peitai, e le mafai ona tatou gūgū pe nōfōnōfōvāle pe afai ua latou faamatuu atu i faiga le mama, pe afai ua latou taumafai e tausisia ma puipuia ma ola ai i ia tulaga faaulugalii o le itupa e tasi. O le faatagaina o lena mea, e ta'uafaatauvaa ai le faavae tonu ma le paia o le faaipoipoga ua faapaiaina e le Atua, ma lona faamoemoega tonu, i le fausiaina o aiga."²

Sa saunoa Peresitene Hinckley mo le Ekalesia.

Faaaoga Lou Faitalia e Faatumauina ai pe Toe Maua mai ai le Tulaga Saogalemu

O le uluai meaalofa na mauaina e Atamu ma Eva o le fitalia: "E mafai ona e filifili mo oe lava, ona ua tuuina atu ia te oe" (Mose 3:17).

Ua ia te oe foi lena lava fitalia. Faaaoga ma le atamai e faafitia ai soo se uunaiga le mama po o ni tofotofoga lē paia e ono oo atu i lou mafaufau. Aua lava ne'i e alu iina, ma afai ua e i ai iina, toe foi mai mai fafo. "Faafiti outou lava mai mea e le faaleatua" (Moronae 10:32).

Aua e te ta'alo'alo na o oe pe faatasi ma isi tagata o soo se itupa i mana e foafoa ai le ola o loo i totonu o lou tino. O le tulaga faatonuina lena a le Ekalesia, ma o le a le sua lava. A oo ina e matua, e i ai se faaososoga e tofotofo pe faata'ita'i i gaoioiga lē mama. Aua le faia lena mea!

O le uputatala lava o le *amio pulea*—amio pulea o le tagata lava ia. O le upu *amio pulea* e sau mai le upu soo

po o le sē *mulimuli*. Ia avea oe o se soo/sē mulimuli i le Faaola, ona e saogalemu lava lea.

Atonu pe tasi pe lua o outou ua mafaufau, "Ua ou ta'usalaina i lea mea po o le la mea sese matuia. Ua tuai tele mo au." O le a lē tuai lava.

Ua aoaoina outou i le aiga faapea i le seminare e uiga i le Togiola a Iesu Keriso. O le Togiola e faapei o se titina. E mafai ona tapēese ai le ta'usalaga ma le aafiaga o soo se mea ua mafua ai ona e lagona le tausalaina.

O le ta'usalaina o se tiga faaleagaga. Aua le faapologina oe i se tiga tumau. Aveese. Ia fauma. Salamo, ma afai e tatau ai, toe salamo ma toe salamo ma toe salamo seia oo ina e—pule ia te oe—ae le o le fili.

O Le Filemu Tumau e Oo Mai e ala i le Salamo Soo

O le olaga o se faasologa o tofotofoga ma mea sese. Faaopoopo le "salamo soo" i lau lisi o mea e fai. O le a e maua ai le filemu tumau lea e le mafai ona faatau mai i se tau faalelalolagi. O le malamalamā i le Togiola, atonu o le upumoni aupito taua lea e tasi e mafai ona e aoaoina i lou talavou.

Afai o outou mafuta ma isi o loo tosaina oe i lalo nai lo le faatuina o oe i luga, tuu loa ae sui au uo. Atonu e tuua na o oe ma nofo toatas i ni taimi. O le fesili taua e mafai ona e faia i le taimi lea, "A tuua na o oe, pe o lelei ni au uo?"

O le autalaina o se mausa leaga sa e faatagaina e mai-leia ai oe, e mafai ona matua faigata. Ae o loo ia te oe le mana e fai ai. Aua le faanoanoa. Na aoao mai le Perofeta o Iosefa Samita "o tagata uma e i ai tino, ua i ai le mana e faatoilalo ai i latou e leai ni tino."³ E mafai ona e teena faaososoga!

E le faapea o le a oulua fetaiai patino ma le fili; na te le faaalia mai o ia lava i lena ala. Ae tusa lava foi pe liutino atu o ia ia te oe e tofotofo ma faaosooso oe, o loo ia te oe se malosiaga. E mafai ona faatino lou fitalia, ona ia tuua lava lea o oe.

Ia Faaaoga Faamanuiaga o le Seminare

E le faatauvaa outou. E faapitoa tele outou. E tulaga ese lava outou. E faapefea ona ou iloa lena mea? Ua ou iloa aua sa outou fananau mai i se taimi ma se nofoaga ua mafai e le talalelei a Iesu Keriso ona oo atu i o outou olaga e ala i aoaoga ma gaoioiga i o outou aiga ma Le Ekalesia a Iesu Keriso o le Au Paia o Aso e Gata Ai. E moni lava,

e pei ona fetalai le Alii lava ia, "o le ekalesia moni ma ola e tasi i le lalolagi atoa." (MF&F 1:30).

E i ai isi mea e mafai ona tatou faaopoopo i le lisi, ae ua outou iloa mea e tatau ma mea e le tatau ona outou faia i o outou olaga. Ua outou iloa le sa'o ma le sese ma e le manaomia ona tau poloaiina outou i mea uma.

Aua nei ma'imauina nei tausaga o aoaoga faa-seminare. Faaaoga faamanuiaga sili ua outou maua e aoao ai aoaoga faavae o le Ekalesia ma aoaoga a perofeta. Aoao i mea e sili ona aoga. O le a faamanuiaina ai oe ma au fanau i le tele o tupulaga a sau.

E le o toe tele ni tausaga ona e faaipoipo lea ma fai sau fanau, o se faaipoipoga e tatau ona faamauina i le malumalu. Matou te tatalo o le a e mauaina e oe lava ia, i le taimi e tatau ai, ua e faamautu saogalemu i se uarota po o se paranesi faaleaiga.

Agai i Luma i le Faamoemoe ma le Faatuatua

Aua e te fefe i le lumanai. Fetuleni atu i luma ma le faamoemoe ma le faatuatua. Manatua lena meaalofa paia a le Agaga Paia. Aoao ina ia aoaoina oe e ia. Aoao e saili atu i ai. Aoao ina ia ola ai. Aoao e tatalo e le aunoa i le suafa o Iesu Keriso (tagai i le 3 Nifae 18:19–20). O le a mafuta atu le Agaga o le Alii ia te oe, ma o le a faamanuiaina ai oe.

Ua i ai lo matou faatuatuaga loloto ma le maoae ia te outou.

Ou te tuuina atu lau molimau ia te outou—o se molimau na oo mai ia te au i lo'u talavou. Ma e le ese ai outou mai soo se tasi nai lo a'u. E i ai la outou aia tele i lena molimau ma le tautinoga e pei ona i ai i isi. O le a oo atu ia te oe pe a e galueaiina. Ou te talosagaina faamanuiaga a le Alii i o outou luga—o faamanuiaga o lena molimau ia i ai i o outou olaga, e taiala ai outou a o outou fausia ni lumanai fiafia. ■

Mai se lauga na tuuina atu i se faasalauga o le 100 tausaga o le seminare i le aso 22 Januari, 2012.

FAAMATALAGA

1. Tagai i le "O Le Aiga: O se Folafolaga i le Lalolagi," *Liahona*, Nov. 2010, 129; tagai foi i le Mose 3:5; Aperaamo 3:22–23.
2. Gordon B. Hinckley, "O A Mea o Tuufesili ai Tagata e Uiga ia i Tatou?" *Liahona*, Ian. 1999, 82.
3. *Aoaoga a Peresitene o le Ekalesia: Iosefa Samita* (2007), 225.




Tagai i le Lauga Atoa

Matamata pe faalogologo i le lauga atoa a Peresitene Packer i le seminary.lds.org/history/centennial.



Aua nei ma'imauina nei tausaga o aoaoga faa-seminare.
Faaaoga faamanuiaga sili ua outou maua e aoao ai
aoaoga faavae o le Ekalesia ma aoaoga a perofeta.
Aoao i mea e sili ona aoga.



NA OU TATALO MO LE LOTOTOA

Oou matua o ni tagata o le Ekalesia, ae le toaaga tele i laua. O nisi taimi e tulai mai ai feteenaiga ona la te talitonu e faamuamua le aiga i mea uma lava—a o le'i o i le lotu, faalauteleina o o'u valaauga i le Lotu, ma le faia o isi gaoioiga.

Ona o au o se taitai i le Peraimeri ma o se tagata o le aufaipese, o nisi taimi e faalavelave au fonotaga faale-Lotu i tiute faaleaiga. I se tasi aso ao ou sauni e alu i se faasalalauga o le konafesi aoao i lo matou falelotu i Antananarivo, na faamanatu mai e ou matua ia te au o loo i ai malo i lo matou fale.

“Ua tatau ona e filifili po o lou aiga po o le Lotu,” sa fai mai ai lou tina ia te au. “Po o lou nofo mai ma matou ae misi le konafesi, po o lou alu i le konafesi ona e feagai lea ma le faasalaga.”

Na ou filifili ia aua nei i ai se finauga ma lou tina. Nai lo o lena, na ou faaaluina se minute e fesili ai i le Tama Faalelagi ia tuu mai ia te au le lototoa ma le malosi. Na ou fesili foi ia te Ia e fesoasoani ia te au ia iloa le mea e fai. Pe tatau ona ou nofo i le fale ma lo'u aiga pe alu i le lotu e faalogo i le siufogoga o le perofeta?

O le taimi lava na uma ai lau tatalo, sa mafai ona ou lagonaina le Agaga Paia. Sa mafai ona ou lagonaina le faamalosiau mai o le Agaga ia te au

e ta'u i lo'u tina e taua tele mo au le alu e faalogo i le perofeta. Na ou lagonaina e tatau ona ou tau atu ia te ia o le a ou mauaina fautuaga e le gata mo lo'u olaga nei ae faapena foi mo lo'u lumanai.

E mafai e le Atua ona fai vavega, ma na Ia faatoafilemuina loto o ou matua na mafai ai ona la tuu mai au ou te alu i le konafesi e aunoa ma le faasalaina. O se aafiaga maoae lenei i lou olaga. Na faamautinoa mai ai ia te au le moni

o le mau, “Ma o le mana o le Agaga Paia e mafai ona [tatou] iloa ai le moni o mea uma lava” (Moronae 10:5).

Ou te iloa afai tatou te faavae a tatou amioga i aoaoga faavae o le talalelei ma faalogo i le Agaga, e mafai ona tatou fiafia ia tatou filifiliga. Ua faamalosia e lenei aafiaga la'u molimau o loo i ai le Atua iina mo i tatou ma e fesoasoani le Agaga Paia ia i tatou i o tatou olaga. ■

Fy Tianarivelo, Madagascar

*O le taimi lava
na uma ai la'u
tatalo, sa mafai
ona ou lagonaina
le Agaga Paia ua
faamalosia au e
ta'u i lo'u tina e
tau a tele mo au
le alu e faalogo
i le perofeta.*



O LE NOFOAGA MO AU

Na faatumuina lou olaga i le faanoanoa, ae ou te lei auai i le Ekalesia. Ina ua tatala le faaipoipoga a ou matua i le fitu o ou tausaga, na falepuipui lou tama. Na fai ma vaisu a lo'u tina le inu ava malosi, ma sa galoma uma atu mea na taua ia te ia. Na ave a'u e nonofo ma se aiga e tausia au.

Ona o nei mea, na televave ai lou matua nai lo au tupulaga. Sa ou le manatu ou te maua so'u avanoa i le olaga, ma na iu ai ina ou i ai i se tulaga o le faatautee i taimi uma. Ao ou talavou lava, na amata ona ou ulaula ma fai isi mea ua ou malamalama nei e feteenai ma le Upu o le Poto. Na ou mautinoa ua faasalaina au ia toilalo i le olaga.

Pau le mea na ou maua ai le fiafia o le fesoasoani lea i tagata—pe faamamaina ni mea faatasi ma latou po o le faalogologo ia latou tala o latou olaga. Na ou matua manao lava i tagata ia iloa e mafai ona latou faalagolago ia te au. O se tasi tausaga na ou alu ai mo se malologa ma feiloai ai ma se tina matua na ou filifili e au-auna i ai i le faalogologo lea ia te ia. O ia o se Kerisiano ma na amata ona talanoa mai ia te au i mea tau lotu.

Ou te lei matuai talitonu lava i le Atua. O nisi taimi, pe a ou mafaufau *masalo* e i ai se Atua, ou te tuuaia o Ia mo mea faigata na oo mai ia te au. Ae peitai ina ua faamatala mai e lenei fafine le taua o le faatuatua i le Atua, na amata ona ou fiafia i ai. Ae ou te lei alu ese, na ia fai mai se mea na faapitoa lona taua: “O Mamona e mulimuli i poloaiga a le Atua.”

Ou te lei faalogo muamua i Mamona, o lea na ou alu ai i le fale,

alu i le initonetia, ma saili. Na ou maua le Mormon.org ma okaina se kopi o le Tusi a Mamona. Na momoli mai e faifeautalai i ni nai aso mulimuli ane.

Ou te lei mautinoa pe o le a ou amata ona talitonu i le Atua, ae na fesoasoani mai faifeautalai ia ou iloaina e le gata ina mafai ona ou talitonu ia te Ia ae mafai foi ona iloa o Ia. Ao amata ona ou tatalo ma suesue i le Tusi a Mamona, na ou lagonaina lou i ai i se malaga matagofie i le mauaina o le fiafia. Na tuu lo'u ulaula. Na tuu lou tuuaia o le Atua ma amata ona faafetai ia te Ia mo mea lelei i lou olaga. Na oo ina ou iloa na puapuagatia Lona Alo mo au agasala faapea foi tiga uma na ou lagonaina. I le aso 28 o Oketopa, 2007, na ou papatiso ai i Lana Ekalesia.

Ana ou le aafia lava faaletagata i le suiga mai le leai o se faamoemoe i le fiafia, ou te le talitonu e mafai. Ua ou

fiafia nei i lou valaauga i le Peraimeri ma ou te faafetai ua maua le avanoa e fesoasoani ai e faatulaga se auauanga faatino i se konafesi a le autalavou nofufua matutua i Polani. Ina ia mafai ona fesoasoani atu pea i isi i auauanga a le Ekalesia, ua faaopoopo ai le fiafia ua ou maua i le talalelei a Iesu Keriso. O mea uma ua ou faia nei, ua ou faia i le alofa mama ona o Iesu Keriso. Ou te talitonu e matagofie le olaga ma e tusa lava pe i ai ni o tatou luitau, afai tatou te mulimuli i le Faaola, o le a tatou le gotouga lava.

E sao le fafine na ou feiloai i ai: O le mauaina o le faatuatua i le Atua e matuai taua lava. Tatou te le mauaina lo tatou tulaga i lenei lalolagi pe afai tatou te le iloa o Ia. Ou te faafetai ua iu lava ina i ai se nofoaga ou te iloa e mo au. ■

Dorota Musial, Polani

Ae ou te lei alu ese, na ia fai mai se mea na faapitoa lona taua: “O Mamona e mulimuli i poloaiga a le Atua.”



TAU MAI IA I MATOU E UIGA I LAU EKALESIA

Ise malaga e asi lou tuagane, na ou nofo i tua o le vaalele e nonofo ai le aupaigaluega. O laina nofoa e lua i lena vaega e faafesagai.

Na ou ta'u atu lo'u igoa i tagata na siomia au ma ta'ua ai o le a ou ali i le Iunivesite o Polika Iaga. Na fai mai se tamā ma te faafesagai e i ai le uo a lona afafine faatoa alu lava i le misiona. E laitiiti lava se mea ua iloa e lona afafine e uiga i le Ekalesia, ae o ia toeitiiti lava leai se mea na te iloa. Na vave ona faailoa mai e le teine faigaluega e le manao o ia e auai i "lena lotu" ona e tetee i tamaitai. Fai mai le tamaloa na ia faalogo i se mea faapena—o fafine o le Au Paia o Aso e Gata ai e faapea e maualalo nai lo tamaloloa, ma e le mafai ona latou maua le perisitua pe pulefaamalu-malu i fonotaga, ma e pulea le Ekalesia e tamatane.

Ona, faliu mai lea ia te au, ma fesili mai, "O le a *sou* lagona i lena mea?" Na faliu mai uma le toafitu ia te au ma faatalitali.

Na amata ona tatavale lo'u fatu. Ao ou laitiiti na ou taulotoina Mataupu Faavae o le Faatuatua faapitoa lava mo nei ituaiga tulaga, ma ina ua ou talavou ma oo ina matua, na ou faataitaia le faia o le molimau i le faaaliga a Iosefa Samita ma le Tusi a Mamona. Ae sa leai ma sina o'u iloa pe faapefea ona tali le fesili a le tamaloa. Na ou tatalo le leoa i le Tama Faalelagi e taiala au.

Ona ou faia lea o upu muamua lava na oo mai i lou mafaufau. "Tou te le iloa ma se mea e uiga i le Aualofa." Na ta'u mai i o latou foliga latou te le iloa.

"E galulue soosoo tauau le perisitua ma tamaitai, o i latou uma na o tagata o le Aualofa," sa ou faamatala atu ai. "E i ai so matou peresistene o le Aualofa, o se tamaitai e taitaia gaoioiga a tina ma tamaitai i le Ekalesia i le lalolagi atoa. O le tiutetauave o tamaitai o le aumaia o le agalelei ma le agaalofa i olaga o tagata ae maise lava i olaga o latou aiga."

Na faalologo ma le naunautai tagata na siomia au.

"O loo tatou ola i se taimi uigaese ua mananao nisi fafine e amio ma mafaufau ma avea pei ni tamaloloa.

Ae matou te talitonu na vaevae e le Atua tiutetauave. Matou te faamoe-moe i tamaitai ia avea ma taitai i tamaitai ae o ni taitai soofaatas ma tamā i o latou aiga. E matua faalagolago mai lava tamaloloa ia i tatou mo fautuaga i nei vaega. O se paleni amiotonu lenei mea. E faamanuiaina ai faalapotopotoga a le Ekalesia ma o matou aiga. Ma matou te talitonu moni lava e leai se tane pe a le o i ai le fafine, e leai foi se fafine pe a le o i ai le tane i le Alii (tagai i le 1 Korineto 11:11). Matou te talitonu matou te le atoatoa e aunoa ma le isi. Matou te le talitonu na foafolina i tatou e

Ona ou faia lea o upu muamua lava na oo mai i lou mafaufau. "Tou te le iloa se mea e tasi e uiga i le Aualofa."



tauva ma le isi ae ia galulue faatasi ma le isi.”

Na ou lagonaina le faamanuiaina ina ua uma. Na ou iloa o upu na ou tautala ai na mai le Agaga. Na foliga faamalieina tagata uma i lau faamalamalamaga. Na fai mai le tamaloa, “Tau mai nisi mea e uiga i lau lotu.”

O le isi la lua itula, na ou maua ai le avanoa fiafia e talanoa ai e uiga i le Toefuataiga, tali fesili, ma tuuina atu le molimau o le talalelei ou te fiafia i ai. ■

Shauna Moore, Virginia, ISA

PE TATAU ONA OU FILIFILI LE GALUEGA PO O LE LOTU?

Na ma faaipoipo ma lou toalua i le 1981 i le Malumalu o Tokyo i Japoni. Na le faigofie lo ma olaga ina ua maea le faaipoipoga i le taimi muamua. Sa ou faafetai na i ai se

galuega, ae sa tau le fe'a'ua'uta'i le faasoa. Na ma fesili atu i le Tama Faalelagi mo Lana fesoasoani ma faia le mea sili ia ola ai ma totogi a ma'ua sefuluai.

Na ma iloa afai ma te faalagolago i le Alii, o le fesoasoani mai o Ia.

I se tasi vaiaso na aumai ai e lou toalua ma lau uo le fasipepa lava e tasi na ootimai

se nusipepa. O se faasalalauga mo se faiaoga tumau o le Igilisi.

Na ou auina atu faamatalaga o o'u tomai i le kamupani ma na valaauna au mo se faatalanoaga. I le faaiuga o le faatalanoaga, na fai mai ai le tamaloa, “Na e tusia i au faamatalaga na e auai i galuega volenitia o se faifeautalai mo Le Ekalesia a Iesu Keriso o le Au Paia o Aso e Gata Ai. O lona uiga la e te alu i le lotu i Aso Sa, a ea? Afai e te filifili pe alu i le lotu pe galue i Aso Sa, o le fea e te filifilia?”

O se fesili faigata tele ona sa ou manaomia se galuega sili atu. Ae ina ua maea ona ou mafaufau loloto, na ou tali atu, “O le a ou alu i le lotu.”

Faatasi ma se ataata faafoliga, na ia fai mai, “Oi, ua ou iloa.” Ona ia faamavae mai lea ia te au ma folafola mai o le a fai e le kamupani le filifili i lena afiafi ma e tatau ona ou valaau mai e iloa ai le faaiuga. Ao ou tuua le potu, na ou mafaufau ua ou le pasi.


Mulimuli ane i lena afiafi ina ua oo mai le taimi e valaaui ai, na ou viliina le numera o le kamupani ma le fefe tele.

“O le a se faaiuga o le faatalanoaga?” Sa ou fesili ai i le failautusi. “Ou te le'i pasi, a ea?”

Na ou tei ae na fiafia i lana tali.

“Matou te mananao e talosagaina oe e te galue mo matou,” o lana tala lea.

Pe a ma se masina mulimuli ane na ou iloa ai le mafuaaga na ou maua ai le galuega. Na faamanino mai e le failautusi o le na faia le faatalanoaga e tuaoi ma faifeautalai faamisiona o le Au Paia o Aso e Gata Ai. E masani ona ia vaaia faifeautalai o vili vave



Afai e te filifili pe alu i le lotu pe galue i Aso Sa, o le fea e te filifilia?”

ane a la uila i le la galuega i le taeao.

“E talitonu o ia o oe, e auai i le lotu lea e tasi, o le a galue malosi mo matou e pei ona galulue faifeautalai mo le la lotu,” o lana tala lea. “E laki oe!”

Mai lena taimi na maua lava e lo matou aiga mea na manaomia.

O taimi uma lava ou te mafaufau ai i lenei aafiaga faapitoa, e faamalo-sia ma faamafanafanaina ai au. Ou te iloa e masani ona faaaoga e le Atua isi tagata e faamanuia ai Lana fanau. E le lava au upu e faaali atu ai lau faafetai i lou toalua ma lau uo mo la la'ua musumusuga i le aumaia o lena faasalalauga i le nusipepa mo au, mo na faifeautalai galulue malosi ma le la faataitaiga maoae, ma mo lo tatou Tama Faalelagi agaalofa, alofa, agalelei, e ona le mana faavavega ua faapaiaina ai o matou aafiaga mo lo matou lelei. ■

Kenya Ishii, Japoni

OLE

Ola Mama

I SE LALOLAGI LÉ MAMA

Na feiloai mekasini o le Ekalesia ma se vaega o talavou matutua mai vaega eseese o le lalolagi e talanoaina luitau ma faamanuiaga o le tumau i le amiomama i se lalolagi e le faatauaina—ma e ulagia foi—le amiomama. Na matou iloaina lo latou talanoa fiafia, faamaoni, ma le mafanafana e sitia ma musuia ma faamoemoe o le a outou mauaina ia latou faamatalaga se mea e fesoasoani ia te oe e faataua ai le paia o le faaipoipoga ma sootaga vavalalata faaletino.

Faatasi ai ma le tele o tagata ua tauamiotonuina amioga le mama, o a aoaoga moni o le talalelei e fesoasoani ia te oe ia tumau ai i le mama faalefeusuuaiga?

Martin Isaksen, Norway:
O loo tau mai e tusitusiga paia ia amio mama. Ua lelei lena mo au.

Lizzie Jenkins, Kalifornia, ISA:
O le amio mama o se tautinoga. Ia e ola ai. O se auala o le olaga.

Liz West, Egelani: O le malamalamo po o ai au, o le malamalamo loo i ai se mea sili atu i le olaga nai lo na o le taimi nei ma na o le po e tasi lenei e fesoasoani tele ia te au. O le ata o le faaolataga—e ui lava ao ou talavou na le mafai ona ou faamaninoina ma le atoatoa—e matuai fesoasoani lava. O le manatu faavae o le faaipoipoga faavavau e ofoo fogia! Afaí e malamalamo tagata i lenei tautinoga, latou te iloaina le ofoo fogia o le tuuina o i tatou e le Atua iinei i aiga ma tuuina mai ia i tatou poloaiga e le

gata o le a tatou saogalemu ai ae o le a tatou fiafia foi. Ao ou ola i nei mataupu faavae ma faasoa atu i au uo, ma fai atu, “O le a ou le inupia” pe “O le a ou le alu i lena pati” pe “Ou te le faia lenei mea,” latou te faaaloalo ia te au. E iu lava ina latou tutu moni lava faatasi mo au. O le malamalamo e taua a’u o se atalii o le Atua ma e silafia e Tama Faalelagi po o ai au ma e popole moni lava mo au o se malosiaga maoae lea.

Anna (Anya) Vlasova, Rusia:
E matua fesoasoani tele mo au pe a mafaufau e uiga i le avea ma se vaega o se aiga faalelagi. Ou te alofa ma faaaloalo i le Atua ma ou te le manao e maasiasi o Ia ona o filifiliga ou te faia.

Kaylie Whittemore, Florida, ISA: Ou te mautinoa lava o le malamalamo i le paia o aiga na ou maua ai se manao malosi ia ola i le tulafono o le ola mama. O le isi mea o le iloa lea afaí tatou te solia poloaiga, e

i ai taunuuga le lelei ou te le manao e oo i ai.

Falande (Fae) Thomas, Haiti:

Na ou matua mafaufau lava pe faapefea ona faapea tagata, “Aisea e fatai ai ae mafai ona e mauaina mea uma i le taimi nei?” Ae ou te mafaufau e uiga i le umi o lena ituaiga fiafia. E sili ia te au le ola i le tulafono o le ola mama ma, maua le filemu, i le iuga o le aso.

Hippolyte (Hip) Kouadio, Ivory Coast:

O se tasi o mea na fesoasoani tele ia te au o le folafolaga i aiga: “Matou . . . tautino atu ua poloai mai le Atua o mana paia o le foafolina o fanau, ua na o le va lava o le alii ma le tamaitai ua faaipoipoina faaletulafono, o se tane ma le ava, e faaaoga ai.”¹

O le tasi mea e fesoasoani o le faamanino mai lea e Taitai o le ola mama ia i matou. Latou te lapatai mai e uiga i le amataga o le ola le mama ma aoao mai pe afai matou te faaleagaina le tino, ua matou faaleagaina le agaga. Na aoao mai Elder Jeffrey R. Holland na totogi e le Faaola le tau mo i tatou ina ia tatou maua le tino toetu i se aso. O le ala e mafai ona matou lotofaafetai ai ona o le tau na Ia totogiina o le tausia lea o o matou tino ia mama.²

Liz: Ou te manatua se talanoaga faapitoa ma se tasi ao 15 ou tausaga. Na ma talanoa e uiga i lou le talitonu

"Na totogi e le Faaola se tau mo i tatou ina ia maua se tino toetu i se aso. O le auala e mafai ona tatou lotofaafetai mo le tau na la totogia o le tausia lea o o tatou tino ia mama."

i sootaga vavalalata faaletino a o lei faaipoipo, ma ou te manatua lona fai mai, "Ioe, ae faapefea pe afai e tei a ua tupu? E faapefea pe afai e i ai se po, na ona e . . . ?" Ae na ou iloa o loo i ai sau filifiliga. E leai se mea e tei a ua "tupu."

E maoae ia te au le tuuina mai e le Tama Faalelagi ia i tatou le faitalia ma poloaiga e faasaoloto ai tatou ae o Satani e faia mea uma na te mafaia e saisaitia ai pe pulea ai i tatou. O taimi na talanoa i ai lau uo e tei ai ua "tupu" se mea o taimi i pati e inu ai tagata ma fai paga taitoalua. Ou te le tuuina la au i na tulaga. O le filifiliga e le tatau ona faia i le taimi mulimuli pe a e fai atu ioe pe leai. E fai muamua le filifiliga, pe a e fesili ia te oe lava ia, "Pe ou te alu i le pati?"

O le tele o tagata, pe a latou le mafaufau i na mea muamua ma lē mafaufau i taunuuga, o le a faia soos se mea latou te mananao ai i lena taimi. Ae afai e te faapea, "Ou te manao i le mea lea e fai ma a'u faa-iuga mulimuli; o le mea lea o le a ou fai a nei filifiliga," ona mafai lea ona e aloese mai le tele o puapuaga.

Na e ta'ua le faitalia ma poloaiga. Ae, pe mafai e feagaiga—feagaiga o le papatisoga po o feagaiga o le malumalu—ona fesoasoani ia te oe e ola i ou tulaga faatonuina?

Fae: Ou te mafaufau i lou olaga ae ou te lei papatiso ma le uiga taua tele

o le olaga nei ina ua ou osia feagaiga. E ofoofogia le mafai ona faamagaloina i tatou ona o le Togiola. Pe a ou manatua au feagaiga, ou te mafaufau pe faapefea ona ou salamo, avea ma se isi e sili atu, ma agai pea i luma.

Anya: Ae maise lava i le malumalu e mafai ona e vaai i se vaaiga faavavau. E fesoasoani le malumalu ia te oe e mafaufau ai i lou faavavau ae le na o le aso, ona e faia lea o filifiliga sili atu le poto.

Lizzie: O le tele o taimi tatou te talitonu faapea e leaga sootaga vavalalata faaletino, ae e le leaga. Tau lava ina ia faatagaina e le pule sa'o, i le taimi sa'o, ma le tagata sa'o. O le uiga lena o feagaiga. Ua e faia ni tautinoga. Ua e faapea atu, "Ua ou matua saunia mo lenei laasaga i lo'u olaga." E fesoasoani feagaiga ia te au aua ou te iloa o loo ou faia mea i le faatulagaga e tatau ona ou faia ai. Ma ou te iloa afai ou te faia le finalago o le Tama Faalelagi, o le a sili atu lo'u fiafia.

Jonathan Tomasini, Farani: O le a ou le faamaoni ia te au lava ia ma o le a ou le faamaoni i le Atua pe a ou solia au feagaiga. O feagaiga o le faaipoipoga e fesoasoani ia te au e vaai ai ua mafai ona ou ofoina atu i lou toalua se tasi e i ai le loto-pulea, ua saunia o ia lava e fai ma tane lelei, ma na tausia o ia lava ia mama.



O LE TULAGA FAATONU- INA MA LE KI

"O loo tumau pea le tulaga faatonuina o le nofo mama a o lei faaipoipo ma le faamaoni a'ia'i i le faaipoipoga. Ae peitai, e tusa lava po o le a lo tatou foliga mai tatou te le o ogatasi ma faatulagaga a le lautele, e tusa po o le a le tauemuina o o tatou tulaga faatonuina, e tusa po o le a le gauai atu o isi i faaosoosoga, o le a tatou lē gauai atu lava, e le mafai lava ona tatou gauai atu i ai. . . .

"Ua uma ona faaeeina atu i ou luga le meaalofa o le Agaga Paia. O le a i ai ni musumusuga o le faamaoniaina po o lapataiga i faaiuga e te faia. E mafai e le Agaga Paia ona taitaiseina oe mai le tiapolo ma toe aumai oe i le Alii pe afai ua e se ese ma ua e le iloa lou ala. Aua nei galoo outou o atalii ma afafine o le Atua. E le mafai e Satani ona faafalepuipuiina oe e faavavau. O loo e umaina pea le ki o le salamo e tatala ai le faitotoa o le falepuipui.

Peresitene Boyd K. Packer, Peresitene o le Korama a Apostetolo E Toasefululua, "Ua Faatuina le Tagavai o le Upu Moni," *Liahona*, Nov. 2003, 26.

Ua tele finauga i le lalolagi—o le tele o i latou e foliga faatuanaau ma faigata—pe aisea ua le toe aoga ai le tulafono o le ola mama. O a finauga ua e faalogo i ai ma na faapefea ona e tali atu ia i latou ua luiina ou tulaga faatonuina?

Lizzie: O lou tausaga mulimuli i le aoga maualuga, ou te manatua se faiaoga na tuuina mai ni "fautuaga." Na faaipoipo o ia faatoa uma le aoga maualuga, ma na iu leaga, ma na faigofie lava ona ia tau mai "e tele i'a i le sami." O lona uiga o lana tala, e tele naua mea mo i tatou e tofo i ai, e tele foi tagata e su'e i ai. Ou te manatua lou tei ina ua fai mai lo'u faiaoga i lena mea. Talu mai lena taimi ou te mafaufau lava, ioe, e tele tagata, ae ou te le manao i ni tagata se toate!

Jonathan: O se tasi ou te iloa na fai mai afai e fai sana uo, e manao o ia e vaai pe tutusa o la lagona tau feusuai ma ia. Na ia aumaia le faataitaiga o se alii na la faamasani e fafia i ai, ma ina ua uma sa la'u sootaga faaletino vavalalata, na ia manatu e le tutusa i laua ma e le'i taulau le faigaou. Na ia faaogaina lena aafiaga e fai ai lana finauga, ma na foliga lelei mai. I le faaiuga, na ou faamanino atu ia te ia ou te talitonu e mafai ona iloa lelei e le tasi le isi i isi auala, ma afai lua te faia fausia se faatuatuaga a o ola i le tulafono o le ola mama, o le a sili atu le lelei o le fesootaiga pe a oulua faaipoipo.

Anya: O le finauga sili ona taatele ou te faalogo soo i ai e faapea afai e alolofa tagata e toalua i le isi, ua LELEI; o sootaga vavalalata faaletino ua na o se faailoga o le alofa.

Martin: O se mea e oo mai i lou mafaufau pe a ou faalogo i le sisio lea "Ua alofa le tasi i le isi" o se upusii mai ia Peresitene Spencer W. Kimball.

Fai mai o ia e masani lava ona faaofi mai le tuinanau i le faitotoa pe a manatu tagata ua lagona le alofa.³ O le mea lena e tupu mo le tele o tagata pe a faia sootaga vavalata faaletino ae lei faaipoipo: o le tuinanau e tusa lava pe la te fai mai ua alofa le tasi i le isi. Afai e matuai alofa lava le tasi i le isi, o le a sili atu le faaaloalo o le tasi i le isi, lagolago le tasi, ma malamalamā e i ai le taimi mo sootaga vavalalata faaletino. Ma, ia te au, o le militino ae lei faaipoipo e iloa ai e le o matua lagolagoina e le tasi le isi e pei ona ouluu manatu ai. Aua afai e le mafai ona ouluu fesoasoani le tasi i le isi i le taimi nei i le tausia o o ouluu tulaga faatonuina, ona faapefea lea ona lagolagoina e le tasi le isi mulimuli ane?

Kaylie: O nisi tagata e le talitonu i le Atua e faapea o le Tusi Paia ma le tulafono o le ola mama ua le aoga. Na i ai ni au uo i le aoga maualuga na matua le talitonu lava i le Atua po o le le mautinoa foi—ma na i ai sau uo na le talitonu lava i aoaoga a lana lotu. Na ola lava ia e tusa ma mea na manao ai, o le mea na ia lagonaina e sao mo ia. O le sootaga vavalalata faaletino, i lona manatu, o se faamaliega-patino, ma soo se mea e taofia lena faamaliega e le manaomia.

Ou te manatu na ofo lau uo ou te talitonu i le Tusi Paia ma poloaiga a le Atua, ae na ou taumafai e fesoasoani ia te ia ia malamalamā ou te le manatu o poloaiga o se papupuni; ou te usitai i ai aua ou te maua ai le fafia sili atu. E ui lava ina feteenai o ma'ua manatu, ae na ia faaaloalogia au, ma sa avea pea i ma'ua o se uo lelei.

Liz: O nei manatu uma o loo i ai ni tali i mataupu faavae o le talalelei. Afai e te talitonu o i ai se Atua, afai e te talitonu o loo i ai se fuafuaga sili

atu, afai e te talitonu e i ai se tali atu mo oe lava ia, afai e te talitonu o loo i ai se tasi e alofa ma popole mo oe, ma afai e te talitonu o loo i ai sou taua maoae ona o oe o se atalii/afafine o le Atua—o lea la o le a sili atu lou manatu ia te oe lava e taua ma faaaloalo i lou tino. Afaia le iloa e tagata pe le talitonu i nei mataupu faavae, latou te vaavaai i isi tagata ma nofoaga e iloa ai po o le a lo latou taua.

O a uunaiga po o faataitaiga ua fesoasoani ia te oe e tautino atu ai ia usitai i le tulafono o le mama?

Hip: Na i ai sau uo ma te potu ua uma ona faamau. O se tasi aso na matou talanoa ai e uiga i lana faaipoipoga ua lata mai, ma na fesili se tasi, “O a ni tautinoga lua te manatu o le a fesoasoani e faatumauina ai lo lua malolosi?” O lana tali e faapea, “O le

le tausia o le tulafono o le ola mama e ono faaleagaina ai lo ma va. O lea ua ma filifili ai o le a ma le faia soo se mea o le a ma le maua ai le lagona lelei i luma o le epikopo po o ma matua.” O loo i ai pea lena uunaiga ia te au.

Jonathan: O lenei ua ou talavou matua, ua sili atu le faigofie ona faaologo i perofeta ma manatunatu i mea ua fai mai ai taitai o le Ekalesia. Ao le taimi muamua lava, na ou manatu o le tele o tiutetauave e pau i o tatou matua ma aiga. E mafai e le Ekalesia ona saunia faamatalaga ma le tele o mea maoae, ae o faataitaiga a lou aiga na matua fesoasoani ia te au e iloa ai o le talalelei o se mea lelei ma na te aumaia ia i tatou le fiafia.

Liz: Ao ou tuputupu ae, o le tagata o le Ekalesia e lalata mai le matua ia te au e nofo tuna ma le itula ma le afa mai le mea ou te nofo ai, ma na leai nisi tagata lotu i le aoga. Ae o le mea na sili ona ou faafetai ai e ui lava na o au, e o mai lava ou taitai i le Mutual; e o mai i le Seminare; e o mai lava e aoao mai au lesona—i taimi uma lava. E latou te lei faapea mai lava, “E, na o le tasi le tamaitiiti aoga o lea o le a leai ai se vasega nei.” Ou te mautinoa na ou aoaoina mea e tele, ae o le mea ou te matua manatua lava o ou taitai e tumau pea. Ma o latou, na ou maua ai avanoa e lagona ai le Agaga.

Ou te manatu e le mafai ona tatou matua faafetaia atoatoa le meaalofa o le Agaga Paia. E ui lava na i ai ou matua ma lou aiga ma taitai, ae a ou i ai i le aoga ua na o au lava. Ae na faatasi le Agaga ma au. O le mea lea soo se mea lava e faatumauina ai le Agaga i le olaga o se tasi o le a avea ma uunaiga maoae e fesoasoani i lena tagata e tausia le tulafono o le ola mama.

Lizzie: O se tasi o au uunaiga sili o le mauaina o se molimau mo au lava. Afaia e te le o mauaa malosi i le talalelei, e matua faigofie lava ona ui i se isi auala. Ae afai e te amata i le faamautinoaina ua e maua se faavae malosi o le talalelei, o le a mulimuli mai isi mea uma.

Hip: Afaia e te manao ia malosi faaletino, ia galue i ai, afai e te galue i ai, e te maua ni taui. Afaia tatou te faaaogaina lena aoaoga i le auala faaleagaga, e tatau ona tatou galulue i ai faaleagaga. E tele mea e tatau ona tatou faia mo le galulue i ai faaleagaga, e pei o le fatauina o tusitusiga paia ma le faia o mea uma tatou te mafaia ia maua ai le Agaga. E tatau foi ona tatou faatutuina ni sini ma galulue agai i na sini. Ae o le faataunuina o na sini, e le mafai ona tatou faia na o tatou. E manaomia le faatasi mai o le Alii ma i tatou. E mai ia te Ia le malosi ma le Agaga e manumalo ai i o tatou luitau. Ona tatou mulimuli lea i le tatalo mai a Peresitene Thomas S. Monson:

“Aua nei avea o outou tuinanau ma mea e lepetia ai o outou faamoemoega. Ia malo mai tofotofoga.

“Manatua upu mai le Tusi a Mamona: ‘O le amioleaga e le o le fiafia lea.’”⁴ ■

FAAMATALAGA

1. “O Le Aiga: O Se Folafolaga i le Lalolagi,” *Liahona*, Nov. 2010, 129.
2. Tagai i le Jeffrey R. Holland, “Of Souls, Symbols, and Sacraments,” i le *Brigham Young University 1987–88 Lauga o le Faeasaite ma le Faigalotu* (1988), 77–79.
3. “O le taimi o le tuinanau, e tulei ai i fafo o le isi faitotoa le alofa mama, ae tolotolo mai i le isi faitotoa le tuinanau. Ua suia le alofa i le manao o le tino ma le tuinanau le taupulea. O le talaina na avea lava ma aoaoga faavae ua naunau lava le tiapolo e faatulagaina, faapea o feusuaga i fafo atu o le faaipoipoga e tauamitonuina” (*Aoaoga a Spencer W. Kimball*, lom. Edward L. Kimball [1982], 279).
4. Peresitene Thomas S. Monson, “Ia Avea Oe Ma Faaa’oa’o,” *Liahona*, Me 2005, 113.



“Ou te le vaai i polo-aiga o ni pa pupuni; ou te usitai i ai ona latou te aumaia ia te au le fiafia sili atu.”

“O le a le uiga o le faamamalu i le perisitua a le Atua?”

Ole perisitua o le mana lea e fai ai e Tama Faalelagi ma Iesu Keriso a La’ua galuega. O le Perisitua o le mana silisili ese i luga o le fogaeleele. O le perisitua, e fai ai sauniga, tuuina atu ai faamanuiaga, faataunu ai galuega i le malumalu, talai ai le talalelei, ma fai ai vavega.

O e umia le perisitua e fai ma sui o le Faaola, o lea latou te faamamaluina ai le perisitua i le faia o mea semanu e fai e le Faaola pe ana i ai o Ia iinei. Latou te faamamaluina le perisitua i le ola agavaa lea. Latou te faamamaluina le perisitua i o latou ofu, amio, upu, auauanaga, ma mafaufauga foi.

O tamaitai talavou e mafai foi ona faamamaluina le perisitua i le tausia o a latou feagaiga o le papatisoga ma le auai ma le migao i sauniga o le perisitua e pei o le faamanatuga po o galuega o le malumalu. E mafai ona latou lagolagoina o latou tama, tuagane, ma isi perisitua i le tausia o poloaiga ma ola agavaa e faia o latou tiute faaleperisitua.

E mafai ona tatou faamamaluina uma le perisitua i le auauna atu lea ma le faamaoni i o tatou valaauga, i le ava lea ia i latou e umia le perisitua, i le ava lea i galuega a le perisitua, ma le faaaloalo lea i sauniga ma feagaiga e fesoasoani le perisitua ia tatou mauaina.

La Amio e Pei o se Sui o le Atua



A mafai ona tatou amata malamalama i le ofoofogia o le tuuina mai e le Atua o lenei meaalofa ia i tatou, ona faigofie lea ona faamamaluina le perisitua. Ia faaalia le lotofaafetai ma le faaaloalo i le mana ua

faameaalofaina ai outou. Fesili ia te oe lava ia, afaia iloa uma e i latou o siomia au o loo ia te au le mana o le Atua, pe o le a sili atu ea pe itiiti lo latou manatu ia te Ia? O le faamamaluina lena o le perisitua—o le iloaina lea o oe o

se sui o le Atua ma le faia o le mea sili ia amio i se auala e faaalia ai le faaaloalo i le faatuataga ua Ia tuuina mai ia te oe.

Mason R., 19 tausaga, Colorado, ISA

Ia Amio Mama



I le avea ai ma se tamaitai talavou e mafai ona ou faapea e le tau manaomia fua lou faamamaluina o le perisitua. Ae o tamaitai talavou uma lava e manaomia le faia o lea. Tatou te faamamaluina le perisitua e ala i le amio mama. Tatou te faamamaluina le perisitua i le fesoasoani lea i alii talavou ia maua mafaufauga mama. E fai o tatou ofu talafeagai ma tautala i le gagana mama. O le faia o lea, tatou te fesoasoani ai i alii talavou e faamamalu le perisitua, ona tatou faamamaluina foi lea o le perisitua.

Marisa B., 14 tausaga, Arizona, ISA

Fai Lou Tiute i le Atua

O le auala sili e faamamalu ai le perisitua i lo’u manatu, o le faia o mea semanu e fai e le Alii pe ana fai e i ai o Ia i le lalolagi, ona o loo tatou sui ia Iesu Keriso. O lona uiga o le faataunuina lea o tautinoga uma, tiute, ma folafolaga na tatou faia ma le Atua ina ua faauuina i tatou i le perisitua. O le faamamaluina o Lana Perisitua, o lo tatou mulimuli lea i Lana poloaiga ia “tutulai ia ma susulu atu, ina ia avea lo [tatou] malamalama ma tagavai mo atunu” (MF&F 115:5). Tatou te fesoasoani i isi ia iloa e tele auauna faauuina a le Atua i le lalolagi.

Bismarck B., 18 tausaga, Santo Domingo, Dominican Republic

O tali ua faamoemoe e mo se fesoasoani ma ni manatu, ae e le o se faalauiloaga aloaia o aoaoga faavae o le Ekalesia.

Faaalia le Faaaloalo mo le Perisitua

Ou te manatu o le faamamaluina o le perisitua o le mauaina lea o le faaaloalo ma le talitonu i le faaaogaina o le perisitua. Pe afai o i ai ni Perisitua Arona e faaaloalo i le perisitua ma le faamanatuga e pei ona matou faia i la matou uarota, ona outou maua lea o ni aafiaga maoae i le tufaina ma le saunia o le faamanatuga. E fai o tatou ofutino papae ma fusiu. Ua tatou iloa e faia ai se aafiaga maoae i le uarota, ma ua i ai foi se aafiaga ia te au. Ou te iloa o le umiaina o le perisitua o le mea silisili lea ua tupu ia te au.

Hansen B., 15 tausaga, Texas, ISA

Aua Nei Faia se Fetuunaiga i Ou Tulaga Faatonuina

O le faamamaluina o le perisitua o lona uiga o le le tuuina lea o oe i tulaga e te iloa e fai ai se fetuunaiga o ou tulaga faatonuina. Ina ua matou aoaoina le Feagaiga Tuai i le seminare, na matou maua i le Kenese 39 le faataitaiga a Iosefa i Aikupito i le faamamaluina o lona perisitua i le sola ese lea mai le ava a Potifara.

O le tasi auala mo tamaitai talavou e fesoasoani ai ia i matou e faamamalu le perisitua o le mulimuli lea i tulaga faatonuina ma ofu talafeagai o loo i le *Mo Le Malosi o le Autalavou*. Iosefa B., 16 tausaga, Texas, ISA

Lagolago le Perisitua

O le faamamaluina o le perisitua ia te au o le faaaloalo lea o alii talavou ma lagolago le meaalofa ua tuuina mai e le Alii ia i latou. Pe a ou vaai i se alii talavou o faaaloalo i le perisitua, ou te lagonaina le filemu sili atu ma sili atu

ai lou faaaloalo i alii talavou. Ua faamoemoeina ma tuuina atu e le Tama Faalelagi ia te ia le perisitua, ma ou te lagona o le tiute lea o le alii talavou e le gata i le umia o le perisitua a ia puipuia foi.

Melinda B., 16 tausaga, Washington, ISA

Manatua le Faaola



O le perisitua e na o le pau lea o le mana moni o le Atua i le lalolagi ma ua faailoa mai ai ia i tatou le ala e toe foi atu ai ia te Ia. Pe afai tatou te mafaufau i le faamamaluina o le perisitua, ua tatou mafaufau i le mulimuli i aoaoga mai ia Peresitene Thomas S. Monson ma isi Apostolo. O le auala sili e faamamalu ai le perisitua o le faia lea o mea ua aoaoina ai i tatou, lena e mafai ai ona tatou manatua le Faaola. Pe afai tatou te manatua o Ia, o le a faatasi Lona Agaga ma i tatou. O le mauaina

o le Agaga e mafai ai ona tatou tumau i le ala sao ma avea ma faataitaiga o tulaga faatonuina o le talalelei.

Vasega o le Aoga Sa: Kylie E., Jaiten B., Joseph E., Alexandra R., Kaylie V., Alisha F., ma Haylee W. (e leo pueina); Idaho, ISA



E PAIA

"O alii ma tamaitai talavou . . . e tatau ona faamamalu [le perisitua] ma ia iloa o se mea paia, . . . aua o le mana o lenei pule e faataunuina ai sauniga o le talalelei i le lalolagi atoa ma nofoaga paia uma, ma a aunoa ma lea e le mafai ona faataunuina. O i latou ua umia lenei pule e ao ona latou faamamalu i ai ia i latou lava. Ia ola i latou ina ia agavaa mo le pule ua tuuina atu ia i latou."

Peresitene Iosefa F. Samita (1838–1918), Aoaoga a Peresitene o le Ekalesia: Iosefa F. Samita (1998), 144.

O LE ISI FESILI

"O le a lau tali i tagata lotu ese e fesili mai pe aisea e le ola ai nisi tagata o le Ekalesia i o tatou tulaga faatonuina?"

Auina mai lau tali ao le'i oo ia Novema 15 i le liahona@ldschurch.org po o le:

*Liahona, Questions & Answers 11/12
50 E. North Temple St., Rm. 2420
Salt Lake City, UT 84150-0024, USA*

E ono faapupuuina tali mo le uumi po o le manino.

O le faamatalaga ma le faatagaga o loo i lalo e tatau ona aofia mai i lau i-meli po o le tusi: (1) igoa atoa, (2) aso fanau, (3) uarota po o le paranesi, (4) siteki po o le itu, (5) lau faatagaga tusitusia, ma, afaia e itiiti ifo i le 18 ou tausaga, o le faatagaga tusitusia a ou matua (e talia foi le i-meli) e lolomiina ai lau tali ma lou ata.

IA ATAMAI
MA IA AVEA
MA SE UO





**Saunia e Elder
Robert D. Hales**

O Le Korama a
Apostolo e
Toasefululua

*Aoao ma maua le
malamalama ma le poto
i lou talavou. Ma siitia
ma faamalolosia i latou
o siomia ai oe*

Afai e te manao moni lava ia e maua se olaga lelei, o le a e manao e mulimuli i le fautuaga i mau: “Aoao le poto i lou talavou; ioe, aoao i lou talavou e tausi i polo-aiga a le Atua” (Alema 37:35). O le faagasologa o le aaoaina e ono faapuupuuina faapea:

Tatou te amata uma lava i le atamai faavae. Tatou te faaopoopo i ai le malamalama faatasi ma le aaoaina e maua mai le potu aoga ma le faitau tusi. Tatou te faaopoopo i ai aafiaga o le olaga. Ona tatou oo lea i le laasaga lona fa: Poto O iina e gata ai le lalolagi. Ae o loo ia i tatou se mea e leo maua e le lalolagi. I luga atu o le papatisoga ma le faamauga, na tuuina mai ai ia i tatou le meaalofa o le Agaga Paia. E faavae i lo tatou faamaoni i tulafono, sauniga, ma feagaiga tatou te tauaveina i le papatisoga, i tautinoga masani ma fai soo

i sauniga faamanatuga, ma i feagaiga o le perisitua ma le malumalu, o le a i ai pea le meaalofa o le Agaga Paia e aoao ma taitai tatou. E taitai tatou e le Agaga Paia ia gaoioi ma fai loa. Ua tofu i tatou uma ma meaalofa ma taleni faaleagaga (tagai i le MF&F 46).

O le poto faaopoopo i ai ma meaalofa faaleagaga e taitai atu ai i se malamalama i le loto. “O le poto o le mea sili lea; ia maua le poto: O mea uma e te maua ia maua mai ai le atamai” (Faataoto 4:7). E taua le atiina ae o le poto ma le malamalama i lou talavou.

O se aafiaga mai lou talavou na aoao ai au i se mea e uiga i le poto. O au o se tamaititi mai le taulaga, o lea na auina atu ai au e lo'u tama e galue i le faatoaga a le toalua o le uso o lou tina i Iuta i sisifo. Ao ou i ai iina, sa matuai ou le malamalama lava pe aisea, i le afe o eka e filifili mai ai, e tuu lava ulu o pov i fafo o le pa ueae e ai vao i le isi itu o le pa. Pe ua e mafaufau ea i le faapena foi o i tatou? O le a tatou tulei pea sei vaai po o a tuaoi i fafo atu, ae maise lava i lo tatou talavou I le avea ai ma tagata soifua—le tagata faalelalolagi—tatou te matele lava i le tulei atu i le pa

ueae ma momono o tatou ulu i fafo. Aisea tatou te faia ai lena mea?

E mafai ona tatou maua le tele o le olioli i le olaga e aunoa ma le tuleia o tuaoi. Manatua, “O le poto o le mea sili lea,” faatasi ai ma lena poto, “Aua e te alu i le ala o e agasala, aua foi e te ui i le ala o e fai amio leaga. Ia e taumamao mai ai, aua nei ui atu i ai, ia e alo ai, ma alu ese” (Faataoto 4:14–15). Aua e te latalata mai. Aua le tuuina lou ulu i fafo o le pa ueae.

Pe o I Ai Ni Au Uo Lelei?

O le a e matauina, faatasi ai ma nei aaooga i le poto, o loo aoao mai foi le tusi o Faataoto e uiga i le filifilia o uo lelei: “Aua e te alu i le ala o e agasala, aua foi e te ui i le ala o e fai amio leaga” (Faataoto 4:14). “Lou atalii e, aua tou te o i le ala faatasi ma i latou, taofi ia ou vae nei ui i lo latou ala: aua ua taufetuli o latou vae i le leaga” (Faataoto 1:15–16).

E faapefea ona e iloa o loo ia te oe ni uo lelei? O le a ou tuuina atu ia te oe ni suega se lua. Afai e te faaaogaina nei suega, o le a e le ui lava i ala ese ma se ese mai le “ala lauitiiti ma le vaapiapi e tau atu i le ola e faavaau” (2 Nifae 31:18).



1. O ue lelei e faigofie ai ona tausi poloaiga pe a e faatasi ma i latou. O se ue moni e faamalosi atu ia te oe ma fesoasoani ia te oe e usitai i mataupu faavae o le talalelei na o le a fesoasoani ia te oe e tumau ai sei oo i le iuga.

2. O se ue moni o le a le tuuina atu ia te oe e te filifili i le va o ona ala ma ala o le Alii, lea o le a aveesea ai oe mai le ala sao ma le vaapiapi. O loo fealuai le fili i lenei lalolagi ma e matuai manao lava ia i tatou uma taitoatasia i pauu. Afai o ave oe e au ue i ala o le amioleaga, alu ese mai ai nei. Filifili ma le poto au ue.

O Le a le Ituaiga Uo e I Ai Oe?

Ou te fai atu nei se fesili faigata:
O Le a le Ituaiga Uo e I Ai Oe?

O loo i ai se mea sili atu i le olaga nai lo le faaolaina o i tatou lava. Ua tofia i tatou ia siitia ma faamalolosia i latou uma o loo siomia ai i tatou. E finagalo le Alii ia tatou toe foi uma atu faatasi ia te Ia.

O oe o se moli o le ava, ma e leai se mea sili ona matautia nai lo se moli o le ava ua pau. Manatua po o ai oe: O oe o se malamalama i le lalolagi, i au ue, i ou uso ma tuafafine. O oe o le latou te vaavaai atu i ai.

Faaauau le Faataoto 4:

“A o le ala o e amiontu e tusa ia ma le malamalama o le ao, o loo tupu pea lona malamalama e oo i le tutonu o le la.

“O le ala o e amioleaga e tusa lea

ia avea ma se malamalama i le lalolagi ma taitai ma faafoe i latou o siomia oe i ala o le amiontu.

O loo faalagolago mai i latou ia te oe o se moli o le ava faamaoni.

ma le pogisa: Latou te le iloa le mea latou te tausuai ai” (fuaiupu 18–19).

Latou te le iloa lava pe aisea ua latou tausuai ai. E leai so latou malamalama, leai se auala.

O e iloa pe faapei le faalagolago i se moli o le ava pe a leai se moli iina? O le taunuuga o le pogisa, ma ua tatou leiloloa.

Pe afai ua leai se malosiaga faaletise a se ave vaalele, ua leai ni ana taiala vagana na mea e galulue e aunoa ma se eletise. E lagona e ia le matuai leai lava o se faamoemoe pe afai o loo i totonu o se vaalele tau nofoa tasi e 40,000 futu (12,200 m) i

le ea o loo featofai ai e ao ma isi mea. Ua leai ma sona taiala. Na ou sao mai se aafiafaapena, ma ou te faafetai ua ou i ai iinei. O se aafiafa o le a le mafai lava ona galo. Atonu o le a i ai se aso o le a e oo ai foi oe lava i se tulaga faapena. E leai se mea e sili ona matautia e pei o se moli o le ava ua pau, ae maise pe a'o e faalagolago i le malamalama.

Pe o faalagolago mai se tasi i lou malamalama e taialaina ai o ia? Ia avea ma se faataitaiga lelei. Ia avea ma se malamalama i le lalolagi ma taitai ma faafoe i latou o siomia oe i ala o le amiontu. O loo faalagolago mai i latou ia te oe o se moli o le ava faamaoni. Ia e i ai iina pe a manaomia oe e se tasi.

O le Agaga o le malamalama taiala e aumaia le olioli ma le fiafia. Ia aua lava nei o tatou taofia le Agaga e faatasi ma i tatou ona o a tatou amio. Aue, ou te tatalo pe a le a le tuua toatasi i tatou ma faanoanoa i lenei lalolagi “pouliuli ma le pagatia” (1 Nifae 8:4).

Tau ina ia i ai faamanuiaga a le Alii ia te outou ao outou tauivi e aoao ma maua le malamalama ma le poto i lo outou talavou. Ia outou maua foi le poto ma le malamalama i o outou loto o mea moni o le talalelei e ala i le usitai faapea foi ma le Agaga, o le Agaga Paia lea. Ia avea o se ue lelei. Siitia ma faamalolosia i latou o siomia ai oe. Ia faia le lalolagi o se nofoaga sili atu ona sa e i ai iinei. Fesoasoani i au ue ia tumau i le ala sao ma le vaapiapi, tumau sei oo i le iuga, ma toe foi atu ma le mamalu. ■

FAIGA O LAEI mo se Siva

Saunia e Crystal Martin

Na faaosoosoina au e mulimuli i le toatele, peitai na oo ina ou iloaina e manaomia ona avea au ma faataitaiga.

Ao avea au ma se talavou laitiiti, na faigata i nisi taimi le ola i le talalelei. O le nofoaga na ou nofo ai e le toatele ni tagata o le Ekalesia, ma o au uo le lolotu na sili ai ona faigata i nisi taimi ia te au ona tumau i le ala sao.

"Ofu lea; e fetaui lelei ma le lanu o ou mata," na fai mai ai se tasi o au uo a o lei faia le siva. Na ia uuina i luga se ofu na ia tuuina mai ou te faaaogaina, ae e leai ni lima. Na ou filifili e fai le ofu faatasi ma se taoofu.

Ina ua ou taunu i le siva, e leai se isi na ofuina se ofu e i ai ni lima, ma na ou lagonaina lo'u tumatilatila. Ina ua amata ona ou vevela tele, na fai mai a'u uo e na ona aveese lava o le ofu ona sili atu lea ona ou aulelei.

O le taimi lava na ou tago atu ai o le a aveese le taoofu, na ou manatua ai lou faamanuiaga faapeteriaka. Na tau mai e lou faamanuiaga ia te au o le a tele ou faaosoosoga ma afai ou te pau, e tele tagata o le a mulimuli mai ia te au. O iina na ou iloaina ai na manaomia lou tumau i le ala sao—e le gata mo au lava ia ae mo isi foi o loo vaai mai i luga ia te au. Na ou filifili e fai pea le taoofu.

O nisi taimi e ulagia au mo le le faia o mea o loo fai e tagata uma lava, ae na tumau lou malosi ma na faamanuiaina ona o lena mea. Na ou iloa mulimuli ane e toatele tagata na vaai mai i luga ia te au. O nisi o au uo na iu ina fai mai ia te au na latou faaaloalo ia te au mo le mulimuli i o'

tulaga faatonuina. Na latou faatoese mai mo le faatiga mai ia te au mo le le faia o mea na faia e tagata uma lava i le aoga mauluga.

Ona sa ou mulimuli i tulaga faatonuina o le Ekalesia ma taumafai e fai ma faataitaiga, na mafai ai ona ou maua ni aafiaga faafafeautalai ma aoao atu le talalelei i isi. Semanu ou te le mafai ona faatosina mai isi pe ana ou le tumau i le ala sao. ■



TULAGA FAATONUINA O OFU

"Ia aua lava nei e tuu maulaloina ou tulaga faatonuina o ofu. Aua nei faaaogaina se faatasiga faapitoa e fai ma 'alofaga o ofu le talafeagai. . . . E tatau i tamaitai talavou ona aloese mai . . . lavalava e aliali ai tauau."

Mo Le Malosi o le Autalavou (tamaitusi, 2001), 10-11.

Ofu ma Foliga Vaaia: “TUU ATU I LE AGAGA PAIA E TAITAI”



**Saunia e
Mary N. Cook**

Fesoasoani Muamua i
le Au Peresitene Aoao
o Tamaitai Talavou

I le avea ai ma sui o Keriso, tatou te faaalia le faaaloalo mo o tatou tino “i taimi uma ma i mea uma, ma i nofoaga uma” e ala i le usitai i tulaga faatonuina faapitoa.

Efai lava e Kim ofu talafeagai i taimi uma. I se tasi aso na ou fesili ai mo lona manatu po o le a le mea e ta'u o le sakete talafeagai, palausi talafeagai, ma se ofu taele talafeagai. Nai lo le talanoa mai i fua mo le uumi ma ua o ofu, na ma talanoaina mataupu faavae e ogatasi ma ofu talafeagai ma le luitau o le mauaina o ofu talafeagai e foliga manaia. Na ma maua le fiafia i le mafaufauna o auala eseese e fou e faaumi ai se sakete. Na iu ina faapea mai Kim, “Afai ou te le mauaina se lagona lelei pe a faatoa fai se ofu, e masani lava o lona uiga e le talafeagai ma o le a ou le maua se lagona lelei pe a ofu. Ua ou aoao e aua lava le faatauina. Na o le toe tuu lava i le fata.”

Ao taumafai Kim e ola agavaa, e mafai e le Agaga Paia ona taitaia o ia i lana filifiliga o lavalava. E ola faamaoni o ia i tulaga faatonuina o laei talafeagai ma e le taumafai e sui tulafono o ofu ma foliga vaaia. E malamalama o ia o lona tino o se malumalu (tagai i le 1 Korinito 3:16) ma e i ai sona tiutetauave e tausia, puipuia, ma faafuina tatau.

Ao fausia se malumalu, e tele le faaeteetega

e manaomia ia mautinoa ua puipuia ma teuteuina matagofie, i totonu ma fafo. O le ki i le fuafuaina o malumalu o le malamalama lea o se malumalu *e sua* le Alii—o Lona maota. Tatou te *faaaloalo* i malumalu o ni fale e ulu atu ai na o e agavaa. Tatou te *faaaloalo* i malumalu ona o sauniga ma feagaiga paia tatou te faatinoina ai e mafai ai ona tatou toe foi atu i lo tatou Tama Faalelagi.

E sili atu le taua o lou tino nai lo le malumalu sili ona taugata i le lalolagi. O oe o se atalii po o se afafine pele o le Atua! O nei lava aoaoga faavae—fai ma sui, faaaloalo, ma le migao—e sili atu le aoga mo le tausia ma le puipuiga e te tuuina atu i lou tino.

Fai ma Sui

Ao tatou fetagofi atu i le faamanatuga i vaiaso taitasi, ua tatou tauaveina i o tatou luga le suafa o le Faaola. O i tatou o Ona sui i le lalolagi. O se tasi o laina taiala i le *Mo Le Malosi o le Autalavou* e faapea: “O ou ofu ma foliga vaaia, e mafai ona e faaalia [i le Alii] le taua tele o lou tino. E mafai ona e faaali atu o oe o se soo o Iesu Keriso ma e te alofa ia te Ia.”¹

Ina ua faitau se tasi tamaitai talavou i lenei fuaiteau, na filifili loa o ia e le toe fia savali latalata i le laina o le le tauagafau. Na vave loa ona ia aveesea soo se mea na i lana pusatu na le talafeagai ma lona avea ai ma sui o le Faaola. Na ia fai mai, “O le a avea au ma tagata poto pe afai ou te le faataitaia soo se ofu i faleoloa ou te iloa o le a ou le ofuina.

Aisea e faaosooosoina ai fua?" O le mataupu faavae o le fai ma sui na fesoasoani ia te ia e fai lena faaiuga mausali.

Faaaloalo

I le avea ai ma sui o Keriso, tatou te faaalia le faaaloalo mo o tatou tino "i taimi uma ma i mea uma, ma i nofoaga uma" (Mosaea 18:9) e ala i le usitai i tulaga faatonuina faapitoa. E manaomia e le Alii na o i latou e mama e mafai ona ulu i le malumalu. O lau filifiliga ina ia amiomama o le faailoga lea o lou faaaloalo mo le Alii ma lou tino faaletino.

E tatau foi ona tatou faaalia le faaaloalo i tino o isi ma fesoasoani ia latou ola i ni olaga mama. Na saunoa mai Elder M. Russell Ballard o le Korama a Aposetolo e Toasefululu: "[O tamaitai talavou] e tatau ona latou malamalama a fai ni o latou ofu e fufusi tele, pupuu tele, po o ni ofu e maualalalo tele ua, ua le gata ina latou auina atu se feau sese i alii talavou latou te miomio faatasi, ae ua latou faaputuputuina foi i o latou mafaufau le talitonuga sese e faapea, o le tulaga faatonuina o se tamaitai e fitoitonu lava lea i ona foliga faaletino. O lenei faauigaga e lei i ai lava i le faauigaga amiontonu o se afafine o le Atua."²

Tamaitai talavou, faaaloalo i lou tino ma fesoasoani i isi, ae maise lava alii talavou, faatumauina mafaufauga ma amioga mama. Faaaloalo i lou tino, ma le iloa o le *ola* amiontonu i aso uma e te maua ai *tulaga faataua-inā* faavavau.

Migao

Na aoaoina i tatou e Elder Robert D. Hales o le Korama a Aposetolo e Toasefululu: "E pei ona faaalia i laufanua o le malumalu ia le paia ma le migao mo sauniga o loo faia i totonu o le malumalu, o o tatou lavalava

foi, e faaalia ai le matagofie ma le mama o o tatou tagata i totonu. O le faiga o o tatou lavalava e faaalia ai tatou te faaaloalo lelei i . . . sauniga o le malumalu ma feagaiga e faavavau ma pe ua tatou saunia mo le mauaina o ia sauniga ma feagaiga."³

Faaali lou migao mo le taulaga togiola a lou Faaola i le faia o ou "ofu sili ona lelei" pe a auai i sauniga o le faamanatuga. "E tatau i alii talavou ona faia ofu e mamalu ai pe a faatinoina le sauniga o le faamanatuga."⁴ Tamaitai talavou, fai ofu e talafeagai.

Tulai ia! Ia avea ma faataitaiga o ofu talafeagai i le fale, aoga, matafaga, siva, po o le taaalo foi i taaloga. Mulimuli i le faataitaiga a Kim i le filifiliga o ou ofu, i le tuuina atu i le Agaga Paia e taitaia oe i au filifiliga. Ia fesili ifo ia te oe lava, 'Faamata ou te maua le lagona toafimalie lelei i o'u foliga vaaia pe a na fai o loo ou i ai i le afioaga o le Alii?"⁵

Afai tou te ola i nei mataupu faavae e tolu o le—fai ma sui, faaaloalo, ma le migao—pe a outou filifilia o outou ofu, o le a *outou susulu atu* (Mataupu Faavae ma Feagaiga 115:5) o ni sui pele o le Faaola. ■

FAAMATALAGA

1. *Mo Le Malosi o le Autalavou* (tamaitusi, 2011), 7.
2. M. Russell Ballard, "Tina ma Fanau Teine," *Liahona*, Me 2010, 18–21.
3. Robert D. Hales, "Tauagafau: Faaaloalo mo le Alii," *Liahona*, Aok. 2008, 20.
4. *Mo Le Malosi o le Autalavou* 7.
5. *Mo Le Malosi o le Autalavou* 7.



FAAMALOSIA

E LE UPU

Ua molimau talavou laiti i taimi na aoaoina ai i latou, faamafanafanaina i latou, ma taitaiina i latou e tusitusiga paia,



E FESOASOANI MAU I TAIMI E MANAOOMIA AI

"O tusitusiga paia e pei lava o ni tamai sulu e faamalamalama ai o tatou mafaufau ma saunia i tatou mo taitaiga ma musumusuga mai luga. . . . E mafai ona oo mai se mana maoae mai le taulotoina o mau. O le taulotoina o se mau o le fatuina lea o se faigaou fou. E pei o le mauaina o se tagata fou e mafai ona fesoasoani mai i se taimi o puapuaga, tuu mai musumusuga ma faamafanafanaga, ma avea o se punavai o uunaiga mo suiga manaomia.

Elder Richard G. Scott o le Korama a Apostolo e Toasefululua, "O Le Mana o Tusitusiga Paia," *Liahona*, Nov. 2011, 6.

Na matou fesili atu i talavou e tau mai ni taimi na fesoasoani ai ia te i latou se mau na latou taulotoina, e pei ona sauoa i ai Elder Richard G. Scott o le Korama a Apostolo e Toasefululua ia Oketopa 2011 i le konafesi aoao (tagai i le tulimanu). O nisi nei o a latou tali mai.



Filemu i Lo'u Agaga

"Lo'u atalii e, ia filemu lou agaga; o lou tiga ma ou puapuaga o le a na o sina minute laititi; (MF&F 121:7).

O le mau na aumaia ia te au le mafanafana i le tele o tausaga o le Mataupu Faavae ma Feagaiga 121:7, ao i ai le Perofeta o Iosefa Samita i le Falepuipui o Liperate ma tagi atu i le Tama Faalelagi mo le fesoasoani. Na ou taulotoina lenei fuaiupu i le seminare ma e tauloto pe a ou manaomia le faamafanafanaga. Na te faamanatuna maia ia te au e alofa lou Tama o i le Lagi ia te au ma na te silafia ou puapuaga. Ou te faaaogaina lenei fuaiupu e aumaia ai le filemu i taimi o le popole ma le vaivai.

Na fesoasoani lenei fuaiupu ia te au ao ou i ai i se pati na liua i se siosiomaga na ou iloa e le tatau ona ou i ai. Na ou fai atu ma le faaaloalo i au uo e leai, ina ua latou fai mai ia te au e inu pia ma ulaula. Na aumaia e lenei fuaiupu ia te au le malosi na ou manaomia e tu atu ai mo ou talitonuga.

Na fesoasoani foi lenei fuaiupu ia te au e faia se filifilia faigata. Ma te lei o eseese lava ma lau uo mo le lima

tausaga. Na ma taaalo faatasi, o faatasi i malaga, ma tafafao i faaiuga o vaiaso. Ae na amata ona latou tafafao ma ni uo e matutua atu ou te le'i manao e faatasi atu i ai. I le faaiuga na ia tuu mai ia te au e filifili pe avea ia ma au uo pe tumau pea i ou talitonuga i le Upu o le Poto ma le tulafono o le ola mama. Na ou mafatia. Ou te lei iloaina e mafai ona matua faigata tele le tu atu mo le mea ou te talitonu i ai. Ae na ou filifili e fai ni uo fou, ma teuina pea i le mafaufau le folafolaga a le Tama Faalelagi ia Iosefa Samita o le a lelei mea uma.

E leai se mea e sili atu e suia ou talitonuga, ma ou te mauaina le fiafia moni ma tumau pe a ou filifilia le mea sao. Na faamaflosia e lenei mau lau molimau ma tuuina mai ai le fesoasoani ina ua ou manaomia.

Lauren J.

16 tausaga, Arkansas, ISA

O Mea Vaivai e Avea ma Mea Malolosi.

Ua toe oni masina fai le suega ulufale mo le aoga maualuga, na ou lagonaina lou le saunia. Na ou mautinoa e matua le mafai lava ona manuia le suega. O lea na ou liliu atu ai i lou Tama Faalelagi i le tatalo. Ao ou tatalo, na oo mai nei upu i lou mafaufau: "Afai e o mai tagata ia te au o le a ou faaali atu ia te i latou o latou vaivaiga. Ou te avatu i tagata ia vaivaiga ina ia faalotomaualalo ai i latou; ma ua lava lo'u alofa tunoa mo tagata uma o e latou te faalotomaualaloina i latou lava i o'u luma; aua afai latou te faalotomaualaloina i latou lava i o'u luma, ma faatuatua ia te au, ona ou faia lea o mea vaivai ia avea ma mea malolosi ia te i latou" (Eteru 12:27).

Na ou iloaina afai ou te tatalo i le Tama Faalelagi mo le malosi e feagai ai ma luitau ma tofotofoga, Na te faamanuia au ma fesoasoani ia te au e manumalo i ou vaivaiga. O le tuuina atu o lou popolega i le Alii o le filifilia sili lea na mafai ona ou faia. O Ia o le faiaoga sili, ma ou te iloa na fesoasoani o Ia ia te au.

Irvin O.

16 tausaga, El Salvador





Tatalo E Le Aunoa

"Tatalo e le aunoa, ina ia mafai ona e sau ai o le ua manumalo; ioe, ina ia mafai ona e manumalo ia Satani, ma ina ia e sao ese mai lima o auauna a Satani ua sapasapaia lana galuega" (MF&F 10:5).

E fesoasoani lenei fuaiupu ia te au e feagai ai ma faaosoosoga. Pe afai o le a ou faia se mea ou te iloa e sese, e oso mai lenei fuaiupu ma lana savali i lou mafaufau. O taimi uma lava ou te tatalo ai pe a ou mauaina lena uunaiga, ou te mauaina ai le fesoasoani ou te manaomia e manumalo ai i faaosoosoga o loo ma feagai.

Jesse F.

17 tausaga, Utah, ISA

O Loo Ta Faatasi ma Oe

"Onosai i puapuaga, ona o le a tele o le a oo mai ia te oe; ae ia e onosaia i latou, aua faauta, ua ou faatasi ma oe, e oo lava i le iuga o ou aso" (MF&F 24:8).

O se faamanuiaga le taulotoina o lenei mau, ae maise lava pe a ou lagonaina le fefe ma le tuuatoatasi. Soo se taimi lava ou te manatua ai, ou te mauaina le toa ma se faalogoaga sili atu. I le avea ai ma ni alii ma tamaitai talavou, matou te manao-mia le taitaiga ma le lagolago, ae maise lava pe a feagai ma tofotofoga ma luitau faigata. E ui lava o nisi taimi e foliga le mautinoa ma faavavai-lo tolo le lumanai, ou te iloa e mafai ona ou faalagolago i le Alii ma mauaina Lana opo mafanafana.

Ao ou laitiit, na aoaoina au i le aiga ma le Peraimeri o le a faatasi mai pea le Alii ia te au pe afai ou te faia lau vaega. Ona o na aoaoga faapea foi ma lenei mau, ou te iloa e mafai ona ou faalagolago ia te Ia e le aunoa.

Sofia I.

15 tausaga, Uruguay

FAATU SE SINI

Mafaufau e faatu se sini ia tauloto ni mau. E mafai ona e taulotoina fuaiupu o mau autu po o se vaega o le Tiute i le Atua po o le Alualu i Luma o le Tagata Lava ia.



E SA'O MA VAAPI API **LE ALA**

E tele auala e filifili ai, ae na o le tasi
e tau atu i le ola faavavau.

(Tagai i le 2 Nifae 9:41; 31:17-21; Alema 7:9.)



Sii Ese Atu Mai

*Pe a oo mai le taimi e sii atu ai i Alii ma Tamaitai Talavou,
o nai aafiaga nei e mafai ona e tulimatai fiafia i ai.*

O LE A LE UIGA O ALII TALAVOU?



O Le Perisitua Arona—E Auauna atu i Isi mo le Faaola

Tufaina o le Faamanatuga
Aoina o le taulaga anapogi
Faamalolosia lou aiga

Tiute i le Atua


Aoaoina ma faia mea fou
Faasoa atu i isi
Atiina ae o se faia vavalalata
ma Tama Faalelagi

Mo Le Malosi o le Autalavou

Tulaga faatonuina e faamalosia oe

Sauniaina o Oe Lava ia

Mo se misiona
Mo se faaipoipoga ma le tulaga
faatamā



Alu i le Malumalu

Ia papatisoina mo e ua maliliu
Saunia e osia feagaiga
Lagonaina o le Agaga Paia

Gaoioiga

Auauna atu faatasi ma lau korama
Fiafiaga i le Mutuale!

Mo alii talavou o le Peraimeri,

Pe a 12 ou tausaga, o le a lava lou matua e te mauaina ai le Perisitua Arona. E taua tele lenei mea. Pe a tuuina atu e le Atua ia te oe Lana perisitua, ua la tauina atu ia te oe Na te talitonuina oe. O le a avea ma ou tiute paia le auauna atu i isi e pei ona o le a faia e le Faaola.

O le taimi lenei e amata saunia ai. Vaavaai ma faalogo i le au perisitua o siomia ai oe ao latou faamanuia ma tufatufa le faamanatuga, papatiso, tuuina atu faamanuaga, auauna i ni misiona, ma taitaia ni aiga. Ia faia i taimi uma le mea sili ia ola ai i tulaga faatonuina o le talalelei. Ona saunia ai lea o oe mo lena aso tele pe afai o le a e mauaina le Perisitua Arona.



Ma le faamaoni lava,

David L. Beck

O le peresitene aoao o Alii Talavou

le Peraimeri

O LE A LE UIGA O TAMAITAI TALAVOU?

Uo Fou

Aoaoina ma le mauaina o le fiafia faatasi
Lagolagoina o le tasi ma le isi

Faateleina Lou Faatuatua ia Iesu Keriso

Tu atu mo le upu moni ma le amiotonu
Faasoa atu lau molimau

Mo Le Malosi o le Autalavou

Tulaga faatonuina e faamalosia oe

Alualu i Luma o le Tagata Lava la

Mea fou e aoaoina
Faatutu ni sini ma tuputupu ae
i le amiomama

Alu i le Malumalu

Ia papatisoina mo e ua maliliu
Lagonaina o le Agaga Paia
Saunia e osia feagaiga

Gaoioiga

Auauna atu faatasi
Fiafiaga i le Mutualie!

Sauniaina o Oe Lava ia i le avea ai ma se Afafine o le Atua

Ina ia avea ma se taitai
ma se faataitaiga lelei
Ina ia avea ma se ava
ma se tina faamaoni



Mo tamaitai talavou o le Peraimeri,

Ua matou sagisagi fiafia lava mo le aso o le a outou o mai ai i Tamaitai Talavou! O oe o se afafine faapelepele o le Tama Faalelagi. I Tamaitai Talavou o le a e aoao ai e tu atu o Sana molimau i taimi uma ma mea uma ma nofoaga uma. O le a e mauaina se filifili e faamanatu ai ia te oe ina ia e tu atu mo le upu moni ma le amiotonu ma tuuina atu le malamalamo o le Faaola ia susulu atu i le lalolagi uma. O lau tusi o le Alualu i Luma o le Tagata Lava ia o le a fesoasoani e te sueueina ai tusitusiga paia, faatutu au sini, ma alualu i luma i le auala i le malumalu. O nei mea uma o le a fesoasoani ia te oe e saunia ai e avea ma ava ma tina ma se taitai maoae i le lalolagi.

Ma le faamaoni lava,
Elaine S. Dalton
O le peresitene aoao o Tamaitai Talavou



ATA NA PUEINA E IE © BUSATH PHOTOGRAPHY



Le Pele Amiga

T alofa mai Mekisiko! Na ou fiafia lava ua maua lau tusi ma iloa ai lou aso fanau ua lata mai. E foliga mai ua fai si ou popole i le tuua o le Peraimeri Pe mafai ona ou tau atu ia te oe le taimi na ou alu ai i Tamaitai Talavou?

Na ou popole foi i le tuua o le Peraimeri. Na ou popole nei le maua ni au uo. Na ou fefe i le avea ai ma teine e aupito laitiiti nai lo le avea ma teine e aupito matua.

Ae na matuai lelei lava mea uma. Na faatalanoa au e le epikopo a o lei oo i lou aso fanau ma tau mai ia te au o le suiga o se mea lelei. I le Aso Sa, na ou lag-naina pea le fefe ma nofo ai i le potu o le Peraimeri. O le mea na laki ai, na maua au e se tasi o taitai o Tamaitai Talavou iina. Na ia fai mai, "Na ou iloaina lava o le a ou mauaina oe ii! Sau loa, ua oo i le taimi e alu ai i le vasega."

Na faafeiloai au e Sister Diaz i le amataga, ma na ia tuuina mai ia te au tusi e tolou ua ou fiafia tele i ai: Mo Le Malosi o le Autalavou, Alualu i Luma o le potu, na ou iloaina ai ou te masani i nisi o teine mai le Peraimeri. O nisi o teine ou te le'i iloaina na faatalofa mai. Na vave ona ou lagonaina le filemu nai lo le fefe.

Na faasolo ina sili atu ona lelei mea uma mai lena taimi. Na faapitoa lava i le talalelei ma fesoasoani i lou aiga ma uo. Ma o le o i tolauapiga i tausaga taitasi o se matua fiafia lava! O lenei ua avea au ma Lora, ou te faamoemoe e faauma vave le Alualu i Luma o le Tagata Lava ia. Ua le mafai ona ou faatali e fai la'u asoa a Tamaitai Talavou e faamanatu mai ai ia te au ua ou latalata atu i lo'u Tama Faalelagi i nei tausaga.

O le mea la lea, aua e te fefe, la'u uo. Faamafola ou apaau ma lele mai i Tamaitai Talavou. Ou te folafola atu o le a e le faanoanoa.

Alofaaga,
Maribel

Faafeiloai Atu i se Vaitau Fou o le Olaga

Saunia e Marissa Widdison

Mekasini a le Ekalesia

Pe o e nofo i se eria e sui lanu o laau e saunia ai mo le tau-malulu E nonofo ai nei uo e toafa O Noa B., Dylan L., Patrick M., ma Peni M. e nonofo uma lava i le Motu o Prince Edward i le itu i sasae o Kanata. E pei lava o laau, o nei alii ua saunia mo se taimi fou o le olaga. E taufai 12 uma lava o latou tausaga, ma o lona uiga o le faatofa atu lea i le Peraimeri ae faatalofa atu i Alii Talavou. O la latou tala lenei e uiga i le tuputupu ae ma agai i luma.

Ia e Tumau

Ina ua malaga mai Noa iinei, na fesoasoani ana uo ia te ia e faamasani i le olaga i le motu. O le taimi nei, ona o ia e matua i le vaega, ua ia fesoasoani ia i latou e faamasani i le olaga i Alii Talavou. "Na ou popole i le taliaina o au ma le tau faamasani i isi," le tala a Noa e uiga

i le amataga i Alii Talavou. "O le alu i gaoioiga na matua fesoasoani tele." O le pese Peraimeri e sili ona fiafia i ai Noa e faatatau i le autau a Helamana, ma e faapena lana vaai i le korama a perisitua—i le galulue faatasi, ma lotogasi.

Lana fautuaga? "Ia e tumau."

Faaaloalo i le Perisitua

Mo Patrick, o le mauaina o le perisitua e le o le aulia o se tausaga patino. Ae o le agavaa ma le saunia. "E te le mauaina le perisitua ona ua 12 ou tausaga," o le tala lea a Patrick. "E tatau ona e saunia."

E malamalamama Dylan i le taua o le saunia. E taumafai o ia ia taunu i le lotu toe 15 minute amata ina ia saunia faaleagaga e tufa le faamanatuga. "Ua ou tufaina le faamanatuga faatolu po o le faafa, ma o taimi uma lava e pai mai ai le Agaga i lou loto. Ou te manatu o le a ou le masani ai lava," o lana tala lea.

Fai mai Peni o le tufaina o le faamanatuga e faamanatu atu ai ia te ia le Talisuaga Mulimuli. "Sa tu ai iina Iesu. Ua tatou tutu i le mea na i ai Iesu, ma e finagalo o Ia ia tatou i ai iina."

Vaai atu i le Malumalu

O loo galue Peni ia maua lona Tau i le Faatuatua i le Atua ma o loo tulimatai atu i le faia o papatisoga mo e ua maliliu mo le taimi muamua. "Ou te lei oo lava i totonu o le malumalu, ae masani ona tuuina mai molimau a isi tagata e uiga i le matagofie ma le manaia o le lagona latou te maua pe a latou foi mai," o le tala lea a Peni.

Na alu talu ai nei Noa mo le taimi muamua i le malumalu. Fai mai na fai o ia e alii talavou i lana korama e pei o se aiga. "Atonu e te lagona le fefe, ae o le a i ai tagata iina e fesoasoani ia te oe," o lana tala lea. "O le a e lagonaina le taliaina o oe." ■



Afio Mai, le Alii Iesu

Faafaigofie ♩ = 72-84

Mai fatuga a le Ekalesia o le
Faaola o le Lalolagi: Lona Soifua Mai ma le Toetu

1. A - fio mai, le A - li - i Ie - su;
2. A - fio mai, i e manu - nu - a,
3. A - fio mai le To - gi - o - la,

Fia va - ai i Ou fo - fo - ga?
Lo - to - nu - ti - mo - mo - ia.
Ma - la - ma mai Sa - sa - e.


Le Foa - foa, o se taga - ta e - se, i le - nei mea faa - tau - va - a.
Le faa - tua - oia Lou a - lo - fa, Ma - pu ma - tou ia O - e.
Faa - va - vau ma - tou o Lau fa - nau; So - lo e - se loi - ma - ta!

Mou le po, fotu mai le ao; Afio mai, E - ma - nu - e - lu.
A - fio mai i le ma - ma - lu; E pu - le ma no - fo - tu - pu.
A - fio mai i le ma - ma - lu; E pu - le ma no - fo - tu - pu.

Afio mai, i le faa - ta - noa va - o; Alii ie - su, afio mai!
Ma - tou ifo ma vi - ia O - e; Alii ie - su, afio mai!
Ma - tou ifo ma vi - ia O - e; Alii ie - su, afio mai!

Faaola o le Lalolagi: Lona Soifua Mai ma le Toetu sa tusia ma fatuina i lalo o le
taitaiga a le Au Peresitene Sili ma le Korama a Apostolo e Toasefululua.

© Puletaofia 2003 IRI. Ua taofia aia tatau uma. O lenei pese e mafai ona faia kopi mo le
faaaogaina mo aiga ma le lotu i mea e le faapisinisi. E tatau ona i ai lenei faaaliga i kopi uma e fai.



*Ua faasoa mai
e Elder Dallin H.
Oaks o le Korama
a Aposetolo e
Toasefululua nisi
o manatu e uiga
i lenei mataupu.*

Aisea e **TAUA AI** lo'u mulimuli ma le faamaoni ia **IESU KERISO** e tusa lava po o fea o o'u i ai?


○ Iesu Keriso o le
Toatasi na Fanaua ma
o le Alo Pele o le Atua.



○ Ia o lo tatou Foafoa.
○ Ia o le Malamalama o le
Lalolagi. ○ Ia o le Faaola
mai le agasala ma le oti.



○ le malamalama sili
lea ona taua i le lalolagi,
ma e mafai ona e iloaina
lenei mea mo oe lava ia.



○ i tatou o soo o
Iesu Keriso. E leai
se tulaga lua.



E mafai ona e faaaogaina le lesona
ma le gaoioiga lenei e aoao atili ai e uiga
i le autu o le Peraimeri i le masina lenei.

O Faamanuiaga o le Perisitua E Avanoa mo Tagata Uma

Ao faaliliuina e Iosefa Samita le Tusi a Mamona, na i ai sa la'ua fesili ma lana failautusi o Oliva Kaotui. Na la malaga atu i le vao e tatalo ai. Ao la tatalo, "sa afio ifo mai le lagi se avefeau i se ao o le malamalama." O lenei avefeau o

Ioane le Papatiso. Na ia faaee ona lima i luga o ulu o Iosefa ma Oliva ma tuuina atu ia i laua le Perisitua Arona. Ona poloaiina lea e Ioane le Papatiso ia Iosefa ma Oliva e papatiso e le tasi le isi. E lei umi se taimi mulimuli ane, ae oo mai i le lalolagi Aposetolo o Peteru, Iakopo, ma Ioane ma faauuina Iosefa ma Oliva i le Perisitua Mekisateko. Ua toe i ai i le lalolagi le perisitua a le Atua.

(Tagai Iosefa Samita—Talafaaso-lopito 1:68–72.)

E ala mai le perisitua ona mafai ona tatou mauaina faamanuiaga ma sauniga ofoofogia. O na faamanuiaga e aofia ai



faamanuiaga e tuuina atu i pepe fou, i e mamai, i fanau e o latou tama po o isi perisitua agavaa. E tatau foi ona tatou mauaina sauniga faapitoa o le perisitua e toe foi atu ai i le Tama Faalelagi. O nisi o nei sauniga e aofia ai le papatisoga i le faatofuina, mauaina o le mealofoa o le Agaga Paia, ma sauniga paia o le malumalu e mafai ai ona faamauina faatasi aiga e faavavau. O le malumalu foi, e mafai ai ona faia sauniga mo e ua maliliu e aunoa ma faamanuiaga o le talalelei. O faamanuiaga o le perisitua e avanoa mo tagata uma! ■



Pese ma le Mau

- Filifili se pese i le perisitua mai le *Tusipese a Tamaiti*
- Mataupu Faavae ma Feagaiga 84:35

GAOIOIGA A LE FMT **E Fesoasoani le Perisitua i Tagata**

O le perisitua o le mana o le Atua e auauna atu ma faamanuia ai tagata e ala atu i sauniga ma faamanuiaga. I totonu o nei ata, tusi ai oe lava ia i le ata.



Na o Oe

I le Penina Tautele, sue i le losefa Samita—Talafaasolopito 1:68–73.

Faaaoga fuaiupu na e fesoasoani ia oe e faatumu ai avanoa o loo i lalo. I se isi fasi pepa, tusi i lalo isi mea e te aoaoina mai le fatauina o nei fuaiupu.

1. "O le Perisitua Arona . . . e umia ki o galuega a _____, ma le talalelei o le _____."

2. _____
O le tagata muamua na papatiso.

3. Na papatiso e Oliva Kaotui _____.


4. Na galue loane le Papatiso i lalo o le taitaiga a _____,
_____, ma _____.

5. Na faaee mulimuli ane e Peteru, lakopo, ma loane le Perisitua _____.

i luga o losefa ma Oliva.

O loo faamanuia ma tufatufa atu e le au Perisitua le faamanatuga. Tusi lou ata i le nofoa, ua saunia e tago atu i le faamanatuga.

E mafai ona tuuina atu faamanuiaga o le perisitua i e mamai. Tusi lou ata i le moega, o loo mai.



E mafai ona faamauina aiga faatasi e ala i sauniga o le malumalu. Tusi le ata o lou aiga i luma o le malumalu.

O le papatisoga ma le mauaina o le meaalofa o le Agaga Paia o ni sauniga o le perisitua. Tusi lou ata o loo tu i luma o le vai papatisoga.

- 5. Mekistekeo.
- 4. Peteru, lakopo, loane;
- 3. losefa Samita;
- 2. Oliva Kaotui;
- 1. agelu, salamo;

Faaluaina ia Faamanuiaga

Feiloai ma Sofi ma Eloti o Antananarivo, Matakasa.

Saunia e Richard M. Romney

Mekasini a le Eklesia

Ole masaga teine e tai sefulu-tausaga o Sofi ma Eloti e nonofo i Mata-kasa. O se motu tele faasēsē ese mai le talafatai o Aferika. E i ai se tala moni e fafia i ai lo latou aiga. "O le taimi muamua na feiloai ai lou tama ma faifeautalai, na ia iloa ai e moni le Eklesia," o le tala lea a Eloti. "O ia o se tagata talitonu vave." Na papatiso lo la tina i nai masina mulimuli ane.

Ae lei fananau mai teineiti, na anapogi ma tatalo o la matua ia mafai ona maua se la teine. "Ma nai lo le tasi le teine, na maua e Mama le lua," le tala lea a Sofi.

Na faaluaina faamanuiaga talu mai lava lena taimi! ■



Na faaputuputu e le aiga o Sofi ma Eloti tupe mo le tolu tausaga ia malaga ai i le malumalu i Johannesburg i Aferika i Saute ina ia faamauina faatasi. E manaomia lo latou malaga i le sili atu ma le 1,300 maila (2,100 km) ma sopoia atu le Sami Initia ia oo ai iina.





*E i ai se falemai a le tina
o teineiti i talaane o lo
latou fale. La te fesoasoani e salu ma faatu-
mauina le mama.*



*E lua pusi a Sofi
ma Eloti, ma e
fifia tele e fusi
mai na pusi.*



*I le fu'a a Matakasa, o le paepae
o le mama lea, mumu e sui mo
le tutoatasi, ma le lanuao o le
faamoemoe lea.*



*O manu o le manuki ma le
pilioua e maua i Matakasa.*

Pe Le Mafai Ona **PAPATISO** Foi ma Au?

"Ma ia papatisoina a latou fanau mo le faamagaloina o a latou agasala pe a valu tausaga le matutua" (MF&F 68:27).

Nuno ma Miriama, pe o le a oulua mulimuli ea i le faataitaiga a Iesu Keriso ma papatiso i le Aso Toonai a sau?" Na fesili ai Sister Silva.

Na le mafai ona talitonu taliga o Paulo. O lea faatoa valaaulia lava e faifeatalai tamaitai lona uso ma lona tuafafine e tai 10-tausaga e papatiso!

"Ioe! Ioe. le tala fafia a le masaga.

Na le mafai ona taofi le ataata a Miriama. Na po atu le lima o Nuno i le lima o Sister Lopesa. Na sagisagi fafia mai Tinamatua mai lona

nofoa lapoa mumu i le tulimanu.

Na aoaoina e faifeatalai tamaitai ia Paulo ma ona tei mo ni nai vaiaso i le fale o Tinamatua e i le motu lanu lauvao, ma savili o São Miguel, e 1,000 maila (1,600 km) le mamao mai le atunu autu o Potukale. Na fiafia Paulo e tatala le afa i luga o le faitotoa i luma a Tinamatua ma lagonaina le savili o le sami ao ia vaavaai atu ia Sister Lopesa ma Sister Siliva o savavali mai i luga o le auala e aoao o ia e uiga i le talalelei.

Na fai mai faifeatalai tamaitai o nei o le a fai ai se lesona faapitoa. O lea la ua iloa e Paulo le mafuaga. O le a papatisoina Nuno ma Miriama, e pei lava ona aoaoina e Iesu! Na manao foi Paulo e mulimuli

i le faataitaiga a le Faaola.

"Sister, e mafai ona ou papatiso foi i le Aso Toonai lea?" na ia fesili atu ma le naunau, ao taofimau lana Tusi a Mamona.

Na ataata mai Sister Siliva ae na lulu lona ulu. "Ou te faamalie atu, Paulo. Na tau mai e le Alii ia i tatou e manaomia e i tatou uma ona papatisoina ae sei vagana ua atoa le valu tausaga. Ona na o le ono ou tausaga, e lei oo i le taimi e te tali atu ai oe lava mo au filifiliga."

"Ae, tuafafine," le tetee atu a Paulo, "Sa ou tatalo ma faitau faatasi ma lo'u aiga le Tusi a Mamona, e pei ona oulua aoaoina ai au. Ou te alu i le Peraimeri i vaiaso uma faatasi ma Tinamatua ma Uncle Mário. Ou te iloa e moni le Ekalesia."Pe le mafai ona matou papatiso faatasi ma Nuno ma Miriama?"

"Ua lelei tele le mea ua e faia o le tausia o poloaiga ma aoao e uiga i le talalelei," na fai atu ai Sister Lopesa. "Ae peitai e manaomia pea lou faatali mo le isi lua tausaga ona faatoa e papatiso lea."

Na amata ona vevela le fa'a'i o Paulo, ma na faatumuina ona mata i loimata. Na ia oso i luga ma tamoe





i lona potu i le falealuga, lea e momoe ai ma ona tei.

Ina ua uma lona tagi i lona aluga mo ni nai minute, na faalogoina e Paulo se tagata o ae mai i luga o le fale. Na nofo ifo i lalo Uncle Mário i le moega o Paulo.

“O le a le mea ua tupu, Paulo?” Le fesili a Uncle Mário.

“Na fai mai Sister Siliva ma Sister Lopesa e le mafai ona ou papatiso, ae mafai ona papatiso Nuno ma Miriam,” le tala a Paulo. “Ou te fia avea ma tagata o le Ekalesia! Ou te fafia e usu pese i le lotu faamanatuga ma aoao tusituisiga paia i le Peraimeri. Ou te le fia faatali.”

“Paulo, e mafai pea ona avea oe ma se vaega o le Ekalesia, e tusa lava pe lei lava lou matua e papatiso ai,” le tala filemu a Uncle Mário.

“E faapefea?” Na manavanava Paulo i lona aluga.

“Ia, ua e iloa o loo saunia e le Peraimeri le polokalama mo le lotu faamanatuga,” na fai atu ai Uncle Mário. “Na tau mai e lou faiaoga o le Peraimeri o loo ia sailia nisi e ofo mai e fai a latou molimau i le polokalama. O le tasi auala lena e mafai ai ona e auai i le ekalesia,” o le faamalamalama atu lea a Uncle Mário.

“E mo’i?” Na nofo i luga Paulo ma faasaga atu i le uso o lona tama. Na ia mafaufau mo sina taimi. “Masalo e mafai foi ona fai lau molimau i le papatisoga o Nuno ma Miriam!”

“O se manatu manaia tele lena!” Na fai mai ai Uncle Mário. “E tusa lava pe e te laitiiti tele e papatiso, e mafai lava ona maua sau molimau.”

Na oso ese Paulo mai lona moega ma faatopetope agai i lalo o le fale.

“O fea a e alu i ai, Paulo?” Le valaau a Uncle Mário.

“Ou te alu e faataitai le faiga

o lau molimau i faifeautalai!” Le toe valaau fiafia mai a Paulo “O le a ou faasoaina atu lau molimau ao faatali lou papatisoga!” ■



“O le onosai o lona uiga o le faatalitali ma le tumau. O lona uiga o le tumau ai i se mea ma le faia o mea uma tatou te mafaia—galue, faamoe-moe, ma le faaaogaina o le faatuatua.”

**Peresitene Dieter F. Uchtdorf,
Fesoasoani Lona Lua i le Au Peresitene Sili, “Faaauau i le Onosai,”
Liahona, Me 2010, 58.**

Ofu e Pei o se Tiakono

Saunia e Hilary M. Hendricks

E faavae i se tala moni

1. O nei le aso fanau o Eli.
Ua fa ona tausaga.

Toe fa lava
tausaga, ona e
papatiso lea.

Ma o le isi fa
tausaga, o le a avea
ai oe ma tiakono
ma o le a mafai
ona e tufaina le
faamanatuga.

2. Mulimuli ane, na fesoasoani Tina e sui ofu
o Eli mai ona ofu moe i ona ofu lotu.

3.

Pe fai e tiakono ni
ofuvae o tagata
totoa i le lotu?

Leai. E fai e tiakono
ofuvae mananaia.

4.

Pe fai e
tiakono ni
ofutino o
tagata totoa
i le lotu?

Leai. E fai e tiakono
ofutino papae ma
fusiua.



5.

Ou te fia ofuina se ofutino paepae ma se ofuvae manaia. Ou te fia ofu e pei o se tiakono.



Na fesoasoani atu Tina e fai le ofuvae manaia o Eli, se ofutino paepae, ma se fusiuia.

6. I le lotu, na piilima Eli ao ia vaavaai atu i tiakono o tufa le faamanatuga.



8. Na ataata atu Tina ia Eli. Na fifia o ia e fesoasoani. Na ia lagonaina e pei lava o se tiakono.



7. Ina ua tuuina atu e le tiakono le faamanatuga ia Eli, na tago atu Eli i se fasi falaoa ma tuu atu le fata ia Tina.



ATA NATIA

Ou te fia ofu e pei o se tiakono. Fesoasoani atu ia te ia e sue mea i lona potu e mafai ai ona ofu o ia pei o se tiakono.





Tatou te maua ia sauniga o le faaolataga e ala i le perisitua.

“O i latou uma o e talia lenei perisitua ua talia a'u, ua fetalai mai ai le Alii” (MF&F 84:35).

Tala Fou o le Ekalesia

Asiasi i le news.lds.org mo se faaopoopoga o tala fou ma mea e tutupu i le Ekalesia.

Faafesootai e le Autalavou Pasila ia Talafaasolopito o Aiga, Galuega o le Malumalu

Saunia e Melissa Merrill

Tala Fou ma Mea e Tutupu i le Ekalesia

Sa matauina e José A. Moscão se faiga agai atu i ai: o le autalavou o e sa o mai i le Malumalu o Campinas Pasila sa latou maua se taimi tele “e nofonofo ma faatalitali ai.”

Sa silafia e Uso Moscão, o le faatonu o le nofoaga autu o talafaasolopito o aiga lea e le mamao lava mai le malumalu, ona o le mamao e tatau ona malaga atu ai le toatele o le autalavou ina ia oo atu i le malumalu, o le toatele lava na malaga atu i karaveni ma nonofo ai mo ni nai aso. O le taimi i le va o a latou sauniga i le potu mo papatisoga ma le taimi o taumafataga ma le faatalitali ai mo o latou matua ma taitai o e sa auai i isi sauniga o le malumalu sa le mafai ona alofia.

Ae atonu, o ona mafaufauga ia, e mafai ona ia ofoina atu i le autalavou se isi mea e ese mai nai lo le feofeoai i lotoa o le malumalu i taimi uma e maua ai o latou taimi avanoa.

O lea sa ia faia ai.

O Se Valaaulia

Sa amata ona ia valaaulia le autalavou i totonu o le nofoaga autu ma ofo atu e aoao i latou i le auala e fai ai le siiina mai o igoa i le FamilySearch.

O le taimi muamua sa matamumuli pe musua ia nisi. Ae fai mai Uso Moscão ina ua ia talanoa atu ia i latou e uiga i le laveaiina o tagata mai le pouliuli ae aumai o latou igoa i le malamalama i le usiusitai i saunoaga a perofeta soifua, sa faapea ona ootia ai le autalavou (tagai i le David A. Bednar, “O Le a Liliu Atu Loto o Fanau,” *Liahona* ma le *Ensign*, Nov. 2011, 24–27).

O le i ai faatasi o le malumalu ma le nofoaga autu o talafaasolopito o aiga i totonu o le laufanua e tasi e taua lea; e faamamafaina ai se auala faaletino e faapea o le malumalu ma le galuega o talafaasolopito o aiga o ni vaega se lua o se tau-mafaiga maoae e tasi. O lena mea, na saunoa ai

George A. Oakes, o le peresitene o le Malumalu o Campinas Pasila, o se mea lea ua iloa e le autalavou o loo aofia ai i le itu o le malumalu.

Fai mai a ia, “E muamua atu i le faamamafa o le faaaofia o i latou i talafaasolopito o aiga ma le siiina o igoa, o le malaga atu i le malumalu sa faaautu lava i le faamoemoega o le papatisoina mo e ua maliliu. Ae o le taimi nei o le aafiaga i le siiina mai o igoa ua avea ma se vaega o la latou galuega.”

O Se Faailoaga

A o mai le autalavou i le nofoaga autu, e faailoa atu e Uso Moscão ma faifeautalai e volenitia i le nofoaga autu ia mataupu faavae nei i le taimi o se aoaoga faasamasamanoa faamasani puupuu.

- E avea i latou ma faaola i le mauga o Siona (tagai i le Opetaia 1:21).
- Latou te usitai atu i le valaau a se perofeta (tagai i le “O Le a Liliu Atu Loto o Fanau”).
- Latou te laveai mai tagata mai le pouliuli—o le pogisa o ata ua leva ona galo ma tusi ua pefua a ofisa o lesitala ma ekalesia. O le siiina mai o igoa e aumai ai na igoa i le malamalama ma faigofie ai ona sue ina ia mafai e o latou aiga ona maua i latou.
- I le auai ai i lenei galuega, o le a latou auai i se isi vaega o le “mataupu sili ona mamalu o mataupu uma o le talalelei tumau-faavavau, ua ta’ua o le papatisoga mo e ua maliliu” (MF&F 128:17).
- O le a latou faaaogaina o latou igoa i le galuega silisili o le faaolaina o e ua maliliu, lea e manuia ai aiga.
- O i tatou uma o se vaega o le aiga o le Atua, o lea la o le siiina mai o igoa o tagata latou te le iloa, o loo latou fesoasoani ai lava i o latou aiga.
- O le taimi lava latou te malamalama ai i le ala e auai ai i le siiina mai o igoa, latou te maua se



I le taimi o malaga i le malumalu, e auai le autalavou o le itu o le Malumalu o Campinas Pasila i le siiina mai o igoa a le FamilySearch i le va o sauniga papatisoga.

avanoa e aoao ai tagata o o latou aiga ma isi tagata talavou i o latou uarota ma paranesi e auai ai foi.

Ona faaaoga lea e Uso Moscão ma faifeautalai ia komepiuta a le nofoaga autu e faasino atu ai i le autalavou le ala e amata ai le siiina mai o igoa ma le ala e faaaoga ai le polokalama komepiuta pe a latou taunu i o latou aiga. O le taimi lava latou te malamalama ai, fai mai Uso Moscão, latou te “amata sii mai ai i se malosi e le mafaatusalia.”

O Se Naunautaiga mo le Galuega

O le numera [o talavou] ua atagia ai lena nau-nautaiga. I masina muamua e lua o le 2012, sa sii mai ai e tagata asiiasi ia igoa e 6,370; o le 3,305 o na igoa sa siiina mai e talavou o le vaitausaga 12 i le 18. O le mea moni, ina ia taulimaina le faateleina o le fiafia o tagata i le siiina mai o igoa, o lea e masani ai ona faaumiumi ona tatala itula o le nofoaga autu i Campinas mo talafaasolopito o aiga mai itula masani o le 8:00 a.m. i le 6:00 p.m. ae ua tatala ai lava seia oo i le 10:00 p.m.

Ae e le o tuua e le autalavou le siiina mai o igoa pe a latou tuua le malumalu. A latou oo atu i aiga, e faaaaua pea o latou tiute i le mea na ta’ua e Uso Moscão “o le autau e silia ma le 170,000 o le au sii igoa a le Ekalesia i aso nei.” O le toatele

ua ausia ai sini mo le Tiute i le Atua ma le Alualu i Luma o le Tagata Lava Ia i a latou galuega o le siiina mai o igoa.

O Se Faatosinaga mo le Lelei

I le amataga o le tausaga lenei, sa malaga atu ai Isabela A., e 16 tausaga, o Vila Velha, Espírito Santo, Pasila, ma lona tina ma lona uso i le malumalu; o le aso mulimuli o le malaga na atoa i ai le tausaga e tasi talu ona maliu lona tinamatua. Sa papatisoina Isabela mo lona tinamatua, ae sa fai e lona tina isi sauniga o le malumalu mo ia.

“Sa ou lagonaina i le taimi o le malaga lenei, sa manaomia ona ou faia se mea lelei,” o le tala mai lea a Isabela. “Sa ou manao ia ou iloa ona sii mai igoa, ma sa ou maua le fesoasoani mai ia Uso José Moscão.

“Ma, ina ua ou papatiso mo lo’u tinamatua, sa o’oo’o le pai mai o le Agaga ia te a’u. Sa ou iloaina sa toatele tagata malolosi o loo i tua atu o le veli o loo faatalitali mai lava, ma latou te manaomia la’u fesoasoani. Sa ou iloaina e mafai ona ou tuuina atu se vaega itiiti o lo’u taimi e auauna atu ai ma e mafai ona ou faia ni mea se tele mo nei tagata. O le siiina mai o igoa o se galuega o le alofa.” ■

Mo nisi faamatalaga e uiga i le tala lenei, asiiasi i le news_lds.org.

Ua Faavaeina le Uluai Siteki i Initia

Saunia e Elder E. Jack ma Sister Pamela Kellerstrass

Misiona a Initia Bangalore

Sa i ai se lagona manino o le fiafia ma le agaga faafetai a o faapotopoto le silia i le 1,500 o le au paia ma uo i le Maota Autu o le Novotel Convention i Hyderabad, Initia, mo le faavaeina o le Siteki a Hyderabad Initia, o le uluai siteki lea i le atunu, i le aso 27 o Me, 2012. Sa pule-faamalumalu ai Elder Dallin H. Oaks o le Korama a Apostolo e Toasefulua ma sa auai faatasi ma Elder Donald L. Hallstrom

o le Au Peresitene o Fitugafulu ma Elder Anthony D. Perkins o le Fitugafulu, o le o loo tautua ai o se Peresitene o le Eria i Asia. Sa auai faatasi faletua o nei taitai taitoatasasi i le konafesi.

Sa lagolagoina John Gutty o se peresitene o le siteki faapea ma Suresh Natarajan o le fesoasoani muamua ma Rajaratnam Bushi o le fesoasoani lua. O le uluai petriaka a Initia o le sa avea muamua ma peresitene o le paranesi

Na toeitiiti 600 le autalavou nofofua matutua mai Initia, Nepal, ma Sri Lanka sa faapotopoto mo se konafesi a o loma le faavaeina o le uluai siteki i Initia.



ATA NA PUEINA E JAMES DALRYMPLE

o le itu o Prasad Rao Gudey.

I lana saunoaga i le faapotopoto aupto toatele o le Au Paia i Initia, sa saunoa ai Randy D. Funk, peresitene o le Misiona a India Bangalore, "O se vaaiga mamalu lenei i lenei aso

O le au peresitene o le siteki o le Siteki fou na faatoa faavaeina o Hyderabad Initia (agavale i le taumatau): Suresh Natarajan, fesoasoani muamua; John Gutty, peresitene; Rajaratnam Bushi, fesoasoani lua.



ilogga, o se aso o le a tatou manatua peea. O le a tatou manatua peea sa i ai se Apostolo a le Alii iinei."

Sa faailoa atu e Elder Perkins alofaaga mai le Au Peresitene o le Eria i Asia i le au paia i Initia ma saunoa faapea, "Ua tatou vaia le amataga o se galuega matagofie i lenei laueleele. O le tuputupu ae o le Ekalesia ma le fausia o siteki ua faia e tusa ai ma mataupu faavae e faavavau o le talalelei ma mamanu ua faatulagaina o le perisitua."

I le taua o ia o se molimau lona lua i le valaauiina o le au peresitene fou o le siteki, sa faamatalaina ai e Elder Hallstrom le faagasologa faavaloga o le filifilia o le au taitai o le siteki fou. I le avea ai o se sui o Fitugafulu, na tofia ai o ia ma tau-nuu atu e aunoa ma se faaitau po o se faailoga tagata, o lana faamatalaga lea. Sa sau o ia i le ala a le Alii, e faalagolago i Lona Agaga e maua ai faaaliga. "O le finagalo o le Alii o Peresitene Gutty e avea ma peresitene o le siteki," o le saunoaga lea a Elder Hallstrom.

O Kristen Oaks, o le sa malaga atu faatasi ma lana tane, sa saunoa i le aoaoina o fanau ina ia latou talitonu "sa mautinoa lena mea e o latou tina" (tagai i le Alema 56:48).

I le avea ai ma tootoo mulimuli i le sauniga, sa faailoa atu ai e Elder Oaks le agaga faafetai i le malo o Initia, o se atunu e saoloto i mea tau tapuaiga lea e faatagaina ai le au paia a le

Ekalesia "e faatasiasi ma talanoa i mataupu faavae o lo tatou faatuatuaga."

Sa molimau atu Elder Oaks i le i ai o se molimau i le Agaga o le Alii na saunia ma filifilia ai taitai na filifilia. Sa saunoa foi Elder Oaks e uiga i tiutetauave fou o se siteki.

I le Feagaiga Tuai sa faatusa ai e le perofeta o Isaia ia Isaraelu i se faleie lea e faamalumalu ai

"O se faamanuiaga faapeteriaka e folafola mai ai lou tupuaga i ituaiga o Isaraelu lea e ala ai ona maua faamanuiaga maoae," o le saunoaga lea a Elder Oaks. "O se faamanuiaga faapeteriaka e tautino mai ai foi faamanuiaga ma folafolaga e mafai ona tatou maua pe afai tatou te faamaoni."

"A o tuputupu ae le Ekalesia i Initia, o le a oo mai le taimi o le a musuia ai le perofeta e

*A o asiasi atu
i Hyderabad,
Initia, sa feiloai
ai Elder Oaks
ma isi taitai o le
Ekalesia ma le
faitau selau o
le au paia mai
Initia, Nepal,
ma Sri Lanka.*



le fanauga a Isaraelu, fai mai o ia. "O le Ekalesia i aso nei o le faleie. Ua tatou iloa uma lava o se faleie e tatau ona lagolagona i ni taofi. O le avea ai la o Hyderabad ma se siteki o Siona, o le a faamoemoe ai ia outou agai atu i luma ma tuuina atu le lagolago sili atu e ala i le sefuluai ma faifeautalai."

O se taunuuga o le faavaeina o se siteki, o le a mafai ai e le au paia i Hyderabad ona maua faamanuiaga faapeteriaka. Sa faamalamalama atu e Elder Oaks mea e i ai i se faamanuiaga faapeteriaka, i le faatatau atu i se faamanuiaga o ni "tusutsiga paia patino."

fausia se malumalu i Initia," sa ia faaauau ai. "Soo se siteki lava e faavae, e faateleina ai le avanoa e i ai se malumalu. A o faaali atu e tagata le agavaa ma le naunautai, o le a mulimuli mai ai se malumalu."

I le faaiuga sa fofogaina ai e Elder Oaks se faamanuiaga: "I lenei uluai siteki i le atunu maoae o Initia, ou te faamanuiua outou ia manatua aoaoga o lenei itula. Ou te faamanuiua outou ia manatua feagaiga na outou osia ina ua outou papatiso. Ou te faamanuiua outou i se manatua ma se naunautai e tausipoloaiga a le Atua ina ia outou olioli i Ana faamanuiaga." ■

Ua Faapaia e le Apostolo le NAF Fou i Filipaina

O le Nofoaga Autu e Aoaoina ai Faifeautalai i Filipaina, lea sa faapaiaina e Elder Russell M. Nelson o le Korama a Apostolo e Toasefululua i le aso 20 o Me, 2012, e mafai ona faofale ai faifeautalai e oo atu i le 144 mai Filipaina, Kemupotia, Hong Kong, Initia, Initonisia, Monokolia, Pakisitana, Sri Lanka, Taiuani, ma Taialani. O nei faifeautalai e aoaoina i gagana a o latou lava atunu.

O fale e lua o le nofoaga autu fou e i ai se falefaafafia, potu mo faaliliuga, ma se potu o komepiuta, o se eria e fai ai tagamea, ma potu o aoaoga ua fausia ai i totonu masini otiovio, potu moe mo faifeautalai, potuaoga ma ofisa.

I le fofogaina o le tatalo o le faapaia o le fale fou, sa faailoa atu ai e Elder Nelson le agaga faafetai mo le Togiola a Iesu Keriso ma mo faifeautalai faamaoni ma tagata o le Ekalesia i le Lalolagi atoa o e alolofa ma auauna atu i le Alii. Sa ia talosagaina se faamanuiga i luga o le Malo o Filipaina ina ia “tumau le tatalaina o faitotoa o le faafeiloi” i auauna uma a le Alii ma tatalo ina ia faamanuiaina tagata o le atunu i le “saoloto ma le tali atu ina

ia ola i le amiotonu, i le faaletino ma le faaleagaga.”

O le Malumalu o Manaus Pasila o le Malumalu Lona 138 a le Ekalesia i le Lalolagi Atoa ma o le Malumalu Lona Ono i Pasila

Sa faapaiaina e Peresitene Dieter F. Uchtdorf, Fesoasoani Lua i le Au Peresitene Sili, le Malumalu o Manaus Pasila—o le malumalu lona 138 a le Ekalesia i le Lalolagi atoa ae o le malumalu lona ono i Pasila—i le aso 10 o luni, 2012.

O le faatuatua ma le tautino atu o le Au Paia o Aso e Gata Ai o loo nonofo i Pasila, lea e silia ma le tasi miliona ia tagata o le au paia, e mafai ona faatusaina i le Vaitafe o le Amasone, na saunoa Peresitene Uchtdorf—e tau fai tafe loloto ma malosi.

Mo le toeitiiti 20 tausaga, o le au paia a le Ekalesia mai Manaus, o se aai e motu ese e ala i vaitafe tetele ma togavao, sa malaga atu e ala i karaveni ina ia auai i le malumalu i São Paulo, Pasila—o se malaga e 15 aso e alu ai ma toe foi mai i le vaa ma le pasi—ma mulimuli ane ai i le malumalu o Caracas, Venezuela—o se malaga e 8-aso i le pasi.

Sa avea Elder Claudio R. M. Costa o le Fitugafulu, o se peresitene o le Misiona a

Pasila Manaus ina ua tatalaina i le 1990.

“Ou te talitonu o le a matuai pisi lava le Malumalu o Manaus, i aso uma lava, aua o nei tagata e ese le fiafia i le malumalu,” o le saunoaga lea a Elder Costa. “Latou te aoaoina a latou fanau ia fiafia i le malumalu. E matuai pele le malumalu ia i latou.”

Ua Faamanatu e Tagata o le Ekalesia i Samoa le 50 Tausaga o le Tutoatasi, [ma le] Uluai Siteki

I le Aso Faraile, 1 o luni, 2012, sa faatasai ai le pe a ma le 350 o le Au Paia o Aso e Gata Ai i Samoa ma isi tagata Samoa e savavali i se solo o le faamanatuga o le tutoatasi i alatele o Apia. O le limasefulu tausaga ua mavae, i le 1962, sa maua ai le tutoatasi o le atunu mai ia Niu Sila.

Sa auai faalapotopotoga, aoga, ma ekalesia i le lotofiale ma faalapotopotoga mai fafo. Sa faafafiaina e tamaiti aoga o le Au Paia o Aso e Gata Ai le faitau afe o le au maimoa i la latou faili pu.

Ae o le faaiuga o le vaisaso sa aofia ai se tasi itu taua o le faamanatuga mo tagata o Samoa o le Au Paia o Aso e Gata A; ua 50 ai foi tausaga talu ona faavaeina le uluai siteki i le atunu, i Apia.

I le Aso Sa, 3 o luni, sa saunoa atu ai Elder James J. Hamula ma Elder Kevin W. Pearson o le au Fitugafulu, ma o i laua uma foi o ni sui o le Au Peresitene o le Eria a le Pasefika, i le Au Paia o Aso e Gata Ai ma malo valaaulia i se sauniga faapitoa sa faasalalauina i falelotu o le AAG i le atunu atoa.

O le tagai atu i luma, ua tulimatai atu ai le Au Paia o Aso e Gata Ai i Samoa e faaaaua ona auauna atu ma faamalolosia o latou aiga, afioaga, ma le atunu, o le saunoaga lea a Elder Hamula, o le o loo avea ma Peresitene o le Eria. “O loo manaia lava lo tatou tuputupu ae o se Ekalesia iinei, ma o loo tatou tuputupu ae i o tatou aiga ma olaga patino a o tatou saili e mulimuli i aoaoga ma faataitaiga a Iesu Keriso,” na ia saunoa ai. ■

I le Nofoaga Autu Fou e Aoaoina Ai Faifeautalai i Filipaina, e oo i le 144 faifeautalai mai Filipaina, Kemupotia, Hong Kong, Initia, Initonisia, Monokolia, Pakisitana, Sri Lanka, Taiuani ma Taialani e aoaoina i gagana o o latou lava atunu moni.



ATA NA PUENIA NOEL MAGIAQUE

Na Fausia Ai La'u Molimau

Sa ou fatauina ma suesueina ma le filiga le *Liahona* talu mai le 1967, ma ua fesoasoani ia te au ou te tuputupu ae ai faaleagaga. O masina taitasi ou te faatalitali ai mo le mekasini ina ia mafai ona aoaoina ai au, lagona musumusuga a le Agaga o le Alii, ma fausia la'u molimau e uiga i le talalelei. E faapi-toa lo'u fiafia i le "Faataitaia ma le Faamamaluina o o Tatou Matua Faalelagi" (*Liahona*, Feb. 2012, 80). Sa mafai ona ou iloaina mea sa ta'ua e le tusitala aua o a'u foi o se mamanu kalafi.

Fabio Fajardo, Kolomupia

O Se Faiaoga ma se Uo

Ou te fiafia lava i le *Liahona*—e aoao ai a'u, lagolagoina a'u, ma faasa'oina lo'u olaga. A ou fatauina mea lelei i le taeao, ou te taumafai ia sili ona lelei la'u amio i le aso atoa. E malosi atu lo'u alofa ma lo'u faatuitua pe a ou fatau i le mekasini. Ou te tuuina atu foi le *Liahona* i a'u uo e avea o ni meaalofa. Faafetai lava mo se faiaoga ma se uo lelei!

Anastasia Naprasnikova, Lukureini

Faamolemole auina mai lou finalgalo faaalia po o fautuaga i le liahona@ldschurch.org. E ono faapupuuina tala mo le uumi po o le manino.

O lenei lomiga e aofia ai tusiga ma gaoioiga e mafai ona faaaoga mo afiafi faaleaiga. O nisi nei o faataitaiga.



"O Le Ola Fuafua Lelei E Saunia

Ai i Tatou mo le Lumanai," itulau 12: Faitau eria e ono o loo taua i le tusiga lea e mafai ona tatou faalagolago ai ia i tatou lava. O a nisi o mea e tutupu faafusei po o ni faafitauli e mafai ona alofia e ala i le atinaeina o le faalagolago o le tagata ia te ia lava i nei eria? Valaaulia tagata o le aiga e mafaufau ma le agaga tatalo po o le fea o eria e tatau ona latou faaleleia ma ia faatutu ni sini e faateleina ai lo latou faalagolago ia i latou lava i na eria.

"O Le Ola Mama i se Lalolagi Lē Mama," itulau e 42: la talanoaina ma tagata o le aiga ia fesili o loo fesiligia i le tusiga. Mafaufau e faasoa atu mataupu faavae ma aafiaiga ua faamalosia ai lau molimau e uiga i le ola mama. la talanoaina auala e faaaoga ai le fautuaga mai le tusiga.

"Ia Atamai ma la Avea ma se Uo,"

itulau e 48: Amata i le fatauina o le suega a Elder Hales mo le iloaina o uo lelei. Mafaufau e talanaoaina le taua o le avea ma se uo lelei. la valaaulia tagata taitasi o le aiga e mafaufau i ni auala se tolou e mafai ona avea ai o ia ma se uo lelei atu.

"Le Pele Amiga," itulau e 60, ma le **"Faafeiloai Atu i se Vaitau Fou o le Olaga,"** itulau e 61: Faitau e uiga i nei tamaiti Peraimeri ma le ala o loo latou sauniuni ai e ulufale atu i Tamaitai Talavou ma Alii Talavou. I le avea ai o se aiga, mafaufau e talanoaina mea na fai e nei tamaiti e saunia ai. la valaaulia tagata o le aiga e fatau tamaitusi o le *Alualu i Luma o le Tagata Lava la po o le Tiute i le Atua* ma sue nisi o gaoioiga latou te fiafia e faamaeaina i le lumanai.

Tasi le Afiafi Faaleaiga, Lua Lesona

I se tasi afiafi sa o mai ai o'u matua ma matua o lo'u tina e asiasi mai mo le afiafi faaleaiga. E fiafia uma la'u fanau e toatolu e auai, ma i lenei po o le avanoa lea o la'u tama tama e fitu tausaga le matua e fai ai le lesona. Sa matou saunia se faaaliga laitiiti, tuu i luga ni ata e faatatau i le Foafoaga, ma suesueina ma faamanatu mea o le a ia aoaoina mai. Sa saunia ma sa fiafia lo'u atalii.

I le taimi o le lesona, sa matou faalogologo uma ma le totoa i mea sa faamatala mai e lo'u atalii. Ina ua uma, sa filifili foi Samuelu, o le sa tusa ma le tolu ona tausaga, e manao foi o ia e tuuina mai se lesona. O lea sa ia aveina ai ata ma le faaaliga ma toe faatulaga i luga o le laulau.

I si ona leo malie ma ana upu o ni isi taimi sa le lelei ai le faaleoga, sa tuuina mai ai e Samuelu se lesona o le afiafi faaleaiga. Ma e ui lava ina sa le'i saunia o ia, ae sa faalogologo lelei. Sa ia faamatala mai ia i matou le ala na foafoaina ai le lalolagi ma ta'u mai ia i matou le alofa o lesu Keriso ia i matou taitoatas.

Sa matou tetei i le vaia o le faigofie ona ia aoaoina mai o le lesona—sa faia e pei ona faia e lona uso. Sa faateia ma fiafia o'u matua ma matuamatutua. Sa mafai ona matou iloaina uma le alolofa o nei fanau laiti i le talalelei—ma le alofa o lesu Keriso mo i latou.

Lizbeth Sánchez Fajardo, Mekisiko

E AUUAUAI MAI PEA MEA LELEI

Saunia e Caitlin A. Rush

O se Aso Faraile e pei foi o isi aso. Na matou nofonofo ma au uo mamae i lou fale mautotogi ina ua uma se tifaga, na talanoa filemu mai lea taimi i lea taimi ona toe leotetele lea. Na faatumuina le ea i se lagona o le fafia moni, ma na le mafai ona taofia lou ata ao fepasai tala ma manatu i le potu. O nisi o tagata faatoa ou feiloai i ai i se masina talu ai; o isi na ou iloaina i lou 25 tausaga atoa lava.

I se tasi taimi na ma faasoaina ma se tasi o uo ua leva ni manatuaga i nisi o a ma uo i le kolisi mai ni nai tausaga talu ai. Ao ma talanoa, na ou mafaufau i lou misia tele o nei uo, i le tele o le fafia na matou maua, ma lo matou vavalalata tele na i ai. O lenei ua matou faauu ma malaga atu i nofoaga eseese i le salafa o le lalolagi, ma ua i ai nei i matou i ni tulaga matou te lei mafaufauina lava muamua. Na ou mapuea i le lagonaina faafuasei o le misia o na taimi, ona ou autilo lea faataamilo i le potu i foliga fafia o loo siomia ai au i lena taimi ma na faateia i se manatu faafuasei faapea: *e auauai mai pea mea lelei*.

O lena manatu faatauvaa na matua taua tele mo au, ae maise lava na masani ona faigata tele ia te au le feagai ma suiga ma o loo faigata pea ona tuuese atu mea lelei. Ou te misia le taimi tuanai ao lenei o loo i ai pea i le taimi nei, o loo popole i le olioli atoatoa i taimi o loo ou ola ai ma le mautinoa ma



*I le avea ai
ma se tasi ua
manatu vave
tele ona suia
le taimi nei
i se taimi ua
tuanai, na ou
faafetai ai mo le
faamanatu mai
e tau lava o le
olioli i le taimi
nei ma vaai atu
i le lumanaiai.*

le atoatoa. Ou te iloa afai o ia te au se mea lelei, ma ou te manao e uu mau ma aua nei mamulu; o lenei po ‘ivā ma le fafia o le Aso Faraile o se tasi o na taimi. E masani lava pe afai ou te iloaina ua matua lelei mea uma, ou te manatu vave lava i le vave mou atu o mea uma, ma o le a oo lava ina leiloa atu ona o le taimi po o le tulaga e oo mai.


Ao le po lena, e lei oo mai se manatu ua maimau. I le nofonofo filemu ai, ua siomia e tagata ou te alofa i ai, na ou iloa ai e ui lava ina o nisi mea lelei e tatau lava ona oo i se iuga ma o le a le taumateina lava le tele o mea faigata i le lumanaiai, o le a auauai mai pea mea lelei. Ma o le a oo mai lava—pe afai o le a ou faatagaina. E ui lava o le a malaga ese atu i latou ou te alofa i ai, ae o le a faatumuina le avanoa e tagata fou ma ofoofogia ma aafiaga ou te lei mafaufauina muamua.

E faigata i nisi taimi ona agai i luma, ae peitai e tatau lava. Ma o le agai i luma e le faapea o le faagaloina o faigaou, e faamalosia ai manatuaga e mou atu. O lona uiga o le tatalaina o o tatou loto i nisi olioli e sili atu ma nisi aafiaga.

I nai vaiaso ina ua maea lena Aso Faraile, na faamaloloina ai le au peresitene o la matou autalavou laiti o le paranesi. E pei ona mafai e soo se tasi mai se tamai paranesi ona faamaonia, e faigata ona mafaufau i le mea o le a tupu e aunoa ma le faalagolago atu o le matou paranesi i nei alii ma o latou faletua, ua matou alolofa ma talitonuina. Ae na moeiini ou mata ma toe fai ifo ia te au lava ia upu na faateia ai au i lena Aso Faraile: *e auauai mai pea mea lelei*. Na faamafanafanaina au ma saunia mo le suiga.

O suiga, o le ala a le Alii. E finagalo o Ia ia tatau fafia ma tuputupu ae, ia fafia e agai i luma i o tatou olaga. O le olaga o se malaga, ma ao tatou fafia i le taimi nei ma saunia mo luitau e le maalofia, e tatau ona tatou agai i luma, tumau i le fafia, tatala atu o tatou loto i aafiaga ma mea lelei e le masalomia o loo agai mai. ■

Olenei tausaga e tele lomiga o le *Liahona* o loo i ai se seti o faatusa o tagata i mau o le Tusi a Mamona. Ina ia faamausali ma faigofie ona faaaoga, oti ata ma faakelu pe faapiipii i se pepa malo, tamai taga pepa, po o ni tamai fasi laau. Teu seti taitasi i se teutusii po o se tagapepa, faatasi ma se faailoga e tau mai ai po o fea e maua ai le tala o le mau e o faatasi ma faatusa o tagata.



Ua Taitaiina Sa lareto i le Nuu Folafolaina

Eteru 1–3, 6



Na aoaoina e le Au Peresitene Sili ma le Korama a
Aposestolo e Toasefululua faapea "o faaipoipoga ma aiga
manua, e faavae ma tumau i mataupu faavae o le faatuatua,
tatalo, salamo, faamagaloga, faaaloalo, alofa, agalelei,
galuega, ma gaoioiga faafifafia tuufaatasi" ("O Le Aiga:
O Se Folafolaga i le Lalolagi"). Mo nisi aitia i le faaaogaina
o nei mataupu faavae i lou olaga faapea ma le aiga,
tagai i itulau e 4, 16, 20, ma le 22.